

# DIBUULUDIIBWA DYÀ NZAMBI



Twǎnjàayi kushaala biimanyine kuulu katanci kakese cyanaana patudi twinyika mitu yetu bwa kusambila apa.

<sup>2</sup> Mukalenge wetu Wa ngàsà, tudi bushuwa ne kusakidila leelu ewu bwa dyèsè ditudi bapete bwa kudisangishaku pa buloba apa kumpala kwa Dilwa dya Mukalenge. Swaku bwa tukenketeku myoyi yetu leelu ewu, ku Diyì Dyebe, bwa tumone ní tudi mu Diitabuuja anyi, bwa twètù kwikala badilongolole, ciine aci, bwa dîbà dya Dimweneka Dyende. Bwa twikalakù mudi Mufundu mwambe ne netwikalè amu: “Bangaciibwe muulu pamwe, pamwe ne aba badi balaale tulu, bwa kusangila ne Mukalenge mu mpeepele, ne kwikala Nende kashidi.”

<sup>3</sup> Tudi tuKusakidila bwa Nyuma mulelela wa bwena Kilisto uci di pa buloba, munkaci mwa bantu, bu mucidibo anu bakwitabuuje Wèwè ne Dîyì Dyebe. Pa nanku tudi tulomba mabenessa Ebe pambidi peetu leelu ewu, bwa Wèwè kupongolwelaku muntu ne muntu wa kutudi bitudi naabi dijinga, bwa twamona mwa kwikala banyamina mâyi kudi Dîyì, bwa twamona mwa kukola ne kushaala byamu bya mudimu mu byanza Byebe, bwa dituku dya ndekeelu edi. Bwalu tudi tulomba nunku mu Dînà dya Mukalenge Yesu Kilisto, wetu Mulami munene wa mikooko, utudi bindile bwa kumwenekaye. Amen.

Nudi mwa kusòmbaayi.

<sup>4</sup> Nenku ndi muswe kwamba ne ndi mbala eci bu ne ndyèsè dinene mu dinda emu dya kusanganyiibwa cyakabidi mu mwaba ewu. Kadi ndi ndomba luse bu mutudi katuyi ne nzubu mulenga menemene wa myaba micyankame yàbûngì ya kusòmba. Nenku netwikalè mwa kuteeta, diloolo edi, mpindyewu bwa kwenza disambila dya babeedi; leelu, bwa mu dinda emu, mbifwanyine kwikala bikole ndambu.

<sup>5</sup> Nenku—nenku mwana ne cya kukwata Diiyiisha edi leelu ewu pa mukaba wa mêyi. Ndi . . . Bivwa bimweke bu ne Mukalenge mmudimpèèshe, kaa, kukaadi ngondo umwe anyi yibidi, kadi ndileepa. Kadi nci tu mpeta dîbà mu masangisha a pambelu to, bwalu tutu twitaba anu bwa kwenza tusunsa makumi asatu, anyi makumi anaayi a disangisha. Ne pashiishe tudi . . . Bu mudibi bikengela bwa bantu kuyabo ku midimu ne bikwabo, ndi musangane ne mbîmpè bu mêmè mwa kwipidijaku Mayiisha aanyi. Nenku kabavwa ne dîbà pambelu pààpa dya kubikwata pa mikaba ya mêyi to, ki pa nanku mêmè kwela meeji ne ngindile anu mene too ne pâmvwà mwa kulwa ku tabernacle eku nenku ngakwacile mwaba ewu. Kadi ndileepa ndambu, paabi ndi mumanye ne nudi biimane kuulu, nenku nê—nêngiikalè

mwa kulwijakaja anu ne mwanyi mwônso. Nenku, mpindyewu, kanwakuntacisha to bu nwênù mwa kwikala nushintakajangana myaba ya disòmba, anyi nî ncinyi cikwabo, aci neciikalè—aci neciikalè anu cikumbane menemene bwanyi mêmè bwalu edi ndituku dya pabwadi ditudi twenza anu dikwata dya mikaba ya mèyi eyi.

<sup>6</sup> Pa nanku tudi bapete milubu minene ya bidi Mukalenge mwenze pambelu mu budimi bwa bwambi, kadi netùbyâmbè byàbûngì diloolo edi patwikala mwa kukufila dîbà dyàbûngì, kwikalaku ne dîbà dyàbûngì dya kufilaku.

<sup>7</sup> Nenku mpindyewu tudi batwishiibwe ne Mukalenge neabenesheku muntu ne muntu wa kunudi. Ndi mumanye ne myoyi yenu mmyûle tente ne disanka, bu munudi bindile Dilwa dya Mukalenge. Ne wanyi paawu, udi ütùtuka's, pa kumona maalu enzeka mudiwu enzeka emu. Ne—ne mvita ya mu ditunga, ne ekeleeziya mu ngiikadilu udiye usanganyiibwamu ewu, ne pa kumona bimanyinu bya Dilwa Dyende, ne bya mubidi ne bya nyuma, ne pa kumanya ne cikondo eci cya Dimweneka Dyende cikaadi pabwipi menemene, bidi byuja anu myoyi yetu tente ne disanka dya kumanya ne netwikalè mwa kushintuluka dimwe dya ku matuku adi panshi aa. Netwikalè mwa kushintuluka kuumuka ku bifukiibwa bitudi ebi.

<sup>8</sup> Mpindyewu, ndi ngeela meeji ne, bu mêmè mwa kuumvwa, mbalungè telefone myaba kampana, mu mushindu wa ne Mukenji ewu udi ubwela too ne mu Phoenix ne mu—ne mu bitupa bishiileshiilangane, ku telefone. Nenku mpindyewu tudi batwishiibwe ne piikalabi ne bidi nanku . . . Ncyênà mumanye; mbafume ku dicingambila anu pânkaavwà pa kubwela apa. Ne—ne bantu bônso baa pambelu pàapa badi bulelela basanka bwa mubidi tumatuma ne—ne bwa Butumbi bwa Mukalenge pambidi paabo.

<sup>9</sup> Nenku mpindyewu—mpindyewu netubuulule mu Dìyi dya Mukalenge. Ne citudi twètù bônso aba bavwile mwab'ewu mbwa kusanka ne kuteya ntema ku bitudi . . . Kacya katùtukù—katùtukù balwe mwab'ewu biikalè . . . Muntu nansha umwe udi mwab'ewu kî mmumanye ne muntu mmufwanyineku kwikala musòmbe mu luuya lwa mushindu ewu, ciine aci anu ne meeji a kwikala apa to. Tudi apa mbwa kiipacila kamwepele, kaa ne, “Iwendu lwa sheemàsheemà ne Nzambi.” Ki cyônso citudi mwa kwenza, nkwitabuuja ne Mukalenge Yesu udi neetu. Nenku tudi mwaba ewu mbwa—mbwa kwenda Nende lwendu lwa sheemàsheemà.

<sup>10</sup> Mpindyewu luuya elu ndukole ndambu pambidi paanyi. Nkààdikù mwibidilangane ne luuya lûme lwa mu Tucson mwamwa lwalwa, lùdì . . . Citaleela cya mwaba ewu mpindyewu; lwetu luuya lwa kwaka ludi lwa mudilu mukole menemene kupita elu, kadi lwikalè lûme. Cyetu citaleela citu misangu

mikwabo cya bya makumi abidi bya cya pa lukama cimwe, pàmwápa, cintu bu nanku awu, byenze anu bu badi basòmbèle mu ntenta wa mbombone. Kadi apa cidi ne—ne—mutaleela mwómò, ne ciikàle cikwenzeja bu udi udyumvwa “bakukame mâyi ònsò a mu mubidi,” mutuvwa ne ciibidilu cya kucibiikila amu. Pa nanku ludi lunwosha bikole, ndi mumanye nanku, ne nwênù baamaamù badi ne bânà bakese baa mu maboko ne nwênù badi biimane kuulu abu, bakole ne bânà, ne bafinakane mushindu unudi awu. Nenku mpindyewu tudi—tudi tutekemeni ne Nzambi neanufute mu mushindu mubanjike bwa didifila dyenu.

<sup>11</sup> Ndi muumvwe ne Mwaneetu Roy Borders udi apa mwaba kampanda. Ngũmvù bamanyisha bwende yêyè, kadi ndi ngeela meeji ne pàmwápa kî mmupete mushindu wa kubwela to. Eyo. Yêyè ki utu mulongolodi wa ndongamu ya masangisha.

<sup>12</sup> Pa nanku mpindyewu tudi baswe kabidi kumanyisha ne kampanda uvwa ne ciibidilu cya kwikala munkaci mwetu wayi bwa kwikala ne Mukalenge mu dinda emu, mmuntu mulume, Mwaneetu Jackson wa mu Sturgis, Michigan. Kakwena muntu mumanye mudiye muye anyi nî ncinyi pa bwalu abu to. Yêyè uvwa anu bîmpè, kadi nyawu wáfumu ku...Ngeela meeji ne mbamusangane mufwe, anyi cintu kampanda. Ncivwa—ncivwa mupete kantu ne kantu pa bwalu abu to. Kadi tudi ne kusakidilaa kwábúngi kudi Nzambi bwa muvwa Mwaneetu Jackson mwena Kilisto. Ncyêna mumumone to kukaadi bidimu mulongolongo, kadi úvwa úsòmba munkaci mwetu ne úvwa umwe wetu. Nzambi ikishisheku musuuka wende wa bukutu awu! Mushindu udiye muye, tudi twitabuuja ne pàmwápa civwa ncintu kampanda, bwa ne divwa ndyende pende díbà dya kuyaye. Mukalenge kavwaku mutudimwije pa bwalu abu to, anyi mumudimwije yêyè mwine to, mmuye pende anu pakàlàkàà. Ki mushindu udibi byenzeke ngwòwò awu. Nenku ndi ne dijinga dya kubiikila mukajende ne lukasa lwònsò, bwa twétù kwabanyanganaku nende dibungama. Ne tudi bònsò baswe kupingajila Nzambi twasakidila bwa nsòmbelu wende wa bukutu wa bwena Kilisto, ne bwa musinga uwaye naawu pa buloba ebu, ne nangananga bwetu twétù mwaba ewu mu disangisha dya pa kaaba edi.

<sup>13</sup> Mpindyewu diloolo edi, ndi mumanyishe ne nekwikalè disambila dya babeedi diloolo edi, nenku nêngàakulé byábúngi kabidi pa bidi bitangila babeedi diloolo edi.

<sup>14</sup> Kadi bwa díbà edi, tubwelaayi buludi mu Díyì mpindyewu, bwalu bantu mbapatakane ne kudi luuya lukole. Netuye buludi ku Díyì. Ndi muswe kubala mu bitupa bibidi bya Mifundu mu dinda emu, bileebile, bwa byamonaku mwa kumpa ndambu wa mwaba wa kushindamijilapu bindi njinga kwamba.

<sup>15</sup> Nenku, mpindyewu, ndi njinga ne baalamaku mukaba wa mēyi awu, Mwaneetu Sothmann ne bakwabo, kumpala kwa kuwusumbishabo, kwôkò mushindu, nenku ndi—ndi njinga kwanji kuwuteelejaku kumpala kwa twètù...kumpala kwa kupatukawu kuya kudi bantu bônso.

<sup>16</sup> Mpindyewu mu . . . Ndi muswe kubala mu Filipinooyi, nshapita mwi2, 1 too ne ku 8; ne Kolinto Mwibîdi 3, kuumukila ku 6, kubala too ne mutudi tukabwela mu nshapita mwi4 wa Kolinto Mwibîdi, anu bwa paa kushindamijila bya dyamba. Mpindyewu mu Filipinooyi, nshapita mwi2, ki ûngààbalà kumpala.

Kumpala kwa kubala, tusambilaayi.

<sup>17</sup> Mukalenge Yesu, Dîyi Dyebe didi Bulelela. Ne mu dîbà dya ndululu ditudi ne mwoyi edi, ditunga dilwishangana ne ditunga dikwabo, cikupi, dikanka dya buloba mu myaba yàbûngi, myoyi ya bantu yamba kwimana munda, bwôwà, tudi tumona mufundu ku cimanu. Mpindyewu, abi mmu cipaapu cya bufuki eci, bwa baa pa buloba bujima kumonabo byôbî ebi. Kadi mpindyewu kudi kabidi cipaapu cya nyuma, ne, biikàle tumona bintu binene munkaci mwa kwenzeka, nenku nyewu tujinga kwakula pa byôbî abi leelu ewu.

<sup>18</sup> Bèneshâku Dîyi Dyebe mu myoyi yetu. Tudi bamanye ne kakwena muntu nansha umwe nî mmu Dyulu nî mpa buloba udi mukumbanyine bwa kwangata Mukanda ewu, kukangula Bitampi, anyi, nansha kuWutangila to. Kadi kuvwa Kampanda wâkamwèneka, Mwânà wa mukooko mushipa, ùmata mashi, wâkalwa e kwangata Mukanda awu, ne uvwa mukumbanyine ne mukumbane bwa kuWubuulula. Eyi Mwânà wa mukooko wa Nzambi, kangwilaku myoyi yetu Dîyi Dyebe leelu ewu, bwa busambi. Tudi basadidi Beebe. Utufwileku luse ku mpekaatu yetu, Mukalenge. Ne cintu kana cyônso cididifwanyine kupangisha Dîyi bwa kupatuka ne bukole bunene ne bwenzeji leelu ewu pa myoyi yetu aci, ùcyûmùshè, Mukalenge, cipumbishi kana cyônso, bwa twamona mwa kwikala ne mushindu mu kaabujima wa kufika ku mabenasha ônsò àtù matulaya kupicila ku Dîyi Dyebe. Tudi tulomba nunku mu Dîna dya Yesu. Amen.

<sup>19</sup> Filipinooyi 2:

*Nenku piikalaku busambi kampanda mu Kilisto, piikalaku dikankamika kampanda dya dinanga, piikalaku dyumvwangana kampanda dya Nyuma, piikalaku ndondo kampanda wa mwoyi wa luse,*

*Vwiyaayi disanka dyanyi dikumbàne, bwa nwikalè ne meeji a mwomumwe, biikàle ne dinanga dya mwomumwe, biikàle ne dîyi dimwe, ne—ne meeji amwe.*

*Kakwenzekiku cintu nansha cimwe ku dikokangana anyi bwa butumbi bwa patupu to; kadi mu didipwekesha*

*dya mu meeji muntu ne muntu abale mukwabo bu mwîmpè kumutamba yêyè.*

*Muntu ne muntu katangidi anu ku maalu ende yêyè mwine to, kadi muntu ne muntu atangile kabidi maalu a bakwabo.*

*Meeji aa ìkalè munda mwenu, a bwena avwa kabidi munda mwa Yesu Kilisto:*

*Yêyè, mwikàle mu mmwenekelu wa Nzambi, kaakeelaku meeji ne ncintu cya kunyenga bwa kwikala muomumwe ne Nzambi to:*

*Kadi wakadivwija yêyè mwine bu kayi wa luumu, ne wakadyangacila mmwenekelu wa musadidi, ne wakavwijiibwa mu cimfwanyi cya bantu:*

*Ne paakasanganyiiibwaye mu mushindu wa muntu, wakadipwekesha, ne wakashaala mutumikidi too ne ku lufu, ku lufu mene lwa ku nkuruse.*

<sup>20</sup> Mpindyewu bu twêtù mwa kubuulula mpindyewu mu Kolinto Mwibîdi, nshapita mwi<sup>3</sup>, netubangile ku mvensa mwi<sup>6</sup>, twenda tubala cyôci eci too ne ku wa 18, ne tupweka too ne ku citupa cya nshapita mwi<sup>4</sup>.

*Yêyè udi kabidi mutuvwije bambi bakumbane baa dipungila dipyadipya; kadiyi dya dileeta to, kadi dya nyuma: bwalu dileeta didi dishipa, kadi nyuma udi ufila mwoyi.*

*Kadi piikalà mudimu wa lufu, mufunda ne mutapa pa mabwe, úwva wà butumbi, mu mushindu wa ne bânà baa Izaleela kabavwa mwa kushaala batangile ne kulengameena kwônsò mpala wa Môsà bwa butumbi bwa lukebu lwende; butumbi bwine abu mbuvwa ne cya kuumushiibwa:*

*Ambaayi tûng mvwabenga mudimu wa nyuma kwikala ne butumbi butambidile?*

*Bwalu piikalà mudimu wa dipiila mwikàle wa butumbi, mudimu wa bwakane mmutambidile mu butumbi.*

*Bwalu nansha ciine cyàkavwijiibwà cya butumbi aci kaciyena ne butumbi bwine mu mushindu ewu to, bwa tubingila twa butumbi bùdi butambidile.*

*Bwalu piikalabi ne cidi cymushiibwe civwa butumbi, mmudi mutamba kwikala . . . cidi cishaala cidi butumbi.*

*Nanku bu mudibi ne twêtù tudi ne ditekemena dya mushindu ewu, tudi ne cya kutamba . . . didilekelela dya ngaakwilu, kwangata didilekelela dinene dya ngaakwilu.*

*Nenku kabiyi bu Mòsà to, uwwa uteeka cibwikilu pampala pende, bwa bânà baa Izaleela kabapeci mushindu wa kumona ne kulengameena kwònsò ndekeelu wa civwa cyumushiibwe:*

*Kadi meeji abo awwa mafofomija: bwalu too ne ku dituku edi cibwikilu cimwecimwe cidi kacyi cyumusha aci cidi cishaala padibo babala dipungila dikulukulu; cyòci cibwikilu aci ncyumushiibwe mu Kilisto.*

*Kadi nansha too ne ku dituku edi, padibo babala Mòsà, cibwikilu aci cidi pa myoyi yabo.*

*Nansha nanku piikalawu mukudimunyiibwe kudi Mukalenge, cibwikilu aci necyumushiibwe.*

*Mpindyewu Mukalenge ki udi Nyuma awu: ne kudi Nyuma wa Mukalenge. . . ki kudi budishikaminyi.*

*Kadi twètù bònsò, ne mpala kayiyi mibwikila to tudi tutangila byenze bu mu lumweni butumbi bwa Mukalenge, tudi bakudimuke mu cimfwanyi cimwecimwe aci ku butumbi ne ku butumbi, byenze anu bu ku Nyuma wa Mukalenge.*

*Ki bwa cinyi bu mutudi ne mudimu wa bwambi ewu, bu mutudi bapete luse, katwena tucina nansha;*

*Kadi tukaadi balekele bintu bisokome ne bya mu mufindifindi, katuyi twendela mu budimu ne katuyi tukwata dîyi dya Nzambi ne mafi to; kadi ku dimweneshiibwa dya bulelela tudi tudipiisha twètù biine ku kondo kaa mwoyi kaa muntu yònsò ku mèsù kwa Nzambi.*

*Kadi piikalabi ne evanjeeliyo wetu mmusokoka, mmusokoka bwa aba badi bajimine:*

<sup>21</sup> Mukalenge asakidileku mabenasha Ende ku dibala dya Dîyi Dyende!

<sup>22</sup> Mpindyewu, cyena-bwalu cyanyi mu dinda emu, ndi mèmè mutwishiibwe ne Nzambi neacibuulule. Nenku musangu wònsò, nwènù badi bangata mikaba ya mèyi ne nuteeleja, ndi ntekemena ne mutwishiibwe—ne nudi bapete dyumvwa dya nyuma dya cidi Nzambi muteete kwambila Ekeleeziya kayi ucymba buludi pa bütòka to. Nwamonu anyi? Ncintu, misangu mikwabo, bikengela twámbe bintu mu mushindu wa bifwanyine kukeepesha bungi, bifwanyine kufikisha bamwe ku dipatuka, bamwe ku dyumuka kuya, ne bakwabo ku—ku—ku dyelangana meeji. Kadi aci cidi cyenjiibwa ku bukole. Bidi ne cya kwenjiibwa mushindu awu.

<sup>23</sup> Dîbà adi mbifwanyine kwenzeka bya bamwe bafwanyine kwamba ne: “Udi uswa kwamba ne Nzambi mmufwanyine kwenza cintu bu nanku ku bukole anyi?” S’ncyá bushuwa ne Yèyè utu ukaadi mucyénzè. Úcitu anu ucyenza.

24 Yèyè wakamba dituku dikwabo, pavwaYe ne binunu biMunyungulukile, Yèyè ne: “Nwènù kanuyi badye Munyiinyi wa Mwânà wa Nzambi, anyi wa Mwânà wa muntu, ne kanuyi banwe Mashi Ende to, kanwenaku ne Mwoyi munda mwenu to.”

25 Nudi nwela meeji ne ndiyi dya mushindu kaayi didi ngangabuka anyi munganga, anyi muntu kana yònsò wa mamanya a mu mutu wa maalu mimpè ewu mufwanyine kudyambidila bwa diyi bu nanku awu, bwa Muntu uvwa ne mudimu wa bwambi wa bwena uvwaYe naawu awu? Mona’s, s’mmufwanyine kwamba ne: “Kudya munyiinyi? Aku’s nkwikala mudi wa minyiinyi ya bantu’s! Kunwa mashi a muntu? Awu’s mmukishi munù wà mashi’s! Mu ngaakwilu mukwabo, Yèyè’s mmuswe bwa twètù kwikala badi baa minyiinyi ya bantu ne mikishi minù yà mashi’s.” Ki bateeleji bònsò kuumuka kuMushiyabo.

26 Kadi kuvwa nsangilu wa bambi bavwa Nende, wa bantu makumi mwandamutekete, bàvwà basungudiibwe. Ki Yèyè kubakudimukila, kwambaYe ne: “Nenwèlè meeji bishi panwamona Mwânà wa Muntu ùbànda uya kwakafumaYe?” Mpindyewu, Yèyè kaakumvwijaku aci to. Kaakumvwijaku ne *mbishi* to; Pòlò ngwákacyùmvwija pashiishe. Yèyè wakaCyamba anu cyanaana. Nwamonu anyi? Nenu bwa eci, Wákamba ne: “Nenwàmbè cinyi,” wàmbila biine bambi aba, “panwamona Mwânà wa Muntu ùbànda uya kwakafumaYe?”

27 Kakuyi mpatà to bantu abu baakamba ne: “Mpindyewu, anji indilabi kakese tǔng. Kaa, tudya Nende. Tulòba Nende. Tulààla Nende. Twètù’s—twètù’s tudi bamanye kutubo baMulelele. S’tutu bamone kalaalu kavwabo baMu—baMuladikile. Kadi mmunyi mùkaadi Muntu ewu . . . Edi diyi s’ndikole.”

28 Ne Bible mmwambe ne: “Kabaakenda kabidi Nende to.” BaakaMushiya.

29 Dìbà adi kushaalaYe ne dikumi ne babidi. Yèyè nguvwa musungule dikumi ne babidi abu, kadi umwe wabo uvwa démon, mwakambaYe. Ki kubakudimukilaYe.

Ne kakuvwa muntu nansha umwe uvwa mufwanyine kuumvwija civwaYe ufuma ku dyamba aci to. “Mmushindu kaayi wadyàbo Munyiinyi Wende ne kunwa Mashi Ende? Ne mmunyi mudiYe mutuuluke, paabo baMulelele anu pa buloba apa?” Nwamonu anyi? Kabavwa mwa kuCyumvwaku to.

Ki pashiishe kukudimukilaYe bapostolo, ki kwambaYe ne: “Nudi peenu baswe kuya anyi?”

30 Ki pa dìbà adi pàakambà Mupostolo Peetelo cishimbi-diyi aci ne: “Mukalenge, nkudi nganyi kutudi bafwanyine kuya?” Nwamonu anyi? “Bwalu twètù tudi basankishiibwe. Tudi bamanye ne ditwishiibwa dyònsò ne Wèwè, ne anu Wèwè nkaayeebe, ngudi ne Diyì dya Mwoyi dya dìbà edi.” Nwamonu

anyi? “Ne twètù tudi basankishiibwe bwa aci.” Nwamonu’s, kabavwaku mwa kuCyumvwija to. Bòbò. . .

Kwèna mwa kuumvwijaku diitabuuja to. Ncintu kampanda cyùdì witaabuuj, ne ncishindame mu mushindu wa kakuyiku cingà cintu cidi mwa kwangata kaaba kaaci to.

Ki bwa cinyi, bòbò bavwa bamanye ne Dìyì dyàkafùndiibwà bwa cikondo civwabo ne mwoyi aci adi, cikondo cya Maasiya aci, Yèyè nguvwa ukumbana mwaba awu anu menemene. Nenku mmunyi muvwabo mwa kwenza ne baalukile mu ekeleeziya ya mashika, ya bintu bya kwìsùkwìsù yikaavwabo bapatuke ayi? Yèyè ne: “Kutudi bafwanyine kuya ki kwèpi?” Nwamonu anyi? “Twètù tudi batwishiibwe menemene ne Wèwè ngudi ne Dìyì dya Mwoyi.” Nwamonu anyi? Nenku kabavwaku—kabavwaku mwa kuCyumvwija to, kadi bavwa baCìtàbùùje. Nwamonu anyi?

<sup>31</sup> Nenku Yesu wakamba aci bwa kuumusha lupela mu musumbà Wende awu, nwamonu’s, too ne paakafikaaYe ku dikungwija cisumbu aci. Nenku mu biine bantu bònsò abu, bòbò abu, anu dikumi ne umwe mbàakumvwà mu bulelela ne Yèyè uvwa Nganyi. Bààkamanya ne Yèyè uvwa Nzambi, ne Nzambi nkaayende. Mpindyewu, ba. . .

<sup>32</sup> Cyena-bwalu cyanyi mu dinda emu mbwa kusokolola, anyi, kubuulula mwine Nzambi awu.

<sup>33</sup> Nzambi misangu yònsò, mu cikondo cyònsò, ùtu anu musokome paanyima paa cibwikilu kampanda, bikondo byònsò, kadi Yèyè utu anu Nzambi dìbà dyònsò. Nwamonu anyi? Kadi Yèyè utu muDilame musokoka baa pa buloba, kadi uDisokolola kudi Basungula Bende, bu kudi bapostolo mu diine dituku adi. Mpindyewu, ùvwa n’Nzambi wakwila munda mwa Kilisto.

<sup>34</sup> Mpindyewu, muntu misangu yònsò, citu anu ngiikadilu wa muntu, ùvwa ukeba bwa kumona (mu mubidi ewu) Nzambi awu. Ùtu anu misangu yònsò muswe kuCimona. Muntu ukaadi mwenzenze bifukiibwa bidi bifwanangane Nende. Badi badicinkila. . .Ba-Indiens bavwa bakuukwila dìbà. Nenku—nenku tudi tujandula, mu Afrike, mmwenekelu mishiileshiilangane ya nyama, ne bikwabo. Nenku kùtu. . . mabaya a bimfwanyi mu Alaska, ne—ne mmwenekelu mishiileshiilangane yidibo badicinkila mu yòyì ayi ne ki mudi Nzambi usanganyiibwa. Bu mwàkaakulà Pòlò ku Atena kwaka cikondo aci, pa kakuna kaa Mars, ubambila ne bavwa ne diitabuuja dya majimbu pa bivwa bitangila Nzambi uvwa kayi mumanyike ewu, ne, bavwa bamanye ne Yèyè uvwaku kadi kabayi baMumanye to.

<sup>35</sup> Nenku tudi tusangana nansha bààlukila too ne ku cikondo cya Yobo. Yobo uvwa mumanye ne kuvwa Nzambi kampanda. Ùvwa mucimanye. Ne kakwenaku muntu wetu—wetu—wetu ewu, wa meeji mu òwò, kayi mumanye ne kudiku Cintu



kampanda mu mwaba kampanda to. Nenku, mpindyewu, Yobo uvwa ujinga bwa kuyiikilangana Nende.

Nenku ndi muswe bwa numone mmwenekelu uvwa Nzambi musungule bwa kwakwilamu ne Yobo. Nzambi uvwa mubwikila paakaakulaYe ne Yobo apu. Ûvwa mubwikila mu mvunda, ùpwekela mu mvunda. Nudi nwitabuuja ne Nzambi ucitu ulwila mu mvunda awu udi mwa kulwa mwaba unudi numona anyi? [Disangisha didi dyamba ne: “Amen.”—Muf.]

<sup>36</sup> Kudi bààbûngì basòmbe mwab’ewu, ndambu, bavwa neetu dituku adi pavwaYe mulwile mu mvunda. KutwambilaYe dituku kumpala, Mwaneetu Banks Woods ne bakwabo, paakambaYe ne: “Ambula dibwe edi, ùdyèlè muulu mu lupeepele, wâmbè ne: ‘EMU MMUDI MUKALENGE WAMBA! Nenucimone dyakamwe.’” Ki mêmè kwangula dibwe adi, ku lusongo lwa mukuna aku, kudyela muulu mu lupeepele, nenku...mu bushuwa bwa bwalu, mu kupweka kwadi, kujuuladi mvunda, nwamonu’s, dikoka dyadi dya lupeepele.

<sup>37</sup> Bikengela wêwè kwenza cintu kampanda bwa kwenza ne cintu kampanda cilonde. Yesu wakangata cipese cya dyâmpà e kucicibula, pashiishe kucivudijila pa cipese cya dyâmpà aci. KwangataYe mâyi, kuàpôngolwela mu mulondo. Eliya wakangata mukele, kuwela mu kâsù; kukosaye kaamuci, kukeela pa mâyi. Ncintu bwa kufwanyikija’s.

Nenku kwangula kwa dibwe adi ne kudyela muulu mu lupeepele, nenku mu kupweka ki kujuuladi mvunda awu.

<sup>38</sup> Dituku dyàkalondà, mona’s, kuvwa mwambi kampanda mwikàle neetu mu lwendu kampanda lwa ditwa dya buluwà. Ûvwa mwimane lwà pabwîpî naanyi, ki kungambilaye ne: “Mukalenge utu ufila bikeena-kumona paudi mupatuke mushindu ewu anyi, Mwaneetu Branham?”

<sup>39</sup> Mêmè ne: “Eyowa, kadi pa ciibidilu pântù mpatuka ndwa kuneeku mbwa kwikisha.” Nenku anu piine apu cikeena-kumona kumbà kulwaci.

<sup>40</sup> Nenku Mwaneetu Borders, ndi ngeela meeji ne ùdi pambelu mpindyewu, ùvwa neetu. Mwaneetu Banks Wood, ngeela meeji, ne, kaa, bààbûngì bàvwakù, mwandamukulu anyi dikumi. Ne Mwaneetu Banks Wood ukeba bwa kumona ciine eci. Anu pa mukuna menemene apu, bitangilangane, anu menemene, bu mu ntanta wa mêtres nkama mwandamukulu nanku awu ne mwaba uvwa Banjelo mwandamutekete bamwenekela awu, cîmvwà mmumukile apa muyiile kwine aku aci, mêmè kwalukila e kwambila... pa bidi bitangila Bitampi mwandamutekete. Anu bu mu ntanta wa mêtres nkama mwandamukulu ne mwaba mwine awu.

<sup>41</sup> Nenku pashiishe dituku dyàkalondà, pàvwà bwalu ebu munkaci mwa kwenzeka apu, mona’s, kùdi... Mêmè kwambila

mwaneetu, mwaneetu ewu, mêmè ne: “Lutatu lwebe ludi ne, udi ne disunsuma mu dîsù dyebe amu. Bangangabuka mbateete kukaadi bidimu bibidi bwa kuciimanyika kadi bapangile. Badi bamba ne wêwè neu-...necikudye dîsù dijima.” Ki mêmè kwamba ne: “Kadi kupampakanyi to, Mukalenge Yesu wâtù diitabuuja dyebe mushinga.” Ki kumacishaye cingoma cyende panshi. Ki mêmè kwamba ne: “Mamwêbè,” anu civwaye menemene ne civwa cimutacisha.

Ki yêyè ne: “Aci mbulelela.”

<sup>42</sup> Mwaneetu Roy Roberson wa mu ekeleeziya emu, ùvwa mwimane mwaba awu, ngeela meeji ne nwênù bônso nudi bamumanye. Bu mûmvwà mumanye ne yêyè uvwa nkolomu, ne bu mûmvwà mumanye civwà mwa kwenzeka, mêmè kumutenteka cyanza pa dikaaya; mêmè ne: “Mwaneetu Roberson, wikalè mudimuke, utabale, cintu kampanda cidid pabwîpi ne kwenzeka.”

<sup>43</sup> Mêmè kwalukila cyanyima e kuya mwaba wûmvwà ne cya kwimanyina, ki mu lupeepele kupatukamu mvunda, kupwekaye upicila mu lupongo kampanda, ufumina lwà kuulu, ùvwa munene wa dikema mu mushindu wa ne wâkapanda ne mbwebwe, too ne mu ndondo wa centimètres makumi abidi anyi makumi abidi ne itaanu, kuumukila ku lusongo lwa mukuna, uyikupa mu ntanta wa mètres matwe ku nkama yibidi ne kwine aku. Nenku kwelaci kâpatà misangu yisatu mushindu awu, ki Dîyî kupatukamu. Nwamonu anyi?

<sup>44</sup> Ne bwônso bwabo bavwa biimane mwaba awu. Mwaneetu Banks, udi mwab’ewu mpindyewu ewu, kuseemenaye e kwambaye ne: “Ki ciine cyûvwà mungambile makeelela aci anyi?”

Mêmè ne: “Eyowa’s, mukalenge, ki cyôci aci.”

Yêyè ne: “Mpindyewu, Cyămbî cinganyi?”

<sup>45</sup> Mêmè ne: “Mpindyewu, aci anu mêmè ngudi mwa kucimanya, Mwaneetu Banks, udi umona’s, bwalu civwa... Civwa cifwanyine kukwacisha bantu bwôwà.”

<sup>46</sup> Kadi Cyôci kutungunuka, kwenzekaci anu ndambu wa... cyase lwendu citangile ku nord. Ndambu, matuku ndambu paanyima Cyôci kudituuta mu mbû, nenku nuvwa bamone civwa cyenzeke mu nyungulukilu wa Fairbanks. Civwa ncimanyinu cya dilumbulwisha. Mpindyewu tudi tusangana ne—ne Nzambi uciidi anu... Nudi numona’s, civwa cifwayine kukwacisha bantu bwôwà. Nenku pashiishe bivwa bikengela bwa bôbò... Bivwa bikengela aci cyenzeke, nwamonu’s. Bidi bikengela anu cyenzeke. Bintu bidî ne cya kwenzeka abi bidi bikengela anu byenzeke, nansha bishi. Nwamonu’s, neciikalè anu mwa kwenzeka, nansha bishi.

47 Musangu kampanda Mòsà wakajinga kumona Nzambi, ki Nzambi kumwambila bwa kwimanyinaye pa lubwebwe. Nenku, pa lubwebwe apu, Mòsà kwimanayepu e kumonaye Nzambi upita mwaba awu, kadi nyima Wende uvwa mufwanangane ne nyima wa muntu. Nzambi uvwa mu mvunda, ne Nzambi... pavwa Mòsà mwimanyine pa lubwebwe apu.

48 Ngeela meeji ne nwênù bônso nuvwa bamone fôtô pààpa dituku adi, tuvwa biimane pabwipi ne lubwebwe lumwelumwe alu. S'ki Bukênkè abu mbwôbù ebu, Mwanjelo wa Mukalenge, anu mwaba mwine uvwa Ci cituucile kàpatà awu. Biimane... Mmulamika anu ku mboodi wa mamanyisha kwaka mpindyewu, cyakabidi.

49 Monaayi, Yehowah wa Dipungila Dikulukulu n'Yesu wa Dipungila Dipyadipy. Nwamonu anyi? Yèyè n'Nzambi umwèumwè awu, mwikàle ùshintulula anu mmwenekelu Wende cyanaana.

50 Mpindyewu, muntu kampanda uvwa wamba dituku adi, mwambi kampanda wa—wa—wa ba-Baptistes mu Tucson mwamwa ne: “Mmunyi mùdì mwa kwamba mùdì—mùdì Yesu ne Nzambi bafwanyine kwikala Mupersona umwepele?”

51 Mémè ne: “Ee, mbipeepele anu peepeelee bu wèwè anu mwa kuumushaku anu ngeelelu webe wèwè wa meeji awu, kadi wela meeji mu ngaakwilu wa Bible pa bwalu abu. Badi Kampanda umwepele. Nzambi udi Nyuma; Yesu uvwa mubidi uvwa Ye mudibwikile. Wamonu anyi?” Mémè ne: “Bu mudi mu dîkù dyanyi. Bwa mukajaanyi, mémè ndi bayende. Ne ntu ne mwanaanyi wa bakaji mutekete, Rebekah, mémè ndi tatwëndè. Kadi ndi ne mwikulwanyani wa balume, dyende m'Paul, mémè ndi kakwëndè. Ndi bay'a muntu, taatù, ne kaaku. Nenku mukajaanyi kèna ne bukenji kùndì bu ne ndi taatù anyi kaaku to; ùdì ne bukenji kùndì anu bu bayende. Nenku mwanaanyi wa bakaji kèna ne bukenji kùndì bu ne ndi bayende anyi kakwëndè to; yèyè mmwanaanyi. Wamonu anyi? Kadi nansha nanku bantu basatu bônso aba's badi anu muntu umwepele. Wamonu anyi? Ki Nzambi awu; Taatù, Mwànà, ne Nyuma Mwîmpè, bidi anu mmakenji a bipungu cyanaana.” Nzambi udi umwèumwè awu, Nzambi umwèumwè awu.

52 Nzambi uvwa mu Dishintulule, ùtu ushintulula mmwenekelu Wende. Bu nwênù mwa kumona mwaba ewu mu Filipoooyi emu, Yèyè mmwambe ne: “Kayi wela meeji bu cintu cya kunyenga to, kadi wakangata *mmwenekelu* wa muntu.”

53 Mpindyewu, mwaku wa cyena Gelika mwaba awu bwa *mmwenekelu* awu, ndi muwukebe makeelela awu dituku dijima, nteeta bwa kucinka ne uvwa ncinyi, ndi nsangana, mulwe ne mwaku ewu wa *en morphe*. Badi bawamba ku dileeta ku dileeta ne e-n m-o-r-p-h-e. Pâmvwà ntangila mu cyena Ngelika, bwa kujandula *en morphe* uvwa ncinyi... Ndi mwa

kuwushindumuna bibi, kadi cidi cyenza ne ngwāmbè ku dileeta ku dileeta, mbwa piikalabo bapatule mukaba wa mēyi, bantu, bamanyi baa mabàla, baamanya cīndi—cīndi muswe kwamba pa bwalu abu. Yēyè, padi *en morphe* awu, cidi cyumvwija ne WàkaDishintulula. Yēyè, Wàkatuùluka. Mpindyewu, mwaku wa cyena Ngelika awu mwaba awu udi wumvwija, ne: “Cintu kampana cidibo kabayi bafwanyine kumona to, kadi paaci ciikàlepù, kadi pashiishe cishintùlùke ne dīsù diikàle mwa kucimona.” Nwamonu anyi?

<sup>54</sup> Byenze muvwa Eliya, mu Dotana. Nwamonu’s, mu—musadidi awu kayi mwa kumona Banjelo bōnsò bavwa babanyungulukile kuntu kwōnsò aku abu to, kadi Nzambi kucishintulula anu cyanaana; kayi mutuulule Banjelo to, kadi Yēyè kushintulula mushindu wa kumona wà musadidi awu. Nenku ki mikuna ayi myùle tente ne Banjelo, ne kapyà, ne tubalu twa kapyà, ne makalu a mvita a kapyà, ku nyungulukilu kwōnsò kwa muprofeta Wende aku. Nwamonu’s, bōbò, Yēyè ngwākashintulula mushindu wa kumona. Ci—cintu cikaadiku mwaba awu.

<sup>55</sup> Pa nanku, cīndi nteeta bwa kwamba ncya ne, Nzambi uvwakù misangu yōnsò awu udi mwaba ewu. Cintu cimwepele cyakenzaYe paakalwaYe muntu apu, Wākashintulula cibwikilu Cyende cya kwīsù. Nwamonu anyi? Yēyè—Yēyè, *en morphe* ewu, Yēyè—Yēyè wakaDishintulula kuumuka ku civwaYe kuya ku cidiYe, anyi cibwikilu Cyende cya kwīsù, dinaya dikwabo.

<sup>56</sup> Byenze bu mu dinaya dinene. Mūmvwà ngamba mu dinda emu amu, ngambulula mu mushindu kampana pa bidi bitangila Shakespeare. Kukaadi ntanta mule. Kadi paakafunda Shakespeare diine—diine—diine dinaya adi, kùdì . . . bwa Mfumu James wa Angleterre, pavwaye . . . muntu wa mu dinaya Macbeth awu. Nwamonu’s, Shakespeare kavwa witabuuja ne baloji bàtukù to; kadi mu dinaya adi, bu muvwa mfumu yēyè witabuuja ne baloji bàtukù, nanku bivwa bikengela abwejemu bwalu bwa baloji. Nwamonu anyi? Nenku mpindyewu, bwa kwenza ciine eci, batu bashintulula mudimu wa mu dinaya.

<sup>57</sup> Becky mwab’ewu, mu *Carmen*, mbanaye dinaya adi mu—mu cilongelu mudiye ufuma ku dijikijila kukaadi mbingu yisatu emu. Mpindyewu, pāmwāpa muntu umwepele uvwa unaya myaba ya bantu babidi anyi basatu. Bwa kwenzaye ciine aci, ùvwa—ùvwa ùshintulula cibwikilu cyende cya kwīsù. Misangu mikwabo ùdì ùpātuka, mwikàle *ewu* muntu; kadi musangu ùdì ùlondà udiye upatuka, ùkaadi muntu mukwabo. Kadi ùdì anu yēyè muntu umwèumwè awu dībà dyōnsò.

<sup>58</sup> Nenku ki Nzambi awu. WàkaDishintulula kuumuka ku—ku Dikunji dya Kapyà, bwa kulwa Muntu. Pashiishe kuDishintulula kuumuka ku aci, kwalukila cyakabidi ku Nyuma, bwa Yēyè kumona mwa kusòmbela munda mwa muntu. Nzambi mwikàle

wenzela dinaya mu muntu civwaYe mwikàle bulelela. Yesu Kilisto, civwa n’Nzambi mwikàle wenzela dinaya mu Muntu, mu Muntu *kampanda*. Mu Muntu *kampanda*, ki civwaYe aci. Úvwa mushintuluke muumuke ku Dikunji dya Kapyà, nenku dîbà adi úvwa mubwele; civwà ciikàle cibwikilu mu cipeela, civwà cisokoke Nzambi kudi Izaleela. Mòsà wakamona mbungakeenu wa mubidi Wende, kadi mu bulelela Yèyè uvwa musokoka misangu yònsò paanyima paa Dikunji dya Kapyà, òvwa diikàle Logos uvwa mupatuke mu Nzambi.

<sup>59</sup> Mpindyewu tudi tusangana apa, mpindyewu kuumukila ku Mpenta, Nzambi kèna wenzela dinaya *mu* muntu, anyi wenzela dinaya. . . mpindyewu Údi wenzela dinaya *kupicila ku* muntu. Nwamonu anyi? Úvwa wenzela dinaya mwine musangu awu *mu* Muntu *kampanda*, Yesu. Mpindyewu Udi wenzela dinaya *kupicila ku* bantu badiYe musungule mu kiine kiipacila aku. Nzambi, mu mmwenekelu wa muntu, WakaDishintulula kuumuka ku mmwenekelu wa—wa. . . wa Nzambi, kulwa ku mmwenekelu wa muntu.

<sup>60</sup> Mmulwe mu mènà asatu, mènà asatu a mwànà. Mmulwe mu Mwànà. . . dîna dya Mwànà wa—wa muntu, Mwànà wa Davidi, ne Mwànà wa Nzambi; mènà asatu a mwànà.

<sup>61</sup> Mpindyewu, Wàkalwa musangu wa kumpala mu Mwànà wa Da- . . . Mwànà wa muntu, bwalu Úvwa Muprofeta. Mpindyewu, Yehowah Yèyè mwine uvwa ubiikila Yehezekele ne baprofeta ne: “Mwànà wa muntu, udi umona cinyi?” Yesu kaakaDiteelaku bu Mwànà wa Nzambi to; WàkaDitèèla bu Mwànà wa muntu, bwalu bwa—bwa Mifundu kayena mwa kunyangakajiiibwa nansha.

Kakwenaku cidi mwa kunyangakajiiibwa mu Mifundu nansha cimwe to. Dîyi ne Dîyi dyònsò didi ne cya kwikala anu nanku. Mushindu awu ki wúndi mèmè nciitabuuja. Mushindu awu ki udiDi ne cya kwikala, kí mbwalu ndi mèmè nciitabuuja to, mbwalu Dyôdi n’Dîyi dya Nzambi.

<sup>62</sup> Mpindyewu bu nwênù mwa kumona ku cibangidilu, Dîyi dimwepele, mu dibeki dya kumpala dya Bible, mu Genese 1, tudi tujandula ne kaabujima kaa. . . Masaama ónsò aa, tunynganyinga twònsò etu, masaama ónsò a myoyi aa, ne byònsò bikaadiku byenzekelenzekele bantu ebi, mbilwe bwalu muntu *umwepele* wakabenga kwitabuuja Dîyi *dimwepele*, ki kutwalaci byònsò ebi. Aku ki ku cibangidilu cya Bible. Ku ndekeelu wa Bible, Bwakabuulwibwa 22, Nzambi umwèumwè awu mmwambe ne: “Muntu yònsò wadidinga kuumushila Dîyi dimwepele ku Cyôci eci, anyi wasakidilaKu dîyi dimwepele awu.” Nwamonu’s, cidi ne cya kwikala Dîyi ku Dîyi, anu mudiDi amu.

<sup>63</sup> Pa nanku, ki bwa cinyi, nenku angantaayi anu kaacintu kakese mûngiikalà. . . muntu *kampanda* mwikàle misangu yònsò anu untacisha pa bidi bitangila bakaji badi babebula nsuki

yabo. Mpindyewu, bwanyi mêmè, padiciye anu wenza ciine aci, nansha yèyè mwikàle wenza maalu ne bunsantu bwa bishi ne mwikàle ne dimanya bûngì bishi, ùdi anu mupiile. Yèyè uvwala tuputulu ne bilàmbà ebi mushindu awu; cidiye wenza nansha ciikàle cinganyi, nansha yèyè mwa kwimba misambu bûngì bishi, nansha yèyè mwa kuyiisha bilenga bya bishi, cyònsò cidiye mufwanyine kwenza aci, nansha mwikàle ne nsòmbelu wa mushindu kaayi, cìdiku ncyà ne Dìyì dimwepele ndinyangakajiibwe. Nwamonu anyi? Nwamonu's, bikengela ciikàle anu Dìyì dyònsò. Kì ncyambilu to; Dìyì, Dìyì dimwepele! Pa nanku, Bible kî ngwa didyumvwijila paa nkaayeebe to. Ùdi ne cya kwikala Dìyì ku Dìyì, mushindu uDi difundiibwe awu. Tudi ne cya kwitabuuja Aci.

<sup>64</sup> Nanku kî ng'anu kuDìitabuuja nkaayaaku to, kuDileea mu nsòmbelu. Patwikala katuyi tuDileea mu nsòmbelu to, dîbà adi katwena baDìtábùùje to; tudi peetu twamba anu cyanaana mutudi biitábùùje. Bu mûmvwà...Pândi ngiimanyina pa bingâmbi, bayiidi abu kabavwa ne mushindu wa kuDyumvwija to, kadi bavwa baDìtábùùje, nansha bishi, ne baakenza ditonda dyabo ne baakaleea aci mu nsòmbelu. Paakuumuka bakwabo bònsò e kuDishiyabo, bôbò baakashaala naaDi! Bavwa baDìtábùùje! Mushindu awu ki utudi twenza. Mushindu awu ki ùdi ukengela wèwè kucyenza. Nansha cidi nî nganyi mukwabo wenza, twètù tudi tuDìitabuuja ne pashiishe twenza maalu bilondeshile Dyôdi adi. Wèwè kuyi ucyenza to, dîbà adi kwèna muDìtábùùje to.

<sup>65</sup> Mpindyewu monaayi mpindyewu paakalwaYe apu, bivwa bikengela bwa Yèyè kulwa bu Mwànà wa muntu, bwalu Mufundu Munsantu ukaavwa mwambe ne ki mwalwaYe: "Nzambi uvwa mwa kubajuudila Muprofeta." Pa nanku Yèyè kavwa mwa kulwa mwikàle uDibiikila bu Mwànà wa Nzambi to, bwalu kacivwa ng'aci cipungu to. Ùvwa Mwànà wa muntu mwikàle wamba ciprofeta, bwa kuuja, ne ubasokolwela bintu byònsò bivwa byenjiibwe, ne bivwa biikàle cifwanyikijilu cya civwaYe abi. Musangu awu Yèyè uvwa pa buloba bu Mwànà wa muntu.

<sup>66</sup> Tangilaayi numone mukaji wa beena Syrophénicie wâkanyeemena kudiYe awu, wamba ne: "Wèwè Mwànà wa Davidi, ngumvwilèku luse!" Kaakabandululaku nanshà mutu Wende to. Mukaji awu kavwa ne bukenji kudiYe bu Mwànà wa Davidi to. Yèyè uvwa wa baa Bisamba bya bende.

Anu mudibi ne mwanaanyi wa bakaji kèna ne bukenji kùndi bu ne ndi bayende to; anyi, mukajaanyi, bu ne yèyè mmwanaanyi wa bakaji to. Nansha mudibi ne, yèyè mmwanaanyi wa bakaji ne mukajaanyi, mmwanaanyi wa bakaji mu Evanjeeliyo. Kadi, bwa pa buloba ebu, yèyè kèna ne bukenji bwa kumbiikila bu—bu taatù to. Nwamonu anyi?

Mpindyewu monaayi, mukaji wa baa Bisamba bya bende ewu kavwa ne bukenji kudiYe bu Mwânà wa Davidi to. Kadi mpofo Baatimaayo uvwa yêyè naabu, nwamonu's, ùvwa yêyè mwena Yuda. Mpindyewu, Wàkalwa bu Mwânà wa muntu.

<sup>67</sup> Bikengela nwìkalè bamanye myaku eyi ne bintu ebi. Tangilaayi Hattie Wright musangu awu, wà Nkokelu Mwisâtù awu. Nudi bacivuluke's. Ku byònsò abi, mukaji awu wàkamba cintu civwa cijaalame. Bikengela wèwè kwamba díyì dijaalame adi, cintu cijaalame aci ucyaambila Nzambi.

<sup>68</sup> Monaayi mpindyewu, Wàkalwa musangu wa kumpala bu Muprofeta awu, ki kuMupoopelabo pa nkuruse. Bânà Baabo menemene ki bààkaMupoopelà pa nkuruse. Wàkalwa bu Mwânà wa muntu.

<sup>69</sup> Kadi paanyima paa Nyuma Mwîmpè mumane kulwa, Ûvwa díbà adi Mwânà wa Nzambi. Nzambi n'Nyuma. Ûvwa Nyuma Mwîmpè, Mwânà wa Nzambi. Mmusómbe mu bikondo bya ekeleeziya bu Mwânà wa Nzambi.

<sup>70</sup> Mpindyewu, mu Bukalenge bwa bidimu cinunu, Neikalè Mwânà wa Davidi, musómbe pa Nkwasa wa butumbi wa tatw'Éndè, Davidi. Yêyè m'Mwânà wa Davidi.

<sup>71</sup> Mpindyewu nenku, vulukaayi ne, pankaci paa Mwânà wa Nzambi. . . Mu cikondo cya Laodikiya, mbaMwele pambelu. Kadi mu Luuka, Yêyè mmwambe ne Neabuuludiibwe cyakabidi bu Mwânà wa muntu, Muprofeta, mwikàle uuja bikwabo bya cyôci aci. Nwamonu anyi? Mifundu mmiswikakane pamwe mu mushindu mupwangane. Mwânà wa muntu, Mwânà wa Nzambi, Mwânà wa Davidi. Civwa ncinyi? N'Nzambi umwèumwè awu díbà dyònsò, mwikàle anu ushintulula mmwenekelu Wende, *en morphe*. CidiYe mmumshintulule cyanaana. Ndinaya dinene Bwende Yêyè. Udi munkaci mwa kudinaya.

<sup>72</sup> Wàkalwa bu Mwânà wa muntu, Muprofeta. Mucyènzè anu menemene. Nansha mukaji mutekete awu mu mpekaatu wende yònsò awu, ku ciinà cya mâyi kwaka, wàkaMujingulula. Wàkamba ne: "Twètù tudi bamanye ne Maasiya ulwalwa, udibo babiikila ne Kilisto, cyôci aci ki cyenzaYe." Nwamonu's, wàkajingulula bwalu ùvwa Dimiinu didyànjlila kulongolola. Pa díbà adi yêyè. . .

Kadi paabi, bakwabo baabo kabaakaCijingululaku to. Kabavwa ne cya kujingululabo naaci to. Bavwa mu mpekaatu, anu kwònsò kwine aku.

<sup>73</sup> Bwalu, bwa bitupa bya dinaya Dyende, Yêyè udi ushintulula mmwenekelu Wende. Díbà adi Wàkalwa mu mmwenekelu wa Mwânà wa muntu.

Bwa cikondo cya balongolodi, Wesley, Luther, too ne kundekeelu, pashiishe tudi tujandula ne baakabibwejakaja bikole, anu mwakenza beena Izaleela, mu mushindu wa ne

paavuYe kumweneka mu matuku a ndekeelu, mu cikondo cya beena Mpenta, bu Nyuma Mwimpè, kuMubengabo. Mbenze cintu cimwecimwe cyakenza Izaleela aci.

Kadi cidiYe wenza ncinyi mpindyewu? Wàlukila bu Mwânà wa muntu. Ne pathiishe, kuumuka ku aci, Mwânà wa Davidi. Nudi numona mushindu utukaadi pabwîpi anyi? Mwânà wa muntu, Mwânà wa Davidi, Mwânà wa Nzambi. Mmubuuludiibwe mu matuku a ndekeelu bu Mwânà wa muntu, bilondeshile Maalaki 4, biprofeta bikwabo byônsò biikàle bikumbanyina dîbà edi. Kâciyi kabidi ukwata mudimu ne ekeleziya paanyima paa Yèyè. . . MbaMwele pambelu; pambelu, mwikàle ukookola ku ciibi. Dimiinu kampanda didyànjila kulongolola muntwamu, dicikàlemù. Ùdi ne cya kufika kudiye.

<sup>74</sup> Nenku Nzambi, mu muntu, ùkaavwa muDipongolole Yônsò. Yowela 2.28, tudi tujandula ne, Yèyè mmwambe ne: “Mémè nêmpogololè, mu matuku a ndekeelu, Nyuma Wanyi.” Mpindyewu, nwênù bamone mwaku mwaba awu, mwaku wa cyena Ngelika. Bidi mwa kwenzeka ne ngiikàlè mutupakanepu, kadi wûndi mémè mufwanyine kupeta. . .

<sup>75</sup> Bikengela nwikalaayi nutabaleela myaku. Anglais utu mîngà misangu ne dyumvwija pabidi. Anu mudi mwaku utudi twamba ne, “nzambi” awu. “Nzambi wakafuka mauulu ne buloba,” Genese 1. Kadi mpindyewu, mu Bible, mMwambe ne: “Ku cibangidilu Elohim.” Mpindyewu, Elohim, Anglais udi yèyè ubiikila ne “god,” kadi kacivwa menemene. . . *Elohim* . . . Cintu kana cyônsò eci’s cidi mwa kwikala nzambi, bilondeshile mwaku *god*; s’udi mwa kuvwija lupingu lulwa nzambi; udi mwa kuvwija piano wawa ulwa nzambi; udi mwa kuvwija cintu kana cyônsò eci cilwa nzambi.

<sup>76</sup> Kadi kabyena nanku mu mwaku *Elohim* to; Wôwò udi wumvwija ne, “Ewu udiku ku Yèyè mwine.” Nwamonu anyi? Piano wawa kêna mwa kwikalaku ku yèyè mwine to, cintu nansha cimwe kacyna mwa kwikalaku ku cyôci ciine to. Pa nanku, mwaku *Elohim*, udi wumvwija ne, “Ewu utu mwikàlekù misangu yônsò.” *Nzambi* udi mwa kuumvwija cintu kana cyônsò. Nudi numona dishiilangana mu mwaku awu anyi?

<sup>77</sup> Mpindyewu, padiCi cyambe apa ne Yèyè mmuDishiye *munda mutupu*, anyi *mupongolole*, mpindyewu, tudi bafwanyine kwela meeji nanku ewu, ne Yèyè “mmulùke,” mwaku wa mu Anglais wa *emptied* [mushiye munda mutupu—Muk.], anyi *poured* [mupongolole] mupatule munda Mwende, nwamonu’s, cintu kampanda cipatuke munda Mwende civwà cishiilangane Nende. Kadi mwaku *kenos*, mu cyena Ngelika, kawena wumvwija ne Yèyè uvwa “mulùke” to, anyi ne. . . diboko Dyende ndyumuke, anyi ne disù Dyende ndipatuke, muntu mukwabo wa patupu to.

<sup>78</sup> Mbwena kwamba ne, Yèyè mmuDishintulule, Yèyè “muDipongolole mu,” (Amen!), mu cibwikilu cikwabo, mu



mmwenekelu mukwabo. Kí nne muntu mukwabo wa patupu mmupatuke mu Yèyè, mwikàle ubiikidiibwa ne Nyuma Mwimpè to, kadi Civwa n'Yèyè anu Yèyè mwine. Nwacyũmvù anyi? Yèyè anu Yèyè mwine ngwâkaDipòngolola munda mwa bantu. “Kilisto munda mwenu!” Mushindu mwine udibi bîmpè, mushindu mwine udibi bilenga bilaya's we, pa kwela meeji ne, Nzambi uDipongolola Yèyè mwine munda mwa muntu, munda mwa mwena kwitabuuja. “Kupongolola!” Civwa ncutupa cya dinaya Dyende, kwenza kwa nanku awu.

Nzambi, kaabujima kònsò, Bunzambi bwònsò mu ciikadilu cya mubidi buvwa mu Mupersona ewu, Yesu Kilisto. Yèyè nguvwa Nzambi, ne Nzambi nkaayende. Kayi mupersona mwisâtù anyi mupersona mwibîdì, anyi mupersona wa kumpala to; kadi Mupersona *awu*, Nzambi mubwikila mu mubidi wa buntu.

<sup>79</sup> Timote wa Kumpala 3.16: “Kakuyi dikokangana to bwalu busokoka bwa difwana dya Nzambi mbunene; bwalu N-z-a-m-b-i, Elohim,” N-z-a-m-b-i ne dileeta dinene, mu Bible. Alukilaayi ku cyòci aci, muntu kana yònsò. Cidi cyamba, mu mfundilu wa ku cibangidilu, nCyambe ne: “Elohim.” “Ku cibangidilu, Elohim.” Nwamonu anyi? “Nenku, Elohim, kakuyi dikokangana to bwalu busokoka bwa Elohim mbunene; bwalu Elohim wakavwijiibwa mubidi, ne twètù twâkaMulenga.” Elohim, mubwikila mu mubidi wa buntu! Yehowah munene uvwa muuje cibwashibwashi cyònsò, bikondo byònsò, ne myaba yònsò awu, wakavwijiibwa muntu. TwâkaMulenga, Elohim. “Ku cibangidilu, Elohim. Ne Elohim wakavwijiibwa mubidi, wâkasomba munkaci mwetu.”

<sup>80</sup> Cinyi? Ki mushindu Wende ngwòwò ewu, tutupa twa dinaya. Ki mushindu udibi bikengela Yèyè kudinàya, mushindu Wende wa diDibuulula kutudi byenze bu muntu kampanda mushiilangane. Twètù tudi baa cifwaka, ne Yèyè mmumanye ciine aci. Ne tudi tuumvwa anu bu baa cifwaka. Tudi tumanya anu bu baa cifwaka. Tudi tumanya anu padi byumvwilu byetu bitupa mushindu wa kumanya, kadi bwa bikwabo bidi bikengela bwa twètù kubiitabuuja ku diitabuuja. Bikengela twâmbè ne kudi Nzambi kampanda; nansha twètù baMumone, anyi to, tudi tuciitabuuja, nansha bishi. Nwamonu anyi? Nansha ciikàlekù anyi kaciyiku, tudi anu tuciitabuuja bwalu Nzambi ngudi mucyâmbè.

<sup>81</sup> Bu Abraham, kavwa mwa kumona mwânà wa balume awu to, kakuyi bimanyinu, anyi difu dya—dya Sarah, anyi mene bikondo bya mukaji uya ku mashi anyi nî ncinyi, kadi nansha nanku Nzambi nguvwa mwambe. Ditekemena dyònsò, nansha matrice ende—ende miine akaavwa mafwe, ne mwoyi wa bulume munda mwende ukaavwa mufwe, ne musulu wende wa—wa mwoyi ukaavwa mukame, ne mwoyi wende pende wa—wa bukaji ukaavwa mukame munda mwende. “Kadi nansha nanku

kaakatenkakanaku ku mulayi wa Nzambi ku bupidya to, kadi ùvwa ne dikanda, ùfila butumbi, mumanye ne Nzambi uvwa ne bukole bwa kwenza cintu kana cyònsò civwaYe mwambe ne Neènzè.”

Ki mushindu udi ukengela twètù kwitabuuja Dìyì adi leelu ewu ngwòwò awu. Nebiikalè bishi? Ncyèna mumanye. Nzambi ngudi mwambe ne nebiikalè mushindu awu, nenku aci's ncikose bwalu.

<sup>82</sup> Mupersona munene udi kayi umweneka ewu nganyi? Ewu nganyi Uvwa Abraham mumonemone mu bikeena-kumona? Kadi, kundekeelu menemene, Yèyè kumweneshiibwa mu mubidi, kumpala kwa mwànà awu kulwaye. Nzambi Yèyè mwine wakalwa kudi Abraham mu mmwenekelu wa muntu, ku cikondo cya nshiikidilu. Mumweneshiibwe! WakaMumona mu kaaBukènkè kakese musangu kampanda; wakaMumona mu bikeena-kimona; wakumvwa Dìyì Dyende; mabuulula àbùngi. Kadi anu kumpala menemene pabwìpì ne mwànà mulaya, wakaMumona mu mmwenekelu wa muntu, ne wakaakula Nende, ne wakaMupa byakudya bya munyiinyi ne byakunwa. Nwamonu anyi? Monaayi, Nzambi Yèyè mwine mubwikila mu mubidi wa buntu.

<sup>83</sup> Eci ncutupa cya mushindu Wende awu. Ewu ki mushindu udiYe uDimwenesha kutudi, ùmwènesha Dìyì dya Cyendelele, Nzambi, Yehowah muvwijiibwe mubidi. Bu mu Yone Munsantu 1: “Ku cibangidilu kwakadi Dìyì, ne Dìyì dyakadi ne Nzambi, ne... Ku cibangidilu kwakadi Elohim, ne Elohim wakadi... wàkalwa Dìyì, ne Dìyì dyakadi Elohim. Ne Dìyì dyakavwijiibwa Elohim.” Nwamonu anyi? Cidi ncintu cimwecimwe aci, ciikàle anu cidivungulula cyanaana.

<sup>84</sup> Bu mudi cyambiibwa, nwamonu's, cidi mu Nzambi. Cyambiibwa mmeji ebe. Nzambi ku cibangidilu, Wa Cyendelele awu, Yèyè kavwa nansha Nzambi to. Ùvwa Wa Cyendelele. Yèyè kavwa nansha Nzambi to; *Nzambi* udi “cintu cya dikuukwila,” anyi cintu kampanda. Nwamonu anyi? Pa nanku Yèyè kavwa nansha ciine aci to. Yèyè uvwa Elohim, Wa Cyendelele. Kadi munda Mwendè muvwa meeji kampanda. Ùvwa muswe kulwa mumweneke. Nenku Wàkenza cinyi? Dìbà adi kwambaYe Dìyì, ki Dìyì kulwadi dimweneke. Ki cimfwanyi mu kaabujima ncyôci aci, kuumukila ku Genese too ne ku Bwakabuulwibwa. Kamwena cya mafi nansha cimwe to. Ng'Elohim mwikàle ùlwa mumweneke bwa wamona mwa kulengiibwa ne byanza, umvika ku byanza. Nenku mu Bukalenge bwa bidimu cinunu, ki Elohim udi musòmbè pa Nkwasa wa butumbi wawa, nwamonu's, ncyà bushuwa, ne bantu Bende bònsò baMunyungulukile, bavwaYe mudyanjile kulongolola kumpala kwa difuka dya dyulu ne buloba abu.

<sup>85</sup> Byenze mudi muntu mwikàle wibaka ngonga ya myadi milondangane anyi ulongolola ngonga ya myadi milondangane, mufwimbi awu. Bikengela bwa ngonga ne ngonga adile bishiilangane ne mukwabo. Byamu bimwebimwe, kadi cyamu cifiike búngì kampanda, cyamu cifiike cipeepele búngì kampanda, cyamu cya kabanda búngì kampanda, bwa kumupa “mwadi” awu.

<sup>86</sup> Ki mushindu uvwa Nzambi mwenze. Wàkasambakaja ewu ku wawa, ku ewu ne ku wawa, ku ewu ne ku wawa, too ne mwakalwaYe kupeta anu menemene civwaYe ukeba. Mushindu awu ki wakatuulukaYe panshi apa. Nzambi kuDibuulula mu Dikunji dya Kapya mwikàle upwekela ku baprofeta, pashiishe kubwela mu Mwànà wa Nzambi, uvwa ne, Yèyè uvwa Nzambi. Nwamonu’s, n’Nzambi umwèumwè awu mwikàle upatula anu menemene, kuumuka ku bupwangane kuya ku bupwangane, kuumuka ku butumbi kuya ku butumbi. Mushindu awu ki udi Ekeleeziya wenda uya.

<sup>87</sup> Monaayi, mu bikondo, mushindu umweumwe awu, ku baprofeta Bende, nkudiYe muDibuulwile. Bòbò abu kabavwa anu menemene baprofeta to, bavwa banzambi. Yèyè ngudi mwambe nanku. Bwalu, civwabo bamba civwa Dìyì dya Nzambi. Bòbò bavwa musunya uvwa Nzambi mudibwikile. Bavwa banzambi. Yesu wakamba, Yèyè mwine, ne: “Mmunyi munudi mwa kuMpiisha Mèmè pàndì ngamba ne Ndi Mwànà wa Nzambi, pàndì mikenji yenu miine yamba ne aba bavwa Dìyì dya Mukalenge dilwa kudibo bavwa banzambi?” Nwamonu anyi?

<sup>88</sup> Nenku uvwa n’Nzambi mubungakaja mu muntu mwikàle ubiikidiibwa ne mmuprofeta. Nwamonu anyi? Nenku Dìyì dya Mukalenge divwa dilwa kudi mwine muntu ewu, mu mushindu wa ne kacivwa mmuprofeta awu to; muprofeta uvwa ncibwikilu, kadi Dìyì ndivwà Nzambi. Dìyì dya yèyè muntu awu kadyakwenza bwalu mushindu awu to. Nudi numona cìndi muswe kwamba anyi? Kadyena mwa kwenza bwalu mushindu awu to. Kadi mu mushindu mushaadile civwa n’Nzambi. Nwamonu’s, Yèyè uvwa Dìyì dya Nzambi mu mmwenekelu wa muntu, ubiikidiibwa ne “muntu.”

Monaayi, kacyakacya Yèyè katuku mushintulule ngiikadilu Wende to, anu mmwenekelu Wende. Ebelu 13.8, mmwambe ne: “Yèyè udi umwèumwè awu makeelela, leelu, too ne kashidi.” Pa nanku Yèyè kaakashintulula ngiikadilu Wende paakalwaYe to. Yèyè udi anu Muprofeta awu misangu yònsò, mu cikondo cyònsò, cintu cimwecimwe aci: Dìyì, Dìyì, Dìyì, Dìyì. Nwamonu anyi? Yèyè kêna mwa kushintulula ngiikadilu Wende to, kadi Wàkashintulula mmwenekelu Wende. Ebelu 13.8, mmwambe ne: “Yèyè udi umwèumwè awu makeelela, leelu, too ne kashidi.” Wàkashintulula anu cibwikilu Cyende cya kwìsù.

<sup>89</sup> Anu mûndi mushintuluke kuumuka ku bu bay'a muntu, pààkalediibwà mwanaanyi, dîbà adi nkaadi taatu. Paalu mwikulwanyi kulediibwa, nkaadi kaaku. Nwamonu anyi? Kadi, ncyêna nshintuluka to; nshidi anu—anu mêmè awu. Nwamonu anyi? (Nenku ki Nzambi nyawu.) Mbyenze anu ne ndi mushintulule wanyi. . . Nwamonu's, kudi anu kushintulula kwa mmwenekelu webe cyanaana. Nwamonu anyi?

Monaayi. Nenku bufuki budi bumushintulula kuumuka ku bunsonga kuya ku muntu mushindame, too ne ku muntu mukulakaji. Kadi's ki bwalu mbwôbù abu, nwamonu's, wêwè udi ushintulula anu mmwenekelu webe cyanaana.

<sup>90</sup> Mpindyewu, kwêna mufwanyine kwamba nsongalume mutekete mwimane mwab'ewu, wa bidimu dikumi ne bisambombo, kwamba ne nkaaku to. Kî mmufwanyine kwikala aci to. Bikengela mmwenekelu wende ashintuluke. Ndambu wa bidimu udi umushintulula, dîbà adi udi ulwa kaaku. Nudi numona cîndi muswe kwamba aci anyi?

<sup>91</sup> Kadi m'Mupersona umwèumwè awu dîbà dyônsò, Mupersona umwèumwè awu, Nzambi dîbà dyônsò. Mu mushindu ewu ngudiYe uDibuulula kudi bantu Bende, mu kwenza kwa cyôci eci. Monaayi, mu cikondo cyônsò cya Dikunji dya Kapya aci, WàkaDibuulula kudi bantu Bende. Mu cikondo cya—cya Yesu, WàkaDibuulula kudi bantu Bende. Mu cikondo cya Nyuma Mwîmpè, bu Mwânà wa Nzambi. Mwânà wa Davidi. . . Yêyè utu anu uDibuulula misangu yônsò mu mushindu awu kudi bantu Bende, wenza ne bantu baMumanye. Yêyè mmubwikila paanyima paa cintu kampana, monaayi, mu mushindu umweumwe awu, anyi mu ngiikadilu umwèumwè awu, musangu wônsò.

<sup>92</sup> Nzambi mubwikila mu Yesu, bwa kwenza mudimu wa bupikudi ku nkuruse. Nzambi kavwa mwa kufwa to, bu Nyuma. Yêyè ngwa Cyendelele. Kadi bivwa bikengela bwa Yêyè kuvwala cibwikilu cya kwîsù bwa kwenza citupa cya dinaya cya lufu. Wàkafwà anu cya bushuwa, kadi Kavwa mwa kucyenza mu mmwenekelu Wende wa Nzambi to. Bivwa bikengela bwa Yêyè kucyenza mu mmwenekelu wa Mwânà, bu Mwânà wa muntu, pa buloba. Nwamonu anyi? Bivwa bikengela Yêyè kwikala mu mmwenekelu wa Mwânà. Pashiishe paakaalukilaYe dya Mpenta, Úvwa cyakabidi Mwânà wa Nzambi. Nudi numona cîndi muswe kwamba anyi? Nudi bumvwe mmwenenu awu anyi? Yêyè uvwa . . .

<sup>93</sup> Bivwa bikengela Yêyè kulwa mu mubidi wa buntu, bwa. . . nenku muntu nansha umwe, kakuyi dijinga dya disangila dya mulume ne mukaji to. Bwalu aci cidid cijaadika cyakabidi dîyi dyetu ditudi bambe pa dimiinu dya nyoka, nwamonu's, "disangila dya mulume ne mukaji," kakuyi mpatà to anu disangila dya mulume ne mukaji. Kaciyi bimuma bya pommes

to; disangila dya mulume ne mukaji! Ncya bushuwa. Bivwa bikengela kwikalaci cyôci aci. Monaayi mwab'ewu, nwamonu's, bwalu muntu mwîmpè kana yônsò ewu. . . Tangilaayi baprofeta baa kale abu, kadi bivwa bikengela Yèyè kwikala mutambe muprofeta. Nwamonu anyi? Bwa kwenza ciine aci, bivwa bikengela Yèyè kuvwila ku dilediibwa dya kudi virgo, bileeja ne dilediibwa dya kudi virgo adi divwa dijaadika. . . Bivwa bikengela Yèyè kulediibwa kudi virgo, bwa kuumusha mulawu, Ncipaja-mulungù awu. Nudi numona cîndi muswe kwamba aci anyi? Pa nanku, bivwa bikengela ciikàle disangila dya mulume ne mukaji. Yèyè wakacijaadika ku dilwa Dyende Yèyè mwine; Yèyè kaakalwa ku dijinga dya disangila dya mulume ne mukaji to, kadi ku dilediibwa dya kudi virgo. Nenku Wakashintulula cibwikilu Cyende cya kwîsù kuumuka ku Yehowah kuya ku Yesu, bwa kwangata mudimu wa bupikudi mu dinaya divwaYe munkaci mwa kunaya adi, mu Nzambi ku nkuruse.

<sup>94</sup> Beena Ngelika baakaswa bwa kuMumona. Mu Yone Munsantu 12.20, bààbûngì baa kunudi bakaadi bangumvumvwe nyiisha pa cyôci aci ngamba ne: “Bakalenge, tudi tujinga kumona Yesu.” Nuvwa bamone aci anyi?

<sup>95</sup> Mpindyewu, beena Ngelika abu bavwa bamanyi baa mabàla, bavwa bantu banene. Kabidi bavwa ne—bavwa ne—dijinga dinene bwa Nzambi, muvwa Pòlò ubayiisha pa kakuna kaa Mars apu. Kabidi bôbò, bôbò—bôbò mbavwa baleeji baa dikàsà—baleeji baa dikàsà bwa buloba bujima mu maalu a mamanya ne—ne a bulongeshanganyi, bavwa bantu banene. Kadi bavwa bakuukwila ne biitabuuja miyiiki mikwatakaja ne bintu bya nanku awu, mikanda ya dyenza dya mpingu ne bimfwanyi ne mpingu ne bimfwanyi biine abi bya bikoka ntema, ne bikwabo.

<sup>96</sup> Kadi baa—baa—baakalwa bajuukile kuulu bwa Muntu ewu Uvwa mwa kwondopa babeedi ne kudyanjila kwamba maalu àvwà ènzekà, pyòpyopyò. Ki bôbò kulwa bajuukile kuulu, pa nanku kulwabo bwa kuMumona. Mpindyewu, tangilaayi ne ntema mpindyewu, eci kacinupiciku to. Nwamonu anyi? Ke kulwabo ne kwambilabo Filipino, uvwa wa mu Beteseda awu ne: “Mukalenge, tudi tujinga kumona Yesu.” Ki Filipino ne muyiidi mukwabo kuyabo nende kudi Yesu, bwa kumona Yesu.

<sup>97</sup> Mpindyewu monaayaaku mèyì mene akabandamuna naawu Yesu, bwalu bôbò bavwa balwe kumona ne Yèyè uvwa Nganyi, kadi kabaakapenta mushindu wa kuMumona to. Baakamona mmwenekelu, kadi Yèyè uvwa mu ntempelu Wende. Nzambi uvwa mu ntempelu Wende, mubwikila mu mubidi wa buntu. Monaayi mèyì akambaYe: “Lutete lwa blé lwôlò kaluyi lumate mu buloba, nwamonu's, ne kaluyi lufwe to, ludi lushaala nkaayaalu.” Nwamonu anyi? “Dìbà dyamanyi kulwa, nedilwe kataataka dyatumbishiibwa Mwânà wa muntu, nwamonu's, nenku Udi ne cya kuumuka pa buloba ebu. Nenku diine dìbà adi

kadiyi dilwe to, kanwakupetaku mushindu wa kuCimona to.”  
Nwamonu anyi?

<sup>98</sup> Mwab’ewu, bwa cinyi kabavwa mwa kumona Yesu? Ùvwa mujike cibwikile kwìsù. Nzambi uvwa mujike cibwikilu kwìsù. Beena Ngelika bavwa bakebaku Nzambi kampana, s’ki Yèyè ewu, kadi kabavwa mwa kuMumona to bwa cibwikilu. Nenku ncintu cimwecimwe aci leelu ewu, kabeena mwa kuMumona to bwa cibwikilu. Cidi pa mpala yabo. Beena Ngelika aba bavwa bababwikile kwìsù, anyi Yesu nguvwa mubwikila kwìsù bwa beena Ngelika aba.

<sup>99</sup> Monaayi, Wàkabàmbila ne: “Lutete lwa blé elu lwòlò kaluyi lumate mu buloba to, ludi lushaala nkaayaalu.”

<sup>100</sup> Bòbò, kabavwa mwa kuumvwa ne mmunyi, ne mbwa cinyi kabavwa mwa kuMumona to. Muntu nyawu uvwa mwimane mwaba awu. Bòbò bavwa balwe bwa kumona Nzambi, kadi kumonabo muntu. Nwamonu anyi? Kabavwa mwa kumona Nzambi to bwalu Nzambi uvwa mubwikila bwabo bòbò. Mpindyewu shalaayi bakwàtea aci mu lungenyi, Nzambi uvwa mubwikila mu muntu. Bavwa mwa kwamba ne: “Muntu nansha umwe kî mmufwanyineku kwenza ebi byenzedi to anu mwikàle Nzambi. Muntu nansha umwe kèna mwa kucyenza to, kadi muntu’s nyèyè ewu mwimane apa kadi nansha nanku byenzedi bya Nzambi bimweneshiibwa kudiYe!” Nwamonu’s, kabavwa mwa kuumvwa ne Nzambi uvwa mubwikila to.

<sup>101</sup> Yèyè mmubwikila mu muntu, anu muvwaYe mubwikila misangu yònsò amu. Kadi, Ùvwa mubwikila bwabo bòbò, Ùvwa mu ntempelu Wende wa buntu. Nzambi uvwa mu ntempelu wa buntu. Mpindyewu, nwikalè badimuke bikole, mpindyewu Yèyè udi umwèumwè awu makeelela, leelu, too ne kashidi. Nwamonu anyi? Nzambi mubwikila, usokoma Yèyè mwine baa pa buloba, mubwikila mu muntu. Nwamonu anyi? S’ki Nzambi ewu uvwa mwaba awu! Beena Ngelika abu bamba ne: “Tudi tujinga kuMumona.”

<sup>102</sup> Ki Yesu kwamba ne: “Bikengela lutete lwa blé lumate ne lufwe.” Bikengela ufwe ku mmwenenu yebe yònsò ayi. Bikengela upatuke mu meei ebe wèwè awu awu.

Mushindu uvwa bayiidi abu, kabavwa mwa kuumvwija pa bivwa bitangila kudya kwa mubidi Wende ne—ne kunwa kwa mashi Ende to, kadi, nwamonu’s, bakaavwa bòbò bamane kufwa ku bintu abi. Bavwa bafwe ku Dìyì dikulu kampana, bavwa bafwe bwa Kilisto. Nansha ciikàle cinyi, anyi muvwabi bimweka bu ne Yèyè uvwa mucimunyiibwe amu, bòbò bavwa anu baCitàbùùje nansha bya munyi. Nwamonu anyi? Bavwa mwa kumona munda mwa Muntu awu; Muntu mwikàle udya, unwa, uloba, ulaala, ne bikwabo byònsò, mulediibwe pa buloba apa, ne wèndakana naabo, ùyiikila naabo, ùvwàla bilàmbà anu mudi bantu bònsò amu, kadi mwikàle Nzambi.

103 Pa nanku beena Ngelika abu kabavwa mwa kuMumona to, bwalu Ùvwa musokome ku mèsù kwabo, mu muntu. Monaayi Dîyì Dyende kudibo: “Lutete lwa blé elu lwôlò kaluyi lumate mu buloba to.”

104 Nzambi mubwikila mu mmwenekelu wa muntu, muDisokoke ku dimona dyabo. Bavwa mwa kumona anu muntu. Kadi Badyànjila kulongolola abu baakamona bôbò Nzambi. Ewu umona muntu, mukwabo yèyè umona Nzambi. Nwamonu anyi? Nenku ùvwa n’Nzambi mubwikila mu muntu, mwikàle wenza ne bônso babidi abu biikàle babinge, kadi diitabuuja dyebe mu cyùdì kuyi umona aci. Udi uciitabuuja, nansha bya munyi. Nzambi mubwikila mu muntu. Ùvwa mu mubidi awu, ne mubidi awu nguvwa cibwikilu Cyende. Cilàmbà cikudika cyakapandika, nwamonu’s, bwa Nzambi wamona mwa kumweneshiibwa.

105 Mu Dipungila Dikulukulu, Nzambi uvwa musokoka pavwaYe pa nkwasa Wende wa ngàsà; pa nkwasa wa ngàsà, kùdì cilàmbà cikudika. Mu Dipungila Dikulukulu, Nzambi uvwa mu ntempelu Wende. Kadi bantu bavwa balwamu ne bakuukwila mushindu ewu, kadi, vulukaayi ne, kuvwa cilàmbà cikudika (amen) civwà cisokokà Nzambi. Bavwa bamanye ne Nzambi uvwa muntwamu. Kabavwa mwa kuMumona to. Dikunji dya Kapyà adi kadyakamwenekaku kabidi muntwamu to. Nukaavwaku bamone anyi? Kakwena musangu nansha umwe mu Mifundu, kubangila musangu wakabwela Dikunji dya Kapyà adi paanyima paa cilàmbà cikudika aci awu, ukaavwaDi dimwenekeku cyakabidi to, too ne paakalwaDi difumine kudi Yesu Kilisto apu. Nzambi uvwa mubwikila!

106 PaakiimanaYe pa buloba, Wàkamba ne: “Ndi mufume ku Nzambi ne Ndi nya ku Nzambi.”

107 Pashiisha Pòlò, (paanyima paa lufu Lwende, dijiikiibwa, ne dibiika dya ku lufu), wenda uya mu njila wa ku Damaseke, ki Dikunji dya Kapyà adi cyakabidi. Divwa cinyi? Dipatuke paanyima paa cibwikilu! Butumbi kudi Nzambi’s we!

108 Ùvwa munda amu paanyima paa cilàmbà cikudika. Mpindyewu Ùvwa paanyima paa cinyi? Paa cilàmbà cikudika cya biseba. Nwamonu’s, “biseba bya tusengelanshimba,” paanyima paa cilàmbà cikudika. Kadi pàakapandikà cilàmbà cikudika aci dituku dya dipoopediibwa dya pa nkuruse, cibwikilu civwaYe mukuciibwemu cyakapandika mu dituku dya dipoopediibwa dya pa nkuruse adi, nkwasa wa ngàsà mu kaabujima wakashaala mumweneke patooke.

109 Mpindyewu, beena Yuda kabavwa bafwanyine kuumvwa ne mmunyi mudi Nzambi mufwanyine kuleeja luse kudi cisamba cibiipe, cikooyike bu twètù aba to. Kadi kabavwa mwa kumona Yèyè mwine Uvwa uleeja luse ewu to, bwalu Ùvwa musokoka.

Ûvwa paanyima paa nkwasà wa ngàsà, lwà munda, ne biseba bya tusengelanshimba bilebelele, biMubwikile. Kumpala . . .

<sup>110</sup> Kumpala, muntu nî nganyi nî nganyi mudidinge mubwele paanyima paa cilàmbà cikudika aci, civwa ndufu lwa cikàdi. Amen. Kaa, netwikalè mwa kupeta dileesona mwab'ewu mu katanci aka, nwamonu's, bu nwènù mwa—bu nwènù mwa kuCyakidila. Kubwela paanyima paa biseba abi. . . Nansha mùvwà umwe wa ku bânà baa balume baa mwakwidi wâkateeta kucyenza musangu kampanda, s'wàkafwa. “Kanuyi paanyima paa cilàmbà cikudika aci to.” Muntu uvwa uya paanyima paa. . . Bwa cinyi? Kakuvwa kwanji kwikala bupikudi to, mu cyôci aci. Buvwaku mu mushindu mushaadile. Buvwaku anu mu mushindu mushaadile. Ne cintu cyônsò cya *mu mushindu mushaadile* kî ncyanji kwikala cintu cya menemene to, nwamonu's, cidi anu mu mushindu mushaadile. Buvwa mbupikudi. . . Mpekaatu uvwa mubwikila, kayi muumusha to. . . mulekelediibwe's we, eyo, kayi mulekelediibwe to. *Mulekelediibwe* mbwena kwamba ne “kushipa dibaka kadi kwipata.” Nenu mashi a mikooko ne a mbuji kaàvwaku mwa kwenza aci to, pa nanku Yehowah uvwa musokoka paanyima paa cilàmbà cikudika. Mpindyewu, paanyima paa cilàmbà cikudika eci pavwaYe musokoka apu, kubwelamu, muntu uvwa udishinda ufwa cikàdi, bwa kuteeta kubwelaMu.

<sup>111</sup> Kadi kubangila anu dya Mpenta, kubangila anu pa Dipoopediibwa dya pa nkuruse, pààkapandikà cilàmbà cikudika aci kuumukila kuulu too ne kwinshi, bwa lukongo alu. . . Yesu nguwwa Nzambi awu, mubwikila. Kadi paakafwaYe ku Kalvariyo, Nzambi kutuma kapyà ne mukenyi, ne wakapanda cilàmbà cikudika aci kuumukila kuulu too ne kwinshi, bwa nkwasà wa ngàsà yônsò ashaale mumweneke patooke. Kadi bôbô bavwa batambe kufofoma bya kabayi mwa kuCimona. Bu mwakamba Môsà mwab'ewu, nansha nanku, anyi. . . Pòlò ngwâkamba, bwa dibala dya Môsà ne: “Padibo babala Môsà, too ne mpindyewu, cilàmbà cikudika aci cidi anu pa myoyi yabo.” Kaa, mwaneetu wa balume, mwaneetu wa bakaji, s'ki cyakenza beena Yuda pààkapandikà cilàmbà cikudika aci ne kushiya Nzambi mumweneke patooke, mukudika ku nkuruse. Yèyè's wakashaala mumweneke patooke, kadi bôbô kabayiku mwa kuCimona.

<sup>112</sup> Mbifwanyine kwenzeka ne baa Bisamba bya bende biikàle benze cintu cimwecimwe aci anyi? Éyì Nzambi wa yaaya! Padibo bapete bikondo bya ekeleeziya, bya Mwânà wa Nzambi abi; kadi padi mpindyewu cibwikilu cya mangumba ne bikwabo ebi, cibwikilu cya bilele citudi naaci kacya ku Mpenta eci, padi bilele bya ekeleeziya bipandiibwe, bintu bivwa bantu bamba ne: “Matuku a bishima akaadi mapite, ne bintu ebi,” kadi Nzambi ùmushì cibwikilu pa Cyôci aci, ne wâCishiyi cimweneke



patooke, kadi bôbò badi pabwîpì ne kuCipoopela cyakabidi pa nkuruse, bifwanangane anu menemene.

<sup>113</sup> Nzambi mubuulula awu, mumweneke patooke, bôbò's bivwa bikengela kwikalabo baMumone mwimane pààpa's. Kadi Ûvwa mutambe kwikala wa patupu, Ûvwa muntu wa ciibidilu. Kabavwa mwa kuCimonaku to. Nwamonu's, ki muntu nyawu uvwa mwimane pààpa. "Ee," mwakambabo, "mulumyana mwine ewu, mMupatukile mu cilongelu kaayi's?" Kadi, vulukaayi ne, pààkatùbulà difuma adi mubidi Wende, Nyuma awu wakaMushiya, ntempelu. . . mishiki ya milambu ayi yakapumuka, ki mukenyi kwelawu mu ntempelu ne kupandawu cilàmbà cikudika. Cívwa ncinyi aci? S'ki Nzambi wabo wawa mukudika ku Kalvariyo, kadi bôbò batambe kufofoma mu mushindu wa kabayi mwa kucimonaku to.

<sup>114</sup> NciMushiye mumweneke patooke, kadi kabayi anu baCimona to! Mbafofomijiibwe. Nzambi, mubwikila mu muntu!

<sup>115</sup> Nudi bavuluke ne, Yêyè wakaalukila pashiishe kudi Pôlò paanyima paa ciine aci, ne kudi Peetelo mu buloko, bu Dikunji dya Kapyà. Nudi bavuluke aci anyi?

<sup>116</sup> Kadi mu matuku a ndekeelu Yêyè udi ne cya kwalukila cyakabidi, kadi Dikunji dya Kapyà didi ne cya kwalukila cyakabidi bwa kumwenesha Mwânà wa muntu, nwamonu's, bwa kuleeja Diyì, Bukènkè abu. Bilele, bikaavwàku abi, nebyumushiibwe. Kakwakwikalaku cintu nansha cimwe cìikalà mwa kuCipangisha to; necyenjiibwe, nansha bya munyi. Nzambi udi anu upanda mangumba awu ne bilele abi.

N'Nyuma wa mushindu kaayi WênzaYè nende ciine aci? Anu mwakenzaYe musangu wa kumpala amu. Tangilaayi numone cyakenzaYe mu matuku a Eliya, mu matuku a Yone. "Kanwikadi nwadyambidila munda mwenu amu ne nudi 'ne Abraham bu taatù' to, bwalu Nzambi udi ne bukole bwa ku mabwe aa kujuudila Abraham bânà." Nwamonu anyi? Kanwikadi nwadyambidila ne: "Bwalu, ndi wa mu *cikampanda* ne ndi wa mu *cikansanga*" to. Nwamonu anyi? Nzambi munkaci mwa kupanda cibwikilu, nwamonu's, bwa kuleeja ne Yêyè udi Nganyi. Nwamonu's, tangilaayi cibwikilu paadici cipandika mwab'ewu mpindyewu, tudi tujandula mpindyewu.

<sup>117</sup> Mpindyewu, cikondo kampanda, bu muntu mwa kuya dyamwamwa dya cilàmbà cikudika aci, civwa ndufu lwa cikàdi. Mpindyewu ndufu bwa kubenga kuya dyamwamwa dya Cyôcì aci! Amen. Pawikala kuyi mwa kupanda cibwikilu cya bilele aci, kupanda kuya dyamwamwa dya cimanu cya dingumba aci, bwa kumona Nzambi mu bukole Bwende, ndufu. Mu cikondo kampanda pavwabi ne ndufu bwa kubwelamu, mpindyewu ndufu bwa kushaala pambelu. Nkwasa wa Ngàsà mu kaabujima kende mmushaale mumweneke patooke, muntu kana yônsò ewu udi mwa kuMumona, cibwikilu ncipandike. Butumbi

kudi Nzambi's we! Nkwasa wa ngàsà mu kaabujima mmulwe mumweneke patooke.

<sup>118</sup> Mushindu mwine udi Nzambi mufwanyine kuleeja luse kudi bangènzàmpèkààtù bakooyike bu mudi twètù aba's we, pavwaYe muDisokoke apu, s'civwa bwalu busokoka. Kadi mpindyewu Cikaadi cimweneke patooke, anyi patooke tòò, cibүүлulula kudi Dîyi Dyende. Cidi misangu yònsò anu Dîyi, ku musangu ne ku musangu, didi diikàle Nzambi. Dîyi ndidi d'icikàngulà d'icishiya patooke. Bu bantu abu mwa kwikalapù bamanye Dîyi dya Nzambi mu dituku adi paakafwa Yesu apu, nunku's mbamone Nkwasa wa Ngàsà awu, nunku's mbamone ne Yèyè uvwa Nganyi.

<sup>119</sup> “Nenku mwine Awu uvwa nganyi? Cilàmbà cikudika cyakapandika bwa cinyi?” Vulukaayi ne, civwa ndufu bwa kubwelaMu. Muntu nansha umwe kavwa mwa kuCimonaku nansha. Mòsà wakaCimona mu mmwenekelu kampana, Civwa mvund- . . . civwa—nyima wa Muntu. Ee, s'ki Cyôci eci, nyima utuuka mashi, Muntu umwèumwè awu! Civwa ncinyi Aci? Nzambi uvwa muswe kubaleeja Nkwasa wa Ngàsà. Nzambi uvwa muswe kubaleeja ne Yèyè uvwa Nganyi. Pa nanku cilàmbà cikudika mu ntempelu, ku cyanza cya Nzambi, kuulu, cyakapandika kubangila anu kuulu too ne kwinsi, ki kuleejaci Nzambi mushaale mumweneke patooke. Úvwa n'Yesu Kilisto mukudika ku nkuruse, Nkwasa wa Ngàsà awu. Kadi civwa ncinyi? Bantu bavwa batambe kufofoma mu mushindu wa kabayi mwa kuCimonaku to.

<sup>120</sup> Mpindyewu ncyenzeke cyakabidi, bilele byabo abi! Mushindu uvwabi ne, cikondo aci, mu Dituku dya Mpenta adi, Dîyi dilwe ne diikàle mu mmwenekelu wa “Mwànà wa Nzambi.” Kadi kubangabo kucivwija bulongolodi ku Nicée, Loomo. Nenku, katanci aka, kuyabi kudi ba-Méthodistes, ba-Baptistes, ba-Presbytériens, beena Mpenta, ne bikwabo. Neilele civwijiibwe bulongolodi mu mushindu wa muntu kacyiiku mwa kumanya padiye mwimanyine to.

Kadi, butumbi kudi Nzambi, Yèyè wakalaya civwaYe mwa kwenza mu matuku a ndekeelu. Úvwa mwa kuleeja Dîyi Dyende dimweneke patooke, kukangula kumpala kwetu cyakabidi, nwamonu's, kukangula ne kushiya Dyòdi adi patooke.

<sup>121</sup> Biikalapù nanshà bamanye Dîyi, nunku's mbamanye ne Yesu uvwa Nganyi. Muntu wikalapu nanshà mumanye Dîyi dya Nzambi, nunku's mmumanye d'ibà ditudi ne mwoyi ne cidi munkaci mwa kwenzeka. Bòbò badi anu babenga kuteejeja Dîyi adi. Bilele byabo! Cyàkafikishà beena Yuda abu ku dimonabo mushindu awu ncinyi? Cinyi? Paabi's bivwa bimweke anu bu ne bavwa bulelela mwa kwikala bamone, bwalu's cintu aci cyakapandiibwa ne kukangudiibwa. Cyakapandiibwa ne kukangudiibwa bwa kiipacila kampana.

122 Ditabulujà edì nditungunuke mpindyewu bwa cinyi? Mmunyi mudidi difwanyine kutuuta dyakalenga? Mmunyi mudidi difwanyine kubeneshiibwa? Nansha dyôdi dipeta ditentula bûngi kaayi, anyi nî ncinyi cikwabo cyônsò, aci kacyna. . . Pàakapatukà Mòsà, kuvwa musumbà wa bantu basopakane bàakapàtukà nende. Kadi mbyenjiibwe nanku bwa cinyi? Yehowah nkaayende ngudi munkaci mwa kuumusha cibwikilu pa Nzambi, bwa kuleeja dishiilangana pankaci paa bulelela ne mashimi. Ki banganyi, ki ba-Méthodistes anyi, ki ba-Baptistes anyi, anyi ki ba-Presbytériens, badi mu bulelela? Dîyi dya Nzambi ndidi dilelela! “Dîyi dya muntu yônsò diikalè mashimi, kadi Dyanyi diikalè Bulelela.” Nzambi kèna dijinga ne muumvwiji to. Yèyè udi wenza dyumvwija Dyende Yèyè mwine. Ûdi uCimwenesha, ne umwen-. . . aci cifila dyumvwija. Nzambi mwikàle uDibuulula. Kaa, ekelekele! Anu munkaci kwetu mene, tudi tumona cyanza Cyende cinene munkaci mwa kwamba maaluu aa, cyenza maaluu aa.

123 Ndi ne cintu kampanda pa bwine bwalu abu diloolo edi, nwamonu's, mushindu wa kutangila cyanza cya Nzambi, cidiCi cyenza, mudiCi cidivungulula. Nwamonu anyi?

124 Kadi bantu badi bamba ne: “Kaa, Aci's ndukutukutu. Aci's ndikolesha dya maaluu mwaba awu. Kakwena bwa nsongo mu Cyôci aci to. Aci's ndukutukutu. Aci's m'Beelezebula. Aci's ndémon. S'ndubuku. Aci's *ncikampanda*.” Nwamonu's, cintu cimwecimwe cyakambabo Bwende Yèyè aci's.

125 Éyi ekeleeziya, mukaba wa mêyi ewu wôwò mupatuke, kanwenaku mwa kumona anyi, nwênù bambi baa Evanjeeliyo, mwaba unukaadi ne mwoyi? Kanwenaku mwa kumona ne mmu dibà kaayi mutukaadi anyi? Nzambi, uDileeja, uteeka ku luseke. . . Tangilaayi, Yèyè's ngwâkangata cilambà cikudika cya mu ntempelu aci e kucipanda bipese, bwa kumonabo Nzambi mumweneke patooke, kadi bôbò bavwa batambe kwikala bampofu bya kabayiku mwa kuCimona to. Ne Yèyè mmwenze cintu cimwecimwe aci leelu, muzanjike Dîyi Dyende kumpala, ciine cyakalayaYe aci. Mulayi wônsò mu Dîyi, muteekiibwe anu kumpala kwetu menemene, patooke tòò!

126 Nudi bamanye cidi ekeleeziya wa baa Bisamba bya bende wenza anyi? Cintu cimwecimwe cyàkenzà ekeleeziya wa beena Yuda aci, batambe kufofoma bya kabayiku mwa kuCimona to. Kwajiki. Neciikalè pa myoyi yabo anu muvwabi mu dituku adi amu.

127 Monaayi, ndufu, bwa kushaala kule ne Cyôci aci mpindyewu. Udi ne cya kubwelaMu kuya dyamwamwa dya cibwikilu eci, bwa cyanaana kwakwangula mpasu to. Mushindu mwine uvwa Nzambi mwa kubaleeja luse, kadi vulukaayi ne civwa ncinyi, Nzambi awu ngudi munkaci mwa kumwenesha civwa paanyima paa cibwikilu aci. Tangilaayi numone civwa paanyima paa

cibwikilu aci, Dîyì! Cívwa cibwikile cinyi? Dîyì! Cívwa ncinyi? Cidi mu musheete wa cipungidi. Cívwa n'Dîyì divwa cibwikilu aci cisokoke. Nwamonu anyi? Kadi Yesu nguvwa diine Dîyì adi, ne Yèyè udi Dîyì adi, nenku cibwikilu cya mubidi Wende ncívwa ciDisokoke.

<sup>128</sup> Ne leelu ewu cibwikilu cya bilele cidi cisokoka cyakabidi Dîyì, cyamba ne: “KaDyena nanku to.” Kadi's Didi nanku! Nzambi ngudi ufidila Dyôdi adi bujaadiki, utuuta Yèyè mwine dikubakuba mwikàle ne dibàlakana bu dya dîbà, kumpala kwa muntu ne muntu, kadi bôbô bapanga kuCimona. Nzambi, ikalaku neetu luse.

<sup>129</sup> Mu cifwanyikijilu, Môsà ufumina mu Bwikadi bwa Nzambi, ne Dîyì dya Nzambi bwa cikondo aci. Mpindyewu tangilaayi, tudi mpindyewu mu Ekesoode 19. Eci mpindyewu kacinupiciku to. Ekesoode 19, Môsà udi ufumina mu Bwikadi bwa Nzambi, anyi 20 ne 21, 19.20 ne 21. Môsà udi ufumina mu Bwikadi bwa Nzambi. Úvwa mubwele mu Dîyì. Dîyì dyamanyi kufundiibwa. Kadi yèyè, mu Bwikadi bwa Nzambi, mwikàle ne Dîyì, ùvwa ne Dîyì bwa cikondo aci. Kudi Dîyì bwa cikondo cyônsò. Nenku Môsà upatuka, mpala wende uvwa ùbàlakana bikole be! Nwamonu anyi? Dîyì divwa munda mwende, pabwîpi ne kumwenshiibwa, kufidiibwa kudi bantu.

<sup>130</sup> Dîyì dilelela, Nzambi nguvwa muDifunde, kadi Divwa kudi Môsà. Monaayi, Divwa kudi Môsà ne diikàle pabwîpi ne kumwenshiibwa. Yèyè nguvwa Dîyì bwabo bôbô, ùvwa Dîyì didi ne mwoyi, disokoka. Úvwa mudibwikile yèyè mwine, bivwa bikengela bwa Môsà ateeke cibwikilu pa mpala pende yèyè. Bwa cinyi? Yèyè nguvwa Dîyì adi. Amen. Too ne pavwa Dîyì adi mwa kumanyishiibwa, bivwa bikengela Môsà adibwikile. Amen!

Nudiku nuCimona anyi? Mwaba wônsò udi Dîyì, nDibwikila.

<sup>131</sup> Môsà nguvwa ne Dîyì. Mpindyewu vulukaayi ne, paanyima paa Dîyì dimane kumwenshiibwa, Môsà uvwa cyakabidi Môsà. Nwamonu anyi? Kadi dîbà divwa Dîyì adi munda mwende bwa kufidiibwa adi, yèyè uvwa Nzambi; ee, yèyè kacívwa kabidi Môsà to. Úvwa ne Dîyì dya Mukalenge bwa cikondo aci. Cintu nansha cimwe kacívwa mwa kumulenga to too ne pavwa aci mwa kujika; yèyè nguvwa ne Dîyì adi. Pa nanku, ki bwa cinyi, pavwaye ulwa, bantu bavwa batuma mpala ku luseke; kabavwa mwa kuumvwa to. Bakaavwa bashintuluke. Yèyè ukaavwa muntu mushiilangane. Úvwa ulwa ne Dîyì adi. “Nenku ùvwa uteeka cibwikilu,” mudi Bible mwambe, “pa mpala pende,” bwalu ùvwa ne Dîyì. Ne yèyè uvwa Dîyì bwabo bôbô.

<sup>132</sup> Mpindyewu tangilaayi, piikala Môsà. . .Éyì mwaneetu, mwab'ewu nepiikalè cipendu's. Kadi piikala Môsà. . .Bu mudi Pòlò mwambe mwab'ewu mu Kolinto Mwibidì, nshapita mwi3. Piikalabi ne byakakengela bwa Môsà kwikalaye ubwikila mpala

wende ne Butumbi bwa mushindu awu pa mpala pende... nwamonu's, bwalu abu buvwa mbutumbi bwa mubidi, ayi yivwa mmikenji ya mubidi. Kadi piikala Mòsà, mumanye ne mikenji ayi yivwa ne cya kubutuka, kadi Butumbi abu buvwa bunene menemene mu mushindu wa ne bwakafomija bantu, mu mushindu wa bikengela kuteekabo cibwikilu pa mpala pende, kadi neButambe kwikala munyi? Bantu bafomija mu nyuma naanyi's we! Uh-huh. Butumbi abu buvwa ne cya kujimina, kadi ebu Butumbi bwôbò kabwakujiminaku to. Nwamonu anyi? Mòsà uvwa ne mikenji ya musunya, dipiishangana, kakuyi ngàsà to, cintu nansha cimwe; yivwa yôyì anu yikupiisha. Kadi Eyi yitudi twamba ebu... Yôyì ayi kayivwaku ne difwilangana dya luse to, yivwa yikwambila anu cyûwà. Eyi yidi yikupa njila wa dipatukila.

<sup>133</sup> Nunku padi Dîyì adi dibuuludiibwa, kaa, ekelekele, neDìikalè mpala wa mushindu kaayi? Nebikengele kwikalaDi dibwikila's. Bikengela Dìikalè dibwikila. Mpindyewu monaayi. Pa nanku Nyuma mmubwikila mu ntempelu wa buntu, nwamonu's, bwa Yêyè kwakula wamba mêmèyì a mubidi ne cibwikilu cya mubidi.

<sup>134</sup> Mpindyewu, Pòlò udi wakula mwab'ewu mpindyewu, ne mu mushindu ewu—ewu, Dîyi-Nyuma ne: "Tudi bambi, kabayi baa dileeta, baa mikenji to; kadi bambi bakumbane baa Nyuma," mu mushindu wa ne Nyuma udi wangata dileeta ne uCimweneshe.

<sup>135</sup> Aci civwa anu mikenji pa yôyì, bivwa bikengela wêwè kuya kutapaku dîsù, kwamba ne: "Kwendi masandi. Kwibi. Kushimi. Kwenji *cikampanda*, *cikansanga*, anyi *cikankenga*." Nwamonu anyi? Bivwa bikukengela kwikala kutapaku dîsù.

<sup>136</sup> Kadi eci n'Nyuma udi ulwa pa Dîyì dilaya bwa cikondo *eci*, mwikàle upatula ne umwenesha, kaciyi bipese bibidi bya mabwe to, kadi Bwikadi bwa Nzambi udi ne mwoyi. Kaciyi meeji mafwikakaja adi muntu kampanda mukwatakaje, anyi Houdini kampanda, diyelè kampanda nansha; kadi mulayi mwine wa Nzambi mubuulula ne mumweneshiibwe anu kumpala kwetu mene. Mpaanyima paa cibwikilu cya mushindu kaayi piikala cyôci aci? Kadi ku—kujimija aci... .

<sup>137</sup> Nwamonu's, aci civwa cinene bikole mu mushindu wa nansha bantu biine kwambabo, kwambabo paakamonabo Yehowah upweka mu Dikunji dya Kapyà edi, ne ubanga kukankisha buloba, ne—ne bintu byakenzaYe abi, ne mukuna mukwate kapyà. Nunku nansha bu ne muntu nansha yêyè nganyi muteete kuya ku mukuna awu, uvwa ufwa. Civwa cinene bikole mu mushindu wa ne nansha Mòsà mwine wakakwacika bwôwà bwa dikanka dya buloba. Nunku, piikalabi ne musangu awu Yêyè wakakankisha anu mukuna nkaayaawu, ewu musangu Yêyè neakankishe mauulu ne buloba.

138 Kadi bishi bwa Ebu Butumbi? Piikalabi ne bwabwa buvwa bubwikila ne cibwikilu cya mubidi, ebu bwôbù budi... bubwikila ne cibwikilu cya nyuma. Pa nanku kanwikadi nukeba bwa kutangila ku cya mubidi to; bwelaayi mu Nyuma numone ne nudi penyi, numone ne mmu dîbà kaayi mutudi ne mwoyi emu.

139 Cidi cyumvwika cya meeji kunudi anyi? Nwamonu's, cibwikilu cya nyuma nciidi pa bantu, bamba ne: "Mémè ndi Méthodiste. Ndi mwimpè anu mudi nî nganyi yônsò amu. Mémè ndi Baptiste. Ne mémè ndi mwena Mpenta." Kanwenaayiku nufika ku dyumvwa ne, cintu aci ncibwikilu cya bilele anyi? S'cidi cinusokoka Nzambi. S'ki bintu bidi binupangisha bwa kusankila byônsò. . .

Kaa, wêwè udi wamba ne: "Mémè's ntu ngeela ne mbila ntupika nya muulu."

140 Yèyè mmwambe ne: "Dìyì dyônsò!" Eva uvwa mwitabuue Dìyì dyônsò pa kuumusha dimwepele. Nwamonu anyi? N'Dìyì dyônsò dya Nzambi mu kaabujima, mulayi wa dîbà edi mumweneshiibe. Nwamonu anyi?

141 Monaayaaku mpindyewu patudi tutungunuka apa. Ndi ne byâbûngî be mwab'ewu bya dyamba, kadi ndi ne mabeji matwe ku makumi abidi, kadi bidi. . . a—a bîndî mufunde, kadi ncyâ—ncyakwakula pa byônsò abi to. Nwamonu's, nêndwijakajè.

142 Yèyè mmubwikila ne cibwikilu cya mubidi kumpala kwa kwambilaye bantu Dìyì adi. Mpindyewu, bidi bikengela bwa Nzambi aDibwikile, bu mutuYe mulaye, mu mubidi wa buntu. Nzambi! Nudi nuCyumvwa anyi? Bikengela Nzambi aDibwikile mu mubidi wa buntu, ne ateeke cibwikilu cya nyuma pa mpala paabo, (bamba ne: "Ee, ndi *cikampanda* ne ndi *cikansanga*"), bwa kwakula ne bantu. Padi cibwikilu aci, ciikàle cibwikilu cya bilele, padici cipandiibwa, dîbà adi. . . cidibo bamba ne: "Mona's, matuku a bishima's akaadi mapite."

143 Mulumyana kampanda kungambilaye dituku dikwabo, muyiishi kampanda—kampanda mutekete wa ba-Baptistes kuntu kwaka, kulwaye kûndî, Mwaneetu Green, kwambaye ne: "Mwaneetu Branham, cintu cimwepele cîndî nciyi mpetangana neebe ncyôci eci." Yèyè ne: "Wêwè udi ukeba kufikisha bantu. . ." Kuvwa nku Ramada Inn kwaka, patuwwa ne disangisha kwôkò aku. Yèyè ne: "Udi ukeba kufikisha bantu ku diitabuue cikondo cya bapostolo, bwa kwikalabo ne nsòmbelu leelu ewu byenze bu uvwabo nende mu cikondo cya bapostolo." Yèyè ne: "Cikondo cya bapostolo's cyakajika ne bapostolo."

Mémè ne: "Cyakajika?"

"Eyowa's."

Mémè ne: "Mwakudi wa mu cikondo cya bapostolo uvwa nganyi?"

Yèyè ne: "Bapostolo dikumi ne babidi mu nzubu wa kuulu."

144 Mêmè ne: “Nanku’s Pòlò uvwa muumushiibwemu.” Mêmè ne: “Mwakudi uvwa m’Peetelo. Kadi Peetelo wakamba, mu Dituku dya Mpenta, paakamonabo byònsò ebi byenzeka, ne Nyuma Mwîmpè ukwata mudimu, wàkamba ne: ‘Mulayi udi kunudi nwênù, ne kudi bânà beenu balela, ne kudi aba badi kule, mu bûngì bwònsò bwabiikila Mukalenge Nzambi wetu abu.’ PiikalaYe uciidi ubiikila, nanku’s Cintu cimwecimwe aci cidi mwab’ewu. Cikondo cya bapostolo ncijike dîbà kaayi mwaba awu? Cikondo cya bapostolo’s cidi cijika padi Nzambi ujikija kubiikila.” Kî mmwambe bwalu nansha bumwe to kadi mmwenze wambula anu cifulu cyende nyêyè uyaaya wawa.

145 Bikengela Dîyì bwa kucyenza. N’Dîyì. Yesu wakambila Sataana ne: “Baakafunda ne.” Nwamonu anyi? Ki cyôci aci: “Baakafunda ne.”

146 Mêmè ne: “Peetelo ngwâkamba ne kacadyakujikaku to. Bûngì bwònsò buvwa Mukalenge mubiikile abu, Dibenasha edi divwa bwabo bôbò. Mpindyewu udi wêwè wamba ne: ‘Dyakiimana.’ Dîbà kaayi?”

“Kakwena bubi bwenza to?”

Mêmè ne: “To, mukalenge, nansha kakese. Ndaaku kûyaayà.” Uh-huh. Anu mwaba awu. Nwamonu anyi?

147 Peeteleo wakamba ne civwa mbwa muntu yònsò uvwa Nzambi mwa kubiikila awu, ùvwa mwa kupeta Dibenasha dimwedimwe dya bapostolo adi. Ki—ki Dîyì dya Mukalenge ndyôdi adi. Nwamonu anyi?

148 Mpindyewu cibwikilu cya mubidi. Nzambi, Dîyì, mubwikila mu mubidi wa buntu. Civwa ncinyi? Nzambi uvwa mubwikila mu Mòsà. Nzambi uvwa mu Mòsà, mubwikila, ne Bwikadi bwa Nzambi buvwa munda mwende. Ùvwa mupwangane anu menemene ne Dîyì adi munda mwende mushindu awu, mu mushindu wa ne byakakengela kubwikilaye mpala wende. Kabidi ùvwa mmuprofeta mushindika wâkavungulula Dîyì e kubambila ne: “Kwenji cikampanda! Wènzè cikansanga! Ne kwenji cikankenga!” Nwamonu anyi?

149 Bwa kufila Dîyì Dyende kudi lukongo alu, Yêyè wakaDibwikila mu muntu, cyanaana Dîyì nunku ndifomije ne babiikidiibwe bwa kupatuka biine. Nwamonu anyi? Nansha mene bantu bavwa kuntu aku abu, kabavwaku mwa kutwala bwa kumona ciine aci to. Mu—mu Ekesoode tudi tusangana ne, baakamba ne: “Mòsà akule yêyè, bwa Nzambi to.” Nudi numona bwa cinyi Dikunji dya Kapya kaditu ditamba kumweneka anyi? Nwamonu anyi?

150 Nzambi kwambaYe ne: “Nê—Nê—Nêngenzè aci. Nêmbàjuudilè Muprofeta.” Amen! “Nêmbàjuudilèye.” Ki kulwaYe anu menemene. “Nênjuulè, ne Yêyè neikalè ne, neikalè Dîyì.”

<sup>151</sup> Yêyè ne: “Paaswabo kumona ne Dìyì didi cinyi...” Yêyè ne: “Mpindyewu, Mòsà, Mvwa mukumwenekela kuntu kwaka mu cipuka cilakuka kapyà.” Yêyè ne: “Nêntuulukè nteemeshe mukuna awu kapyà.” Yêyè ne: “Nebamone ne udi mwambe bulelela. Nêmmwenekè mwab’ewu mu—mu—mushindu umweumwe wa ulakuka kapyà awu. Nêmmwenekè mwab’ewu ne nênjaadikilè bantu, Mêmè nênsindikè mudimu webe wa bwambi.” Ki cyakambilaYe Mòsà mwab’ewu, mu mêtì macincika.

<sup>152</sup> Monaayi, Yêyè ne: “Mpindyewu Nê—Nênkutumbishè kumpala kwa bantu.” Yêyè ne: “Mpindyewu, udi mubãmbile ne Ndi mutuutakeene neebe kuntu kwaka mu cipuka cilakuka kapyà; mpindyewu Nêntuulukè, Kapyà kamwekamwe aku, ne Nêndeejè bantu ne kwakabadinga bwa Cyôci aci to.” Nwênù nudi mwa kuCijaadika ku maalù a mamanya, nansha mene, panwikala baswe. Nwamonu anyi? “Nêntuulukè buludi ne Nêmbàleejè.”

<sup>153</sup> Kadi paakabangaYe kukungula, paakabanga Yehowah kukungula, bantu kwambabo ne: “To! To! To! Yehowah kaakulu to; ne—netufwe.”

<sup>154</sup> Nwamonu’s, bivwa bikengela kwikalaYe mubwikila, pa nanku ki Nzambi kuDibwikila mu Mòsà ne kupa Mòsà Dìyì. Ki Mòsà kutuuluka e kwamba Dìyì dya Mukalenge, mu cibwikilu pa mpala pende. Mmwômò anyi? Yehowah mubwikila mu mmwenekelu wa muprofeta, bwalu bivwa cya bushuwa mwa... Ki Nzambi kwamba ne Kavwa kabidi mwa kwakula naabo mu mushindu awu to. Úvwa mwa kwakwila naabo anu ku muprofeta. Awu ki mushindu umwepele uvwaYe mwa kwakulaku naabo kubangila piine apu. Ki mushindu umwepele ukaadiYeku mwakulaakule. Ncya bushuwa. Kacya kî mmu mushindu kampanda mukwabo to. Yêyè katu ushima nansha.

<sup>155</sup> Monaayi, anu Mòsà nguvwa ne Dìyì. Mpindyewu, kakuvwa ci—cisumbu cya bantu cituuluke to, kakuvwa nansha Bafaalesa, anyi Basadoka, anyi kacivwa kasumbusumbu kampanda—kampanda anyi kaacyôtà kampanda to. Civwa Mòsà! Yêyè wakangata muntu umwepele. Kêna mwa kwangata meeji abidi anyi asatu mashiilangane to. Útu wangata muntu umwepele. Mòsà nguvwa ne Dìyì, anu Mòsà nkaayende. Nansha Yoshuwa mwine kavwaku naaDi to. Muntu mukwabo nansha umwe kavwa naaDi to. Amen! Yoshuwa uvwa ka—kalàlà kaa masalaayi; Yoshuwa uvwa kàmàndà kaa cilwilu; Yoshuwa uvwa mwena kwitabuuja, mwena Kilisto. Kadi Mòsà yêyè uvwa muprofeta! Dìyì kadyena mwa kulwa kudi Yoshuwa nansha; bikengela Dilwe kudi Mòsà. Yêyè nguvwa muprofeta munene wa dîbà adi. Monaayi, Dìyì kacya kadyakalwaku kudi Yoshuwa to too ne pàakayà Mòsà. To, mukalenge. Nzambi utu ukwata mudimu ne muntu umwepele musangu umwe. Nzambi udi



umwepele. Nwamonu anyi? Mpindyewu, anu Mòsà nguvwa ne Dìyì, kí ncisumbu to.

<sup>156</sup> Tangilaayi, Nzambi wakadimwija bantu nansha babamba ne mbanganyi bwa kabadidingi baalonda Mòsà bwa kubwela mu cibwikilu aci to; batentudi. Nwamonu anyi? Mukaji, mulume, mwakwidi, nansha yêyè nganyi, nansha wa difwana dya Nzambi dya bishi, nansha muntu mulume wa bishi, nansha wa luumu lwa luyiila ne panshi, nansha mwikàle bishi; Wàkadimwija ne: “Mòsà alwe nkaayende! Kadi muntu nansha yêyè nganyi, nansha nyama mene, mulengeku, udi ne cya kushipiibwa anu mwaba awu.” Kudidingi wapita wàya kumpala kwa cibwikilu aci to. Cibwikilu aci ncyà muntu anu umwepele. Mukenji awu ngumwepele. Nwamonu anyi? Mu ntempelu, muntu umwepele nguvwa ubwelamu musangu umwe ku cidimu, mwela maanyi ne mulongolola bwa kubwelamu; kacyi bwa kupatula Dìyì to, kadi bwa kulambula mashi. Bwa kubwelamu mene kumpala kwa Cyòcì aci, anu umwepele. Muntu mukwabo kana yònsò uvwa ufwa. Nwamonu anyi?

<sup>157</sup> Ki kufwabo mu nyuma eku patudi twakulangana apa. Eci ncibwikilu cya nyuma. Nwamonu anyi? Aci civwa cibwikilu cya mubidi. Eci ncibwikilu cya nyuma. Nwamonu anyi? Mbatungunuke anu ne kubwelamu paanyima apu, udi mwa kubambila. “Kaa, ndi mumanye! Ndi mumanye aci, kadi ndi . . .”

Mêmè ne: “Tungunukaayi, bidi anu bîmpè, cidi cyamba anu . . .” Nudi bavuluke ne, cipupu cya ndekeelu mu Èjipitu civwa ndufu’s, kumpala kwa cimwangi. Cipupu cya ndekeelu pa buloba ndufu lwa mu nyuma, kumpala kwa cimwangi. Pashiishe nebooshiibwe bashaale anu butu ne nebaalukile ku lupwishi, ne baakane nebapatuke benda bendela pa butu bwabo. Kadi cintu cya ndekeelu ndufu lwa mu nyuma, babenga Dìyì.

<sup>158</sup> Mpindyewu monaayi, Nzambi wakadimwija bantu nansha babamba ne mbanganyi bwa kabadidingi baalonda Mòsà bwa kubwela mu cibwikilu cya Kapyà aci to. Bivwa bikengela bwa Mòsà kwikalaye mubwikila, bivwa bikengela kumùpatukayè. Mòsà uvwa ubwelamu bu Mòsà, ùbwela mu Dikunji dya Kapyà edi; kadi pavwaye ùmùpàtuka, ùvwa mubwikila. Bwalu, ùvwa ùbwelaMù, mupatuke mu bilele byende, bilele bya bakulu. Yêyè ukaavwa *mumone* Dikunji dya Kapyà, kadi mpindyewu ùdi ùbwela *mu* Dikunji dya Kapyà adi. Nwamonu anyi? Amen! Kadi ùvwa ùmùpàtuka, mubwikila. Dìyì dya Nzambi munda mwa muntu, dibwikila! Ki yêyè ukààdi wenda upatuka ewu, kaa, ekelekele, mêmè’s ndi mwa kucimona’s. Wàkadimwija bwa muntu mukwabo nansha umwe kateeciku aci to, muntu nansha umwe kèna mwa kutentula Aci to. Mbîmpè kudidingiku to. Nwamonu anyi? Nansha mwakwidi anyi muntu wa cijila, nansha yêyè nganyi, kardinale, mwepiskopo, anyi cinyi cikwabo, ùteeta

kubwela mu cibwikilu aci, ùvwa ùfwa. Nzambi wakabadimwija. Katwakwikalaku ne bintu bitentula to.

<sup>159</sup> Dìyì Dyende ndibuulwila muntu umwepele. Ki mutubi nanku misangu yònsò, muprofeta nguvwa ulwa ne Dìyì dya Mukalenge, cikondo cyònsò, musangu wònsò, eku ne eku kwa Mifundu. Dìyì dilwalwa kudi umwepele. Mu cikondo cyònsò, bya mwomumwe, nansha mu bikondo bya ekeleeziya, kubangila anu ku cya kumpala ciine too ne ku cya ndekeelu. Bakwabo badi ne yabo myaba, ncya bushuwa, monaayi, kadi wêwè shaala kule ne Dikunji dya Kapyà adi. Nwamonu anyi? Edi's ndileesona dya tulonga mwab'ewu's! Nwamonu's, muntu yònsò ukeba anu bwa kwikala Mòsà, ne muntu yònsò . . .

<sup>160</sup> Nudi bavuluke cyàkambà Daatana ne bakwabo abu kuntu kwaka anyi? Baakamba ne: "Mpindyewu, Mòsà, anji indilabi kakese mwab'ewu! Wadyàngàcìdì wêwè nkaayeebe bipitepiteme bûngì be, wamonu's. Mpindyewu, s'kudi bantu bakwabo mwab'ewu badi Nzambi mubiikile."

<sup>161</sup> Aci ncya bushuwa. Bòbò abu, muntu ne muntu, bavwa benda balonda anu bilenga pavwabo benda baya apu, kadi paakateeta muntu kampanda kwambula dikàsà bwa kwangata kaaba kaa Nzambi kavwaYe mupeeshe Mòsà aku, yêyè uvwa mudyànjila kulongolola ne kuteekiibwa pa mudimu awu, paakateetaye bwa kukangata, kapyà kaakatuuluka e kukangula buloba ne kubaminamu dyakamwe. Nwamonu anyi? Nwamonu anyi? Watapa ntaala wadimuka. Nwamonu anyi? Ikala wêwè anu mwena Kilisto mwîmpè wa Nzambi, wa difwana dya Nzambi, mwikàle witabuuja Dìyì. Nwamonu anyi? Shaala kule ne Dikunji adi. Dileesona kaayipu's we!

<sup>162</sup> Nzambi wakamwenekela Mòsà musangu wa kumpala mu cipuka cilakuka kapyà, Nzambi uvwa mubwikila mu Dikunji dya Kapyà. Mpindyewu teejeaayi ne ntema menemene mpindyewu bwa katanci kakese. Nzambi, wakalwa dyambedi kudi Mòsà, Ùvwa mubwikila. Nzambi uvwa mu Dikunji dya Kapyà, musokome mu cipuka, wamonu's; byenze bu paanyima paa biseba, nwamonu's, paanyima paa nkwasu wa ngàsà ku cyoshelu. Nwamonu anyi? Ùvwa mubwikila. Yêyè utu misangu yònsò anu mubwikila. Nanku paakalwaYe kudi Mòsà, Ùvwa mu Dikunji dya Kapyà, mubwikila mu Dikunji dya Kapyà. Kadi apa, kumpala kwa bantu eku, Nzambi wakamushindika ku Dikunji dya Kapyà dimwedimwe adi. Nwamonu anyi? Mòsà kwamba . . .

<sup>163</sup> Mpindyewu tangilaayi. Nudi munkaci mwa kuubala anyi? Nudi balekele meeji enu alaluka apatuka anyi? Nudiku mwa? Nudi mwa . . . "Ewu udi ne maci, ùmvwè." Nwamonu anyi?

<sup>164</sup> Paakamwenekela Nzambi Mòsà, muvwa mmu Dikunji dya Kapyà, paakamubiikilaYe ku mudimu wende wa bwambi apu. Ki Mòsà kulwa e kwambilaye bantu bwalu abu. Bòbò kabavwa

mwa kuciitabuuja to, kadi pende's wakenza bishima ne bikwabo bintu. Kadi, bwa musangu ewu, Yèyè kumweneka, kumweneka bilondeshile maalu a mamanya ne kushindika mudimu wa bwambi wa Mòsà bu Nzambi umwèumwè uvwa mwakule nende awu, bwalu Wàkamwènèka mu mmwenekelu wa Dikunji dya Kapyà ne mukuna kukwatawu kapyà. Ne Dyakalwa kudi Mòsà mu cipuka, dyakule nende. Eyo.

<sup>165</sup> Dimweneka dya kumpala dya Nzambi, kudi Mòsà, mu cipuka cilakuka kapyà, cibwikilu. Kumpala kwa bantu, Nzambi kubwikilaYe kabidi Mòsà ne kumushindikaYe, ku cibwikilu, pa kuDibwikila ne Kapyà kamwekamwe aku, Dikunji dya Kapyà dimwedimwe dyàkapwekà adi. Kubangila—kubangila pa dîbà. . . Kubangila pa bôbò abu, bwa kumonabo anu mwa kuumvwa Dîyì dya Nzambi. Nudi bacyūmvwè anyi? Anu Dîyì, bavwa bumvwa Dîyì Dyende. Bwalu, Mòsà bwabo bôbò, ùvwa Dîyì didi ne mwoyi. Mòsà! Nwamonu's, Nzambi ukaavwa mutambe kujaadikila Dîyì adi bikole ku Mòsà! Nwamonu's, Mòsà wakamba. . . Nzambi wakambila Mòsà ne: "Tuuluka ndaaku kuntu kwaka. Mémè nēngiikalè neebe. Yèyè udi. . . Kàkwakwikala cyàkukàndameenà nansha cimwe to. NDI EWU ÛNDÌ."

<sup>166</sup> Mòsà wakatuuluka, e kwambaye ne: "Nudi bafwanyine kubenga kwitabuuja eci, pàmwàpa, kadi Nzambi ngudi mummwenekele mu Dikunji dya Kapyà ne Yèyè ngudi mungambile maalu aa."

<sup>167</sup> "Kaa, tudi ne bintu bya mishindu yònsò bifwanangane naabi biikàle byenzeka's." Pâlò kwambaye ne: "Mona's!" Mpaasata Pâlò kwambaye ne: "Ee, wèwè's udi ne diyelè dikese be dya beena majimbu. Mona's, mémè ndi ne beena majimbu apa badi mwa kwandamuna nyoka ne kulwaye. . . dikombo—dikombo kulwadi nyoka. Lwâyi apa, nwênù beena majimbu." Ki kulwabo mwaba awu e kwenzabo cintu cimwecimwe aci.

<sup>168</sup> Mòsà uvwa mumanye. Kakuvwa cintu nansha cimwe cyàkamutacishà to. Batentudi bûngì bwònsò buvwabo naabo abu, kabyakafila dishiilangana nansha dya kànà to. Mòsà yèyè wakashaala anu mupuwe. Katanci aka, yôyi kudikoka eku ne eku ndambu, kadi, dyakamwe, nyoka wa Mòsà kuminaye anu mikwabo ayi. Nwamonu anyi? Bwa cinyi? Anu bu bapostolo abu, kabavwa mwa kuCyumvwija. Mòsà kavwa mumanye ne Nzambi neàcyènzè bishi to, kadi Yèyè's nguvwa ùcyènza.

<sup>169</sup> Nwavulukaayi ne, Yèyè utu mwambe ne Yane ne Yambele nebaalukile mu matuku a ndekeelu, nwamonu's, bintu bitentula. "Ne mbafwanyine kuseeswisha ne Basungula mene bu ne bivwa mwa kwenzeka," Maataayi 24.24. Nwamonu anyi? Anu bintu bimwebimwe abi menemene, benza bishima ne bikwabo bintu bya mushindu umweumwe awu. Tabaleelaayi Dîyì adi! Tabaleelaayi Dîyì adi! Muntu wamba ne ùdi wènza bishima kadi

mucikàle anu muswe kwitabuuya ne kudi Nzambi yisatu, ne kudi byònsò bya mushindu ewu ebi; seemenaayi kule ne wa mushindu awu. Tudi bamanye ne aci ncyà—aci ncyà mashimi, nwamonu's, bwa cya nanku to. Nwamonu anyi? Dìyì, Dìyì dyònsò, Dìyì dyònsò didi dipatuka mukana mwa Nzambi! Genese, Dìyì dimwepele! Apa, mbambe, ne: “Kuumushidi anyi kusakididi dìyì dimwe.” Nwamonu's, Didi ne cya kwikala Dìyì dimwedimwe adi. Nwamonu anyi?

<sup>170</sup> Monaayi ne, bantu baakamona cintu kampanda cìvwà cyenzeke. Mòsà uvwa mubwikila bu... Ùvwa muprofeta, ne Nzambi uvwa mushindike Dìyì Dyende mpindyewu, mutuuluke mwaba awu. Ne wàkamòna bimanyinu ne maalu a kukema. Ne pashiishe, eyo, bantu aba kuditapululabo anu pa bôbò, ekeleeziya. Nwamonu's, *ekeleeziya* mbwena kwamba ne “babiikidiibwe bwa kupatuka.” Nwamonu anyi? Paanyima paa bamane kubiikidiibwa bwa kupatuka mu baa pa buloba ne kushaalabo cisamba, nwamonu's, ki Nzambi kuDimanyisha muvwaYe Dikunji dya Kapyà adi. KujaadikaYe mukenji wa Mòsà. Nwamonu anyi? Yèyè uvwa Dikunji dya Kapyà. Bavwa bafwanyine kwikala baDikwate ne fòtò, ngeela meeji, bu bôbò ne byamu bya fòtò, bwalu mukuna mujima uvwa anu mukwate Kapyà. Kadi bôbò—bôbò baakajaadika aci, Nzambi ujaadika ne Mukenji uvwa ngwa cya bushuwa. Mukenji ukaavwa pabwipi, kantu ne kantu, bavwa ne cya kutumiibwa mu cimwangi dîbà adi. KubwikilaYe muprofeta Wende kùdì cisamba cya beena cimwangi eci.

<sup>171</sup> Bantu abu, elaaayi meeji, baakamona ne cintu kampanda civwa cimzenzekele. Yèyè ukaavwa mpindyewu mushiilangane ne bakwabo baa beena Izaleela abu. Ukaavwa mushiilangane, mukenji wende uvwa mushiilangane, yèyè uvwa mushiilangane ne baikwidi, ùvwa mushiilangane ne cintu kana cyònsò. Nwamonu's, ùkaavwa muntu mushiilangane. Bantu kumonabo ne cintu kampanda civwa cyenzeke. Nzambi uvwa muDibwikile mu muprofeta Wende, bwa kubambilaYe Mèyì Ende. Ki civwaYe mwenze ncyòci aci. Mòsà uvwa Dìyì didi ne mwoyi adi kudi cisamba, dibwikila kudi Dikunji dya Kapyà, diikàle dyàmba civwa mwa kulwa kubwikidiibwa pashiishe paanyima paa biseba bya tusengelanshimba. Nwamonu anyi?

<sup>172</sup> Bivwa bikengela Dìyì difumine kudi Mòsà, dyambedi. Nwamonu anyi? Mòsà nguvwa ne Dìyì. Avwa mafundiibwe kudi Nzambi, muntu nansha umwe kavwa mwa kuWumvwija to, bivwa bikengela Mòsà bwa kuWumvwija, dyambedi. Ki bwa cinyi ùvwa ubwikila mpala wende, bwalu ùvwa... Nudi nuCimona anyi? Nwamonu anyi?

Ki Dyòdì *edi*. Tudi bafwanyine kuDyambula, kwenda naaDi, ne bikwabo byònsò mwab'awu, kadi bikengela Dibuuuludiibwe. Bwa kubuulula, bivwa bikengela Mòsà kulwaye Nzambi bwa cisamba.

Wêwè udi wamba ne: “Aci’s ndukutukutu.”

173 Mona’s, Yêyè’s wakambila, wambila nansha Mòsà, Yêyè mwine ne: “Wêwè newikalè Nzambi, ne Alona neikalè muprofeta webe!...?...” Nwamonu anyi? Pa nanku ki Yêyè kulwa, nwamonu’s, bivwa bikengela bwa Yêyè kuDibwikila, bwalu Nzambi utu misangu yònsò anu paanyima paa cibwikilu. Kaa, ekelekele! Nudi nuCimona anyi? [Disangisha didi dyamba ne: “Amen.”—Muf.] Nzambi mmusokome bantu batwilangane.

174 Yêyè wakamba ne: “Taatù, Ndi nKusakidila, Udi muCisokoke beena lungenyi ne batalame, kadi muCibuulwile bânà, badi baswe kuyiila abu.” Nwamonu anyi?

175 Nzambi musokoka paanyima paa cibwikilu. Mòsà uvwa mubwikile mpala wende. Nanku Mòsà uvwa Dîyì didi ne mwoyi dibwikila. Bantu baakamona Dikunji dya Kapyà adi, kwambabo ne: “Bwa mpindyewu tudi batwishibwe.” Nwamonu anyi? “Mòsà akule yêyè.” Nwamonu anyi? “Nzambi kaakulu to, bwa katulu kufwa.” Mòsà wakabwela buludi mu Dikunji dya Kapyà adi. Nwamonu anyi?

176 Ki kwamba mpindyewu, Yêyè kwamba ne: “Mpindyewu Mêmè—Mêmè ncyakwakulaku kabidi naabo mushindu ewu to. Nêmbàpè muprofeta.” Nwamonu anyi? Nenku ki mushindu ukaavwaYe misangu yònsò wenza ngwòwò awu. Nwamonu anyi? KwambaYe ne: “Mpindyewu babande baye.” Kadi bikengela muprofeta ewu ikalè ne Dîyì edi. Yêyè mwikàle mubwikila ne bilele, Nzambi kî ngudiku mumutume to. Yêyè mwikàle mubwikila ne Dîyì, Nzambi neashindike Dyòdì adi. Nzambi utu uDyumvwijila Dîyì Dyende. Mòsà uvwa wamba Mèyì awu; Nzambi uvwa uWumvwija. Amen.

177 Mòsà uvwa wamba ne: “Mukalenge ngudi mwambe nanku!” Ne Mukalenge pende uvwa wenza civwaYe mwambe aci. Aci ki civwa ciCivwija ne ncyà bushuwa.

178 Mpindyewu Yêyè kwamba ne: “Mpindyewu, Mòsà, ikala muumvwe. Bantu bŭmvù mpindyewu. Wamonu’s, Ngaakuleeji wêwè, Ngaakushindiki wêwè.” Nzambi uvwa muDibwikile mu muprofeta ewu, bwa kwambila bantu Dîyì Dyende. Mòsà uvwa Nzambi udi ne mwoyi kudibo, Dîyì didi ne mwoyi dya Nzambi dimweneshiibwe. Ki bwa cinyi mpala wende mmubwikila. Nwamonu anyi?

179 Nenku nudi bamanye ne cintu cimwecimwe aci mu mwena Kilisto mulelela ncibwikila leelu ewu, kudi beena bupidya anyi? Badi bamona bakaji abu ne nsuki mile ne bikwabo, bamba ne cidi. . . “Tangilaayi mushindu wa cyena kale wawa.” Bakaji bavunga nsuki yabo cikata paanyima, bôbò bamba ne: “Badi ne ndundu wa mashinyi mutubuke, lukata lwa mashinyi lwa dîseelefù ku mutu kwaka.” Nwamonu’s, Cyònsò nCibwikila. Bôbò mbadi bampofò. “Kaa,” mudibo bamba, “mêmè’s ndi ne dipolome dya Ph.D., L. . .” Nansha wêwè ne cinyi, udi anu

mupangi wa Dìyì. Cya bushuwa menemene. “Kaa, aci, aci’s cidi anu cintu kampanda cya cishaadile. Mèmè . . .” Anji angata dyambedi tuumaleesona twa tukese.

<sup>180</sup> Kadi twǎmbè bishi bwa bantu badi bamba ne mbabwikila mu Bwikadi bwa Nzambi, kadi bayiisha cilele kampanda cya ekeleeziya? Kaa, bya luse’s, Nzambi wanyi! Biikàle basakidila ne buumushila, ne bikwabo byònsò, mu kubwejamu kwa byenabwalu byabo bôbò ne meeji abo bôbò biine, kabiyi Dìyì dya Nzambi to, nwamonu’s, ncibwikilu cya mushindu kaayi aci? Aci’s cidi ne cibwikilu cya butendeleedi. Nzambi’s ukaadi mumane kupanda aci cibwikilu mucishiye bwashi!

<sup>181</sup> Bavwa bamba ne: “Cintu paaci ne mbaprofeta kacituku to. Cintu cya nanku kacituku to, mu matuku a ndekeelu aa, ne mbapostolo ne baprofeta. Cintu paaci ne ndyondopa dya kudi Nzambi kacituku to. Cintu paaci n’ǎ ni mbeena lùmòndò, kacìcìtukù kabidi to. Cintu paaci n’ǎ ni m’Maako 16 ciikàle cyùle kacitukù to. Cikondo cya bapostolo cikaadi cijikè.” MbaCibwikile kumpala kwa bantu. Kadi Nzambi mmupatuke buludi ne Nyuma Mwimpè Wende wa Kapyà, kadi kupanda aci cintu kuumukila anu kuulu to ne kwish- . . . [Katupa kaa mukaba wa mēyì munda mutupu—Muf.] Nzambi mmupande cibwikilu aci.

<sup>182</sup> Mòsà uvwa cibwikilu, Dìyì dya Nzambi didì ne mwoyi dibwikila paanyima paa mubidi wa buntu. Dikunji dya Kapyà divwa munda mwa Mòsà, mu bushuwa bwa bwalu, diikàle dyamba civwa ne cya kubwikidiibwa pashiishe paanyima pa biseba, nwamonu’s.

<sup>183</sup> Mpindyewu, aci, Dìyì, Dìyì dyakatwadiibwa, pashiishe Dyakafundiibwa, pashiishe Dyakateekiibwa paanyima kadi diikàle anu dibwikila, bwalu Nzambi uvwa misangu yònsò anu mu Dìyì adi. Amen! Yéyè utu anu Dìyì, misangu yònsò. Úvwa mu Dìyì adi. Ki bwa cinyi bivwa bikengela bwa Dìyì kwikaladi dibwikila.

<sup>184</sup> Kaa, mwaneetu wa balume, mwaneetu wa bakaji, nudi nuCyumvwa anyi? Tangilaayi! Kanwenaku numona anyi? Divwa dibwikila munda mwa bikondo byònsò ebi, bilondeshile cidi Nzambi mwambe, ne neDikangudiibwe mu matuku a ndekeelu, Bitampi Mwandamutekete abi nebikoshiibwe, ne Cintu mu kaabujima necishaale patooke ku mèsù kwa bantu, bikaadi byenzeke misangu yònsò ayi abi. Dìbà dya Mukenji wa musanjeela wa mwandamutekete, bivwa bikengela bwa maalu masokoka ònsò a Nzambi amanyikile mu Eliya awu, dìbà dya ndekeelu edi; mushindu udi Kilisto mwediibwe pambelu paa ekeleeziya Wende, Mwànà wa Nzambi; mushindu udiYe mubuuludiibwe cyakabidi bu Mwànà wa muntu; mushindu udi Ekeleeziya ne cya kuteekiibwa mu bulongame, ne bintu byònsò bwa dituku dya ndekeelu, kakuciya ní ntwitabaayi, ní

ndingumba, kakuyi mpatà to anu Dîyi pa dyôdi diikàle ne mwoyi munda mwa muntu nkaaya. “Nèngàngatè umwe, ne nènshiyè umwe. Nèngàngatè *ewu* nunku, ne nènshiyè *wawa* naka.” Nwamonu anyi? Kudi anu. . . Kakwena nî nshinga, nî mmangumba, nî ndiswikibwa anyi nî ncinyi cyònsò to; mmwoyi ne Nzambi, anu ne Yèyè nkaayende. Nwamonu anyi?

<sup>185</sup> Monaayi, dibwikila mu mubidi wa buntu. Mòsà mwikàle ne Dîyi adi, dyàmba civwa mwa kuteekiibwa pashiishe paanyima paa ciseba cya kasengelanshimba. Bwa ne. . . Ki mudîbi kabidi bwa Kilisto wetu Mòsà. Kilisto ki wetu Mòsà. Yèyè uvwa Nzambi mubwikila mu mubidi wa buntu, mubwikila mu buntu, mu musunya. Ncya bushuwa. Kabidi Yèyè udi umwèumwè awu makeelela, leelu, too ne kashidi. Ûvwa mubwikila kudi biseba bya tusengelanshimba. Ûvwa mubwikila. Kadi bwa ewu musangu Yèyè uvwa mubwikila mu Muntu. Nwamonu anyi? Mpindyewu monaayi, “umwèumwè awu makeelela, leelu, too ne kashidi,” mulaye Dîyi Dyende bwa *eci* cikondo. Yèyè udi anu Kilisto, Dîyi dilaya bwa cikondo eci, dibwikila mu mubidi wa buntu. Dîyi didi Nzambi.

<sup>186</sup> Dilaabiibwa mmuntu kampanda. Mwaku *Kilisto* udi umvwija “mulaaba maanyi,” nwamonu’s, “mulaaba maanyi awu.” Nenku, Mòsà uvwa Kilisto mu matuku ende yèyè, ùvwa mulaaba maanyi awu. Yelemiya uvwa Kilisto mu matuku ende yèyè, mwikàle ne citupa cya Dîyi bwa dituku adi.

<sup>187</sup> Kadi paakalwa Yesu, Wàkalwa bu Mulaaba maanyi-Mupikudi Awu; nenku aci civwa m’Mòsà ne byònsò bivwa munda mwa Mòsà abi, ne Dîyi dyònsò, ne Bunzambi bwònsò mu ciikadilu cya mubidi buvwa munda Mwende. Ki bwa cinyi cilàmbà cikudika cya mu ntempelu cyònsò cyakapandika, ne nkwasà wa ngàsà wakalwa mushaale mumweneke yònsò anu menemene, Yèyè ki uvwa Mulaaba maanyi awu.

<sup>188</sup> Monaayi mpindyewu, cibwikilu mu mubidi wa buntu, Dîyi dilaya bwa cikondo eci didi paadi ne cya kubwikidiibwa. Monaayi. Bidimba bya ekeleeziya binangi bya mpekaatu abi ne bangènzàmpèkààtù kabeena mwa kuCimona to bwa cibwikilu cya buntu aci.

<sup>189</sup> Ki bwa cinyi kabavwa mwa kuMumonaku to. “Mona’s, Yèyè’s mmuntu. Mmufumine penyi Yèyè mwine? Nkarta kaayi kaa buumambala kadiYe naaku? Ngwa mu ekeleeziya kaayi’s Yèyè mwine?” Ndi njinga kwakula pa cyòcì aci diloolo edi ne: “Ngwa mu ekeleeziya kaayi’s Yèyè mwine?” Nwamonu anyi? Pa nanku, nwamonu’s, mpindyewu: “Ngwa mu ekeleeziya kaayi’s Yèyè mwine, cisumbu kaayi—kaayi’s? Mmu cilongelu kaayi mudiYe mulonge? Mmulongele Yèyè mwine Twende tulaasa penyi? Ee, Muntu mwine ewu’s mbamulele, bilondeshile bitù bantu bàmba, anyi bilondeshile mwa—mwanu mwela Bwende Yèyè ewu mu nyungulukilu emu, Muntu ewu’s mmulela kabiyi

mu dibaka dinsantu to. Mona's, Yèyè, cya bushuwa's, Yèyè's ngwa ndyabulu. Nwamonu's, Yèyè's—Yèyè's ngwa dyabulu. Yèyè mmulela kabiyi mu dibaka dinsantu to, kabidi Yozefu's wakasela pende nsongaakaji awu anu bwa ne nkwèpì kwalwabo kumwasa mabwe, bwalu uvwa ngèndaàmàsàndì. Kadi Muntu awu ujuuka ulwa apa bwa kutwambila twètù baakwidi aba cidì cikengela kwenza?"

<sup>190</sup> Kadi ki Nzambi uvwa usanganyibwa pààpa wawa, ubuulula Dîyì adi, wela lubila ne: "Nzambi Wanyi, WàNdekèdì bwa cinyi?" Misambu miine yivwabo bimba mu ntempelu ayi, yivwa Davidi mubenzèle kùkaavwa bidimu ayi, yitangila Kilisto. "Mifuba Yaanyi yònsò yikaadi miNtangile. Bâtubulu byanza Byanyi ne makàsà Aanyi." Nenku ki bôbò abu biimane mwaba awu, bimba yôyi ayi, kadi Muntu mwine mwena bwalu mwikàle ufwa pa nkuruse. Nenku paakamanabo kujikija ne . . .

<sup>191</sup> PaakafwaYe, Nzambi wa mu Dyulu wakatuuluka panshi, anu mwakatuulukaYe pa Mukuna wa Sinaayi, ne Kapyà kaa Cijila, kadi kwosha cilàmbà cikudika cya mu ntempelu aci kuumukila kuulu too ne kwinsi, kucipanda bipese bibidi. Kadi civwabo mwa kwenza ncinyi? Kutuma anu mèsù pambelu batangidila pa dididiishi dya ntempelu adi, ku Kalvariyo, s'ki Nzambi wawa mushaale mumweneke patooke, Mulambu awu.

<sup>192</sup> Kadi kî mbanji anu kuCimona to, nansha leelu ewu. Nzambi mu dituku dya ndekeelu edi mmupande bilele abi, mutwale Dîyì dya cikondo eci dishaale dimweneke patooke, kadi bôbò kabayi anu baDimanya to. Kabeena anu baDimanya to. Mbi—mbitambe kupwekela. Nwamonu's, mbitambe anu kupwekela. Bidi kule be ne maalu a pa buloba.

<sup>193</sup> Mvwa muyiishe dituku dikwabo mu cikongo kampanda, pa: "Kwikala mupâle." Dimwe dya ku adi panshi aa ndi muswe kwakula pa cyôci aci: "Kwikala mupâle." Twètù bônsò tudi bapâle bwa muntu kampanda, pa nanku—pa nanku nêngiikalè mupâle bwa Kilisto. Pòlò wakamba "muvwabo bamwangata bu mupâle." Cya bushuwa, bikengela wikalè nanku. Nwamonu's, bikengela bulù bwa kukwatakaja bintu pamwe. Nwamonu anyi? Ncya bushuwa.

<sup>194</sup> Pa nanku monaayi cibwikilu, mubidi wa buntu. To, mpindyewu, bantu banangi baa mpekaatu kabavwaku bafwanyine kumona aci to. Batendeleedi bavwa beeyemene bilele abu, kabavwaku bafwanyine kumona aci to, bwalu Yèyè uvwa muntu. Bwa cinyi? Mubidi wa buntu awu uvwa musokoke Nzambi.

<sup>195</sup> Mpindyewu, bu ne Yèyè uvwa Dikunji dinene dya Kapyà dyàkapwekà, nwamonu's, bu Dikunji dinene dya Kapyà dipweke ne dibaleeje civwaYe, ne Yèyè uvwa Dikunji dinene dya Kapyà edi, nunku's mbiitabuuje aci; bu ne Yehowah uvwa muye wenda wendakana utwa eku utwa eku.



Kadi nudi bamone cyakenzaYe, bwa kumonaYe mwa kucinguluka bônso beena meeji, beena lungenyi abu, Yêye wakaDibuulula anu bu mwakalayaYe Môsà amu, nwamonu's: "Nèngààkwile naabo ku Muprofeta." Ne Yêye uvwa Mwânà wa muntu, Muprofeta. Ki bamwe baabo kuCijingululabo, biipacila ku cya pa lukama cimwe cya umwe pa lukama pa buloba, ki baakaCiitabuuja; bakwabo bônso kabaakiitabuuja to. Kadi, ki civwaYe, nansha nanku.

<sup>196</sup> Kadi's ki Nzambi wa Bukole nyawu uvwa usanganyiibwa mwaba awu mumweneke patooke, Nkwasa wa Ngàsà awu! Wàkafwà pavwa bânà Bende Yêye mwine bamba. . . Bânà Bende Yêye mwine mwaba awu, bamba ne: "Katwena baswe kuMwakidila nansha! Atukatukile apa!" BaMutwila mate.

<sup>197</sup> Cifwanyikijilu, kale wawa, pavwa Davidi umuka mu ntempelu, mfumu mubengiibwe. Wènda ùpweka ne mùsèèsù, kadi kalumyana kakwabo kîpî, kakulumpe kaa bulema kenda kadikoka, kàvwà kakayi kamusweku kwônso aku to, kumubiikilaku ne "cyena lubombo cya kale" anyi cintu kampanda, kumutwila anu mate mwîsù's. Ki mulami awu kutuula mwele wa mvita, wamba ne: "Bwa mêmè ndekele kabwa kaka ne mutu kunshingu; kiikàle katwila mfumu wanyi mêmè mate?"

<sup>198</sup> Davidi ne: "Mulekèle, Nzambi ngudi mumwambile nanku." Pàmwàpa Davidi kavwa mumanye cyakambaye aci to. Kuyaye wènda ùbànda mukuna, ùtàngila paanyima, ùdila mwadi.

<sup>199</sup> Bidimu nkama mwandamukulu kuumukila apu, Mwânà wa Davidi wàkabànda mukuna mweumwe awu, ùtàngila kwaka, ùdila Yelusalema, Mfumu mubengiibwe. KuMutwilabo mate mwîsù.

<sup>200</sup> Kanwenaayiku numona anyi? Ncintu cimwecimwe aci. Nudi numona mudi Dîyî adi dyenda dipweka ditungunuke, dipweka dyenda ditungunuka leelu ewu anyi? Misangu yônso dibengiibwe kudi ciibûngî, nwamonu's, kadi diitabuujiibwe kudi banyààbanyà.

<sup>201</sup> Mpindyewu, nwamonu's, kabavwa mwa kuDiitabuuja to. Beena Ngelika abu, kabavwa mwa kuMumona to, Úvwa mu ntempelu Wende wa buntu. "Mona's," muvwabo bamba, "dînà dya muntu ewu's n'Yesu; Yêye's mmufumine ku Nazaleeta."

<sup>202</sup> Mpindyewu, bavwa ne dînà anu dimwepele kuntwaku mu miine matuku awu. Bu mudi, "John, Jim," bamba ne: "John wa ku Jeffersonville, Jim wa ku New Albany," anyi cintu cya mushindu awu, nudi numona's.

<sup>203</sup> Yêye kwamba ne: "Ewu n'Yesu wa ku Nazaleeta. Mbiitabuujiibwe kudi bônso ne mamw'Ëndè baakamwimicisha kudi musalaayi kampanda." Nwamonu anyi? Nenku cikondo aci ki muvwabo menemene biitabuuja nanku. Cya bushuwa!

Nenku wàmba ne bavwa bamba, mpindyewu ne: “Nenku ewu n’Yesu wa ku Nazaleeta.” Nudi numona anyi? “Nganyi’s Yèyè?” Nwamonu’s, kabavwa mwa kuumvwaku Aci to.

<sup>204</sup> Kadi, mona’s, Dìyì edi bwa dituku adi, pavwaYe uyiisha, wàkamba ne: “Kenketaayi Mifundu. Mu Yôyi mmunudi nwela meeji ne nudi ne Mwoyi wa Cyendeleele, kadi Yôyi’s ki yidi yifila bujaadiki bwa ne Mêmè ndi Nganyi. Panwikala kanuyi mwa kungiitabuuya Mêmè to; mpwayi Mêmè mwoyi, bu cibwikilu, yitabuuyaayi Dìyì dìdì dipatuka adi. Ibidi mbujaadiki,” mwakambaYe, “Mêmè ndi ngaakula ne Taatù udi ungaakwila Mêmè.” Amen. Ncya bushuwa’s.

<sup>205</sup> Nyewu ngaakula bwa Dìyì dya dituku edi, ne Taatù uDishindika. Mpindyewu bwenu nwènù aci mbujaadiki anyi? Mbwôbu, nwamonu’s. Mushindu awu ki udi ukengela bwa kuulaci.

<sup>206</sup> Monaayaaku mu Kolinto Mwibidì mpindyewu, ku... Kolinto Mwibidì, nshapita mwi3, ku mvensa mwi6, ntempelu wa kale uvwa muteeke Nzambi paanyima paa biseba bya kale, musokome beena Yuda. Pààkapandikà cilàmbà cikudika cya kale aci, beena Yuda bacidi anu... bafomija ku ne Yèyè uvwa Nganyi, ne ku ne Yèyè ucidi Nganyi. Kadi pashiishe Mpenta kubuululaye ne Nzambi mulelela ne udi ne mwoyi awu uvwa Nganyi, pààkapandiibwà cilàmbà cikudika aci bipese bibidi, kudi Nzambi, kuumukila kuulu. Cibwikilu aci cyakenza nanku bwa cinyi? Cyakenza nanku bwa cinyi?

<sup>207</sup> Bwa cinyi nkulwe Mukenji wa mushindu awu leelu ewu bwa kwenza cidìWu mwenze eci? M’Mulwe bwa cinyi? Bwa cinyi?

<sup>208</sup> Kuvwa muntu kampanda uvwa mwa kumbiikila, dituku dikwabo anu abidi adi panshi aa, ùjinga kukokangana naanyi pa bidi bitangila cikondo cya—cya ekeleeziya, ne: “Nzambi uvwa mu ekeleeziya Wende munsantu,” ne bintu bya mushindu awu. Ki mêmè kulwa kujandula ne ùvwa mmuyiishi mukaji kampanda, ki mêmè kumba kubilekela’s. Nwamonu’s, bu ne ùvwa mmuntu mulume nunku mbilengaku, bivwaku mwa kwikala bishiilangane’s. Kadi, pa nanku, kadi bidi ne dikwacisha kaayi bwa kuya too ne mu ditunga dikwabo mwamwa, padibi bikengela mêmè kushiya disangisha apa bwa kucyenza, nudi numona anyi? Ki pa nanku mêmè kubalekela naka’s. Mpofo ulombola mpofo, s’badi—badi bapona bônso mu mukidi.

<sup>209</sup> Pa nanku, pa nanku mpindyewu mu cikondo eci, padi cibwikilu cya kale cya cyena mangumba ne cya bilele cipandiibwe, cyumushiibwe pa Dìyì dya Nzambi, bwa Dimone mwa kumweneshiibwa! Nudi numona cîndì muswe kwamba aci anyi? Cilele cidì cyamba ne: “Bintu byônso abi bikaadi bimane kupita.” Lekelaayi Cibweleku ndambu. “Bintu abi bikaadi bimane kupita.” Kadi, mu dituku dya ndekeelu edi,

cibwikilu cya bilele aci ncipandiibwe bipese bibidi, nenku s'ki Dikunji dya Kapyra didi diimane edi. Nwamonu anyi? S'ki Yèyè ewu, umwenesha Dîyî bwa dituku edi. Cibwikilu ncipandiibwe.

Mpindyewu, baa pa buloba, kabeena anu baDiitabuuja to. Nansha kwikàle cinyi, kabeena baDimonaku to. Kabeena baDimonaku to. Kî nDitumiibwe bwabo bôbò to.

<sup>210</sup> Vulukaayi ne, kî nkudi Sodoma kwàkabuuludiibwà Mwànà wa Nzambi to; bavwa mbaamusanjeela babidi abu. Ncya bushuwa.

<sup>211</sup> Kadi, eci, Nzambi Yèyè mwine mu mubidi wa buntu wakabuuludiibwa kudi Abraham, Musungula. Kadi tangilaayi cyakenzaYe bwa kuDibuulula. Nenku mpindyewu Abraham wakamanya, paakamanya Yèyè ewu civwa mu meeji a Sarah paanyima Pende apu, yèyè kwamba, kuMubiikila ne: “Elohim! Musadidi Webe. . .”

<sup>212</sup> Tangilaayi mpindyewu, bwa cyôcì kumweneshiibwa. Dîyî didi ne cibwikilu pa Dyôdi bidimu byônsò ebi, kumpala kwa bantu ne: “Kacyenaku mwa kwenzekaku to.”

<sup>213</sup> Nudi bavuluke diyiiisha dîngààkayiishà mu dinda dîngààkuumukà mwab'ewu musangu wa kumpala, pa Goliyata ne Davidi adi anyi? Ngàkamba ne: “Tangilaayi anu mwedi wa kadyombo wawa, wàmba ne ‘matuku a bishima akaadi mamane kupita.’”

Tangilaayi mikaba ya mèyî ayi mudiyi milondangane, tangilaayi mukaba ne mukaba wônsò, mushindu udiCi cyenda cilwa citambe kutooka; panwikala ne maci a kuumvwa, nwamonu's, ne mèsù a kumona.

Cinyi? Mèmè kwamba ne: “Ki bukwântèndeleele bunene budi bwimane pààpa bwabwa, bwamba mu cikondo eci cya maalu a mamanya ne, aci kacyenaku mwa kwenzekaku to.” Kadi mèmè kwamba ne: “Nzambi. . .” Mu Bukênkè abu, kumpala mene kwa kukwaciibwaBu fôtô, pa kumusha anu musangu umwepele awu; kabuvwaku bwanji kukwaciibwa fôtô musangu awu to. Kuvwa nku musulu kwaka; kabavwaku banji kuBukwata fôtô to. Nwamonu anyi? Mèmè kwamba ne: “Yèyè uvwa mungambile ne necyenzeke; Yèyè uvwa mwa kwenza dibiikila ne divwa mwa kutangalaka mu matunga ônsò.”

<sup>214</sup> Nansha mene Docteur Davis, wàkamba ne: “Wèwè ewu, ne kalaasa kashaadile aku, mubwele anu mu kalaasa keetu kaa mwandamuteke aka, ukasambidila bamfumu ne bakookeshi, ne ubanga ditabuluja dya ditangalaka too ne mu matunga ônsò?”

Mèmè kwamba ne: “S'ki cidi Yèyè mwambe.”

<sup>215</sup> Kadi's ncyenzeke. Nwamonu anyi? Nwamonu's, ncyenzeke. Ki mudi bwalu nanku, ne, Yèyè kèna dijinga ne dyumvwija nansha. S'ki Yèyè wadyènji awu. Nwamonu's, Ūkaadi mumane kucyenza's, aci cidi cidyumvwija nkaayaaci, nwamonu's, ubiikila

Basungula Bende, nwamonu's, mu—mu bipidi byônsò bya nsômbelu. Mpindyewu's ncimweneshiibwe.

216 Mémè kwamba ne Davidi wakiimana kwaka, kalumyana kakese, kancii, kanyikanyi wa muncyônci ne kaamwongo kakobame kônsò, ne ndundu wa nyuunyi mu cyanza. Nenku, mona's, Shawula kumutangila, mfumu wa kasumbu kaa bambi's, kwambaye ne: "Mona's, wêwè, kutu nansha mulongeshiibwe to!" Yêyè ne: "Anji indilabi tũng ní ndiku mwa kukupa dipolome dya Ph.D. anyi ní ndya bishi." Kumuvwadikaye bya mvita ebi, byôbì. . . Kujandulaye ne kabivwa bikumbana muntu wa Nzambi to.

217 Yêyè ne: "Nkopolaayi cintu eci." Yêyè ne: "Ncyêna ne cîndî mumanye pa cyôci aci to." Yêyè ne: "Ndekelaayi nye mu mushindu wũntũ mémè mumanye, wũmvwà mulwangane naawu ne nyama wa ntambwe, wũmvwà mulwangane naawu ne ours awu." Úvwakũ muntu wa mwitu's. Yêyè kwamba ne: "Ndekelaayi nye mu mushindu ewu."

218 Ki mukulumpe Goliyata ewu kwambaye ne: "Nukaadi nuntumina kabwà bwa kulwangana naanyi?" Yêyè ne: "Nênkusomèkè anu ku lusongo lwa difuma dyanyi edi kadi nkudike citalu cyebe kuulu kwaka bwa nyuunyi kucidyayi."

219 Davidi kwamba ne: "Wêwè udi utwilangana naanyi bu mwena Peleshete, ne bivwalu bya mvita ne difuma, kadi mémè nênsambakeenè neebe mu Dîna dya Mukalenge Nzambi wa Izaleela." Tangilaayi muprofeta awu, Davidi, yêyè ne: "Leelu ewu mémè nênkosè mutu webe kunshingu aku." Amen! Kaa, ekelekele! ùvwa mumanye civwaye naaci, Ewu uvwaye mwitabuuje, ne ùvwa mutwishiibwe menemene ne Yêyè awu uvwa ne bukole bwa kulama civwaye muMwomekele. Nudi numona anyi? Ki kwenzekaci nansha bishi.

220 Kaadîyi kaa kale kaa ne, "Matuku a bishima akaadi mamane kupita" aku, bimanu abi mbyupudiibwe! Yehowah uciidi anu mwimane mumweneke patooke, ùmwênesha Dîyi Dyende, Yêyè udi mubuulula awu. Ncya bushuwa. Monaayi.

221 Ekeleeziya wa Bisamba bya bende udi pende mufomija kumpala kwa cibwikilu aci, paanyima paa cimane kupandiibwa ne cileeye Nzambi, cibwikilu cya butendeleedi. Mushindu kaayi? Pa kubwikila cyakabidi Dîyi mu muntu. Ncyôci aci menemene cyàkapangà Izaleela kumona. Bu ne civwa m'Mwanjelo kampanda anyi cintu kampanda, nunku Izaleela mmuCitàbùùje. Kadi bu muvwaci kaciyi mwa kwikala Mwanjelo to, bivwa bikengela ciikalè muntu. Amen!

Nzambi kêna mwa kunyangakaja Dîyi Dyende to. Mu matuku a ndekeelu bidi bikengela ciikalè cyakabidi cintu cimwecimwe aci. Nwamonu anyi? Cyàkafofomijà Izaleela ncinyi? Yêyè Muntu awu. "Wêwè mwikàle Muntu kadi uDivwija Nzambi." Ki cyakaMushipeelabo, nenku, leelu ewu, bwalu

Mukenji mmulwile mu muntu kaciyi mu Banjelo to. Nwamonu anyi? Nzambi kèna mwa kushintulula mushindu Wende nansha, kushintulula Dîyî Dyende. Ûtu mwambe ne Yêyè katu mushintuluke to. Nwamonu anyi? Monaayi, mbilayiiibwe! Kadi baa Bisamba bya bende mbafofomijiiibwe leelu ewu anu muvwa Izaleela, bwalu (cinyi?) bwa cibwikilu. Nzambi mubwikila mu muntu, cyakafofomija Izaleela.

Monaayi, citu anu cifofomije muntu. Muntu kampanda, neCimufomije; mukwabo yêyè, neCimubuwile Bulelela. NeCibwikile mèsù a umwe, ne necikangule mèsù a mukwabo.

<sup>222</sup> Tangilaayi, Yesu wakiimana e kwamba ne: “Ee, dîna dyebe didi—didi—didi n’Simona, ne dîna dya tatwèbè divwa n’Yona.”

Yêyè kwamba ne: “Mukalenge Nzambi!” Nwamonu anyi? Filipo. . .

Yêyè ne: “Wâmanyî munyi?”

Yêyè ne: “Monaayi mwena Izaleela, mwena munda mudi kamuyi budimu!”

Ki yêyè ne: “Laabi, Udi mummanyè dîbà kaayi?”

<sup>223</sup> Yêyè ne: “Kumpala kwa Filipo kukubiikilaye, pauvwa mwinshi mwa mucu apu, Mwawa mukumone.”

<sup>224</sup> Yêyè ne: “Laabi, Udi Mwânà wa Nzambi. Udi Mfumu wa Izaleela.”

<sup>225</sup> Ee, mwaba awu uvwa mwimane, aba bavwa bamba, ne: “Yêyè m’Beelezebula.” Nwamonu anyi? CyakenzaCi ncinyi? Cikangula mèsù a ewu, cifofomija mukwabo. Baakwidi baakamba cinyi? “Mona’s, Muntu wawa m’Beelezebula!”

<sup>226</sup> Mukaji mutekete awu yêyè wakamba ne: “Ndi mumanye ne Maasiya ulwalwa, udi ubiikidiibwa ne m’Mulaaba Maanyi awu. Udi umona’s, Mulaaba Maanyi awu nealwe. Katwena bapete baprofeta. . . Wêwè udi ne cya kwikala anu muprofeta. Kadi Mulaaba Maanyi nealwe. Tudi baMwindile. Aa mmatuku a ndekeelu bwa baa Bisamba bya bende. . . anyi bwa beena Yuda.” Yêyè ne: “Edi ndituku dya ndekeelu.” Nwamonu’s, ne beena Samaaleya ne beena Yuda bônso bavwa bindile Maasiya. Nwamonu anyi? Yêyè ne: “Cikondo cya kumwenekaYe ncyôci eci. Tudi bamanye ne, paalwaYe, Yêyè ki wënza bintu ebi. Yêyè ki watwambila maalu aa.”

Yesu kwambaYe ne: “Ndi Yêyè awu.”

Mèsù ende kukangukawu, a baakwidi ôwò avwa mfofomijiiibwe.

<sup>227</sup> Ki citu Evanjeeliyo wenza misangu yônso ncyôci aci. Ûtu ukangula mèsù a bamwe, ubuulwila bamwe Bulelela, eku Ûfofomija bakwabo; ùdi ne dyumvwija pabidi. Bamwe badi mwa kwangata Mwânà awu e kutangilaMu buludi, kadi kufofoma;

bakwabo badi mwa kuMwangata kadi kupatuka Nende, ki dishiilangana ndyòdi adi.

<sup>228</sup> Anu mwakenzekabi mu cikondo ne cikondo cyònsò, Bunzambi bubwikila mu mubidi wa buntu. Monaayi, Yèyè ngwâkenza. Baprofeta bavwa Bunzambi, bubwikila. Bavwa Dìyì dya Nzambi (mmwômò anyi?) dibwikila mu mubidi wa buntu. Pa nanku, kabaakamona nansha mwine Mòsà wetu awu to, nwamonu's, Yesu.

<sup>229</sup> Monaayi ne paanyima paa biseba bya kale bya tusengelanshimba mu ntempelu wa kale awu, pavwa Dìyì dibwikila, pavwa Dìyì dimweneshiibwe pa bipese bya mabwe.

<sup>230</sup> Mpindyewu, nênteetè bwa kujikija munda mwa tusunsa tutwe ku makumi abidi mpindyewu, mêmè ne mushindu, bwa kwimanyika pa dîbà dikumi ne dimwe ne tusunsa makumi asatu. Monaayi, bu nwênù mwa kumona, ngâpicishi amwe mabeji mwab'ewu, nudi numona's, bwa kubenga kuya... bwa mêmè kubenga kukosa... kubènga kutàmba kubileepesha. Ndi mumanye ne nukaadi bumvwe luuya lukole, bacyoke.

<sup>231</sup> Paanyima paa ntempelu wa kale, mu cilàmbà cikudika amu, civwamu ncinyi paanyima apu? Yehowah uvwa cinyi? Civwa cisokoka ncinyi paanyima apu? Civwa cilàmbà cikudika cisokoka ncinyi? Kaa, aleluuya's we! Civwa cilàmbà cikudika cisokoka ncinyi? Civwa cisokoka Dìyì. Cilàmbà cikudika, biseba bya kale bya tusengelanshimba abi, bivwa bisokome, bivwa bisokoke Dìyì ku mèsù abo, a mubidi. Paanyima apu, kabidi, pavwa màmpà a baakwidi. Paanyima apu, kabidi, pavwa Butumbi bwa Shekinah. Kadi byònsò abi bivwa bisokoka kudibo. Byònsò abi bivwa bisokoka. Butumbi bwònsò bwa Nzambi buvwa anu paanyima paa ciseba cya kale cya kasengelanshimba aci, ncyà bushuwa, byònsò biikàle bisokoka ku dîsù dya mubidi.

<sup>232</sup> Mbisokoka leelu ewu, kabidi. Badi babibiikila ne “musùmbà wa bansantu babunguluki baa mu malaba, bakolessi baa maalu,” kadi kî mbamanye ne cidi cisokoka paanyima apu ncinyi to. Ki cidibo kabayi bamanye ncyòci aci. Nwamonu anyi?

<sup>233</sup> Pashiishe pàakalwà Nzambi, mu luse, kupanda cilàmbà cikudika aci bwa kumonabo, bavwa batambe kwikala bajingila mu bilele byabo mu mushindu wa ne bôbò...cicivwa anu cisokoka kudibo, nansha mene too ne ku dituku ditudi edi.

<sup>234</sup> Bya mwomumwe mpindyewu! Butumbi, Bukole bwa Nyuma Mwîmpè, Butumbi bwa Shekinah bùdì bùlwa pa mwena kwitabuuja abu, mpindyewu ndi nswa kwamba mwena kwitabuuja mulelela, udi wenza bwa byenzedi bya Nzambi ne diitabuuja kubwelabi munda mwende awu, bwa kwitabuuja Dìyì dya Nzambi, byònsò abi mbisokoka ku mèsù kwabo. Badi bamba ne: “Bintu abi bikaadi bimane kupita.” Nudi numona's, bacidi anu ne mwoyi paanyima paa cibwikilu aci.

Nwênù kanucyena kabidi paanyima paa cibwikilu aci to, Bânà bakese, Nzambi ukaadi mumweneke patooke kunudi.

<sup>235</sup> Dituku dikwabo, Mwaneetu Fred Sothmann, Mwaneetu Tom Simpson. . . Ncyêna mumanye nî ûkaadi mufike apa anyi kî mmwanji kufika. Bààbûngì baa kutudi bavwa ku ekeleeziya kampanda wa ba-Baptistes, ki mwambi awu kwambaye cintu kampanda civwa cyumvwike cilenga cya dikema. Twêtù bônso kwamba ne: “Amen!” Muntu ne muntu mu ekeleeziya amu kunyenguvula nshingu e kutangila paanyima. Nwamonu anyi? Nwamonu anyi? Twêtù mbavwa bapete kasunsukila kaa dyâmpà kavwa kafumine paanyima paa Butumbi bwa Shekinah apu, nudi bamanye’s, ne tuvwa ne disanka ndambu dya kukâpeta. Tuvwa bambe, mu ngaakwilu mukwabo ne: “Twasakidila, Mukalenge!” Nwamonu anyi? Nunku, paakenzabo nanku apu, bakwetu abu bavwa batambe kwikala babwikila mu mushindu wa ne baakaditwa anu mu diciseka. Kabavwa bamanye ne cyônsò Aci civwa ncinyi to. Nwamonu anyi? Bacidi anu babwikila. Nunku, kudi bamwe munda ne bakwabo pambelu. Nunku ewu. . . Kadi Nzambi mmumweneke patooke bwetu twêtù, musokoka. Bya mwomumwe mpindyewu!

<sup>236</sup> Pashiishe paakalwa Nzambi, mu luse Lwende, kupanda cilâmbà cikudika apu, Wâkashâàla mumweneke patooke. Kadi, bôbò bavwa batambe kwikala batukine mu bilele byabo abi, mu mushindu wa ne Yêyè ucivwa anu musokoka bwabo bôbò.

Bya mwomumwe mpindyewu! Butumbi bwônso abu, busokoka, mbusokoka bwetu twêtù mu Kilisto, Dîyì, Yêyè udi wetu Ntempelu awu.

<sup>237</sup> Kaa, mpindyewu, nebikengele bwa ngondoleku ndambu mu cyôci eci. Numfwileku luse bwa disaluka dyanyi mu dinda emu, kadi, kaa, nkaadi—ndi mujinge kutwala cyôci eci kukaadi ntanta mule be, ndi. . . cidi anu kacya cyanswika munda mwanyi emu. Nwamonu anyi?

<sup>238</sup> Monaayi, Butumbi bwônso bùdi mu Nzambi abu budi mu Dîyì. Mabenesha ônsò àdì mu Nzambi awu adi mu Dîyì. Mbisokoka, bwa mwena bupidya, kudi bilele. Nudi bumvwe cîndi muswe kwamba aci anyi? Kadi Byônso bidi mu Kilisto. Cyônso civwa Nzambi mwikâle, Yêyè *wakaDishiya munda mutupu*, “kenos,” ne wakabwela munda mwa Kilisto; ne twêtù, mu Kilisto, tudi paanyima paa cibwikilu.

<sup>239</sup> “Ee, ndi munda mwa Kilisto,” mùdi wamba. Kadi pashiishe witabuuja ne kudi Nzambi yisatu anyi? Ubatiiza mu dîna dya “Taatu, Mwânà, ne Nyuma Mwîmpè” anyi? Witabuuja bilele byônso ebi ne bintu byônso byûdi witabuuja, bya bakulu ebi anyi? To, wêwè uciidi anu paanyima paa cibwikilu. Nwamonu anyi? Bwela munda mwa cibwikilu. Yêyè, Kilisto, udi Dîyì.

240 “Mushindu kaayi? Mêmè ncyêna ngiitabuuja dyondopa dya kudi Nzambi to. Ncyêna ngiitabuuja bishima ebi ne bintu bu nanku nansha.”

241 Ee, udi umona’s, wêwè kwêna—wêwè kwêna munda, munda mwa cibwikilu to. Kwêna ne cyûdi mumanye pa Cyôci aci to. Wamonu anyi? Kilisto udi Dîyi! Ne patudi mu Dîyi, tudi munda mwa Kilisto. Kadi mmunyi mûndi mwa kwikala munda mwa Kilisto, mwikàle mvila Kilisto? S’uvwa n’Yêyè wákamba ne: “Dîyi nansha dimwe kadisakidiibu anyi kadyumushiibu” awu. Mmunyi mûdi mwa kuumushila ne kusakidila, dîbà adi? Wamonu’s, bidi bileeja ne ncibwikilu kaayi cidi cikubwikila aci. Nwamonu anyi?

242 Twêtù munda Mwende! Dîbà adi twêtù, biikàle munda Mwende, tucidi anu babwikila bwa balongi baa maalu a ntendeleelu ne balongeshi baa tulaasa tutumbuke baa pa buloba ebu. Nwamonu’s, bwetu Butumbi butudi naabu ne tusankila abu, tucidi anu babwikila bwa beena pambelu abu. Bôbò badi beela meeji ne tudi “bapâle, batomboke,” kabidi’s. Nwamonu anyi? Nwamonu anyi? Ncya bushuwa. Kadi twêtù badi munda emu aba, munda mwa Kilisto, babatijiibwe munda Mwende, (Kolinto wa Kumpala 12), munda Mwende, tudi baabanyanganyi baa Butumbi ebu. Nwamonu anyi? Kadi kî mbàdi pambelu to; wêwè ucidi anu utangila munda, mwikàle uCivila. Nwamonu anyi?

243 Nenku mpindyewu tudi babiikidiibwe bwa kubwela munda Mwende, bwa kwikala baabanyanganyi baa cyônsò cidiYe aci. Tudi babiikidiibwe bwa kubwela munda Mwende, ki cidi cisokoka beena bupidya, kudi cibwikilu cya mubidi wa buntu. Nwamonu anyi? Mbamanye bwine Butumbi abu, batu baBubala, Budi mu Dîyi mwab’ewu, “Butumbi bwa Nzambi” ne bintu bya nanku awu, cidi anu mwaku cyanaana bwabo bôbò. Bwetu twêtù, ndimweneshiibwa! Nwamonu anyi? Kacicyena kabidi mwaku to; mbulelela! Amen!

244 Nzambi wakamba ne: “Bukênkè bwikalèku,” aci civwa mmwaku. Kadi mpindyewu kukaadi bukênkè. Kî mmwaku to; mbukênkè. Nudi bumvwe cîndi muswe kwamba aci anyi?

245 Mpindyewu bwetu twêtù kaciyena anu Dîyi difunda to, cidi mbulelela. Tudi munda Mwende. Mpindyewu tudi munkaci mwa kusanka. Mpindyewu tudi tuMubandila. Mpindyewu tudi tuMumona, Dîyi, mwikàle uDimwenesha. Ncisokoka, pambelu pààpa, bwalu (bwa cinyi?) nCibwikila mu mubidi wa buntu. Nwamonu anyi?

246 Kaa, badi bamba ne: “Musumbà wa bantu baba, batu bayeku mu cilongelu cya penyi? Ntulaasa kaayi—kaayi tudibo balonge? Mpenyi, mmu cinyi—cinyi mudibo bafumine? Mbaa mu cisumbu kaayi—kaayi—kaayi?” Nwamonu anyi? Huh! Nwamonu’s, kabeena baCyumvwa to.



247 Muntu uvwa wambila muntu mukwabo, dituku dikwabo, ne: “Bikengela wikalè mwena dingumba kampanda bwa kwikala mwena Kilisto.”

248 Awu ne: “Mêmè’s ndi mwena Kilisto; nciitu nansha mwena dimwe dya ku ôwò awu to.” Uh-huh. Yèyè ne: “Nzambi nyawu mungumushe kansere aka,” ne, “mpindyewu udi welaku peebe meeji bishi bwa ciine aci?” Ûvwa ngangabuka. Yèyè ne: “Ndeejàku mangumba atu enza ciine aci.” Nwamonu anyi? Eyo. Nwamonu anyi? Cicidi anu cibwikila.

249 Twêtù tudi munda mwa Kilisto. Mpindyewu, anu bu musangu awu, beena kwitabuuja balelela bônso badi baMumona, Dîyì dya mulayi dya dituku edi, dimweneshiibwe patooke. Aci’s cidì mwaku munene pawikala mwa kuwumvwa. Nwamonu anyi? Nwamonu anyi? Beena kwitabuuja balelela bônso, bàdì mu Dîyì, badi bamona Nzambi patooke. Cibwikilu cikaadi cimana kupanda, nenku Nzambi mmwimane patooke kumpala kwenu, mumweneshiibwe. Nwamonu anyi? Nzambi, mumweneshiibwe, patooke.

250 Bwa kwenza ciine eci, bikengela cibwikilu cyetu cya kale cya bilele bya cyena mangumba cipandiibwe cyakabidi. Bwa kumona bushuwa ne Cidi ncinyi, bikengela upatuke munkaci mwa cintakanyi aci. Nwamonu anyi? Kwadyakucyenzaku to; nebatungunuke anu ne kwikala bakoka cibwikilu aci kumpala kwebe, musangu wônso ne: “Kaa, kakwena cya nsongò ku Ciine aci to.” Kadi’s n’Cyòcì eci cifunda apa, ne n’Cyòcì eci cimweneshiibwe, nudi numona’s. Nwamonu anyi?

251 Mpindyewu, kadi bu muntu mwa kubenga kumona dîbà, wàmba ne: “Kaa, mwaba awu, ndi mumanye ne Nzambi wakamba ne: ‘Bukènkè bwikalèku,’ kadi cintu bu nanku kacituku to. Mêmè ndi mbwela mu nzubu wa mu buloba. Mêmè—mêmè ngàbèngi bwa kucimona”? Mulumyana awu’s mmupâle. Ûdi ne cintu cipampalamuke mu yèyè amu.

252 Kudi cintu cipampalamuke mu mulume anyi mukaji, udi ne mushindu wa kumona mulayi wa Nzambi, ne kuCimona cimweneshiibwe, kadi pasiishe kubenga kuCiitabuuja anu bwalu dingumba didi dikoka cilàmbà cikudika dicipwekesha. Nwamonu’s, mubwikila!

253 Bwa kwenza ciine eci, bikengela bibwikilu byetu bya bilele bya cyena mangumba bipandiibwe, kudi Nyuma wa Nzambi wa Kapyà ne Mwele wa mvita, ùdì Dîyì Dyende. Dîyì Dyende ditu misangu yônso anu Mwele Wende wa mvita. Nwamonu anyi? Ne Yèyè wakangata Mwele Wende wa mvita dyòdì dituku adi, mùle tente ne Kapyà, ne wàkapanda cilàmbà cikudika aci kuumukila anu kuulu to ne kwinshi. Ûdi wènza cintu cimwecimwe aci ne Mwele wa mvita umweumwe awu leelu ewu! Kaciyi “twitabaayi wanyi, kakanda kaanyi kaa twitabaayi, kateshismu kaanyi—kaanyi” to. Kadi Mwele wa mvita wa Mukalenge, nwamonu’s,

ùpanda cibwikilu aci too ne kwinsi, nenku umona Nzambi mwimane mumweneke patooke, mumwenshiibwe mu Dîyî Dyende. Cintu kaayi cya butumbi cidi cikengela kumona's we! Nwamonu anyi? Eyo. Nyuma Mwîmpè ne Kapya kâà Nzambi, Mwele Wende wa mvita, ùcipanda. Dîyî didi dipanda cibwikilu cya cyena mangumba.

<sup>254</sup> Ee, bu wêwè mwa kwamba anu cyanaana ne, “Dîyî,” kadi Dîyî kadiyi dikwata mudimu? Ndikwacisha kaayi didi Mwele wa mvita mufwanyine kwikala naadi mwab'ewu, paudi wamba ne: “Kawena mwa kupanda”? Wamba ne: “Uh,” kadi kawuyi upanda?

<sup>255</sup> Kadi paudi uteeka Mwele wa mvita wa Nzambi awu kuulu kwaka kadi kutangila mudiwu upanda, wôwò utu—wôwò utu ukwaciibwa kudi cyanza cilongolola ne cituma bwa kwenza nanku. Nwamonu's, ùdi ùcipanda ùcishiya bwashi, kadi's ki Yèyè awu. Ki wôwò awu uleeja Nzambi mumweneke patooke, Yehowah munene awu. Ki Dîyî Dyende adi dimwenshiibwe, citupa cidi cilaya bwa dituku adi. Nudi nuumvwa Aci anyi? Nwamonu anyi? Padi Mwele wa mvita, mulayi wa leelu, nu dituku edi, ùdi ne cya kwikalaku awu, nenku Nzambi wangata Mwele Wende wa mvita kadi kupanda cibwikilu cya cyena mangumba aci too ne kwinsi ucikoka ucyumusha, ne mwikàle uDimwensha ne uleeja ne Yèyè udi mwaba awu, anu Dikunji dya Kapya dimwedimwe adi. Monaayi, aci ki Dîyî dimwenshiibwe bwa milayi ya leelu.

<sup>256</sup> Tudi tuCimona anu mwakamona Peetelo paakambaye ne: “Mukalenge, nkudi nganyi kutudi bafwanyine kuya, paanyima paa bamane kumona Eci?” Kutudi twètù aba bafwanyine kuya ki kwèpi? Tudi bafwanyine kuya kashaala beena ekeleeziya kaayi, patukaadi balediibwe mu Umwepele ewu apa? Nwamonu anyi? Ncinyi cinudi nwènù aba bafwanyine . . . Nudi bafwanyine kuya kashaala beena dingumba kaayi paanyima paa bamane kumanya Malelela aa, nwamonu's, padiwu wôwò miine awu (dyònsò dya kudiwu) aCivila? Dyònsò dya kudiwu! Ncitu mwanji kupetaku nansha dimwepele diikalà mwa kwamba anyi kwenza cintu bwa kuCitwa nyama ku mikolo to. Cya bushuwa. Ncya bushuwa.

<sup>257</sup> Ngâkabanga ngendu eyi mwab'ewu, mwaba uvwa ekeleeziya makumi anaayi ne yibidi mwaba umwepele mituule mfranga yayi; ndi mwenze anu nkufika, ncyakasangana nansha umwepele to. Yònsò wa ku yôyò ayi wamba ne: “Yèyè nyawu witabuuja mu dikubiibwa dya Cyendelele.” Aci's civwa cishiya beena ne anu mikenji ku luseke. Mukwabo ne: “Yèyè nyawu ubatiiza mu Dîna dya Yesu.” Aci's cidi cishiya mikwabo yònsò ku luseke, nwamonu's. Pa nanku, mukwabo wa kudiyi ne: “Yèyè nyawu witabuuja dimiinu dya nyoka. Nyoka pende nyawu kayi ne dimiinu!” Aci's civwa cishiya . . .

258 Bible mmwambe ne: “Nênteekeè lukuna pankaci paa Dimiinu dya mukaji ne dimiinu dya nyoka.” Nwamonu anyi? Nwamonu mwaba awu anyi?

259 Aci, ci—cibwikilu aci, cikaadi cyumushiibwe pa Dîyî. Nwamonu anyi? Ncya bushuwa. Ncibuulwila bânà. Ncyu—ncyumushiibwe. Badi baCimona. Ne pashiishe nebîikalè, mwakambiibwabi musangu kampanda ne...Ncya bushuwa. Nanku’s nebîikalè, mwakambiibwabi musangu kampanda ne: “Paudi umona,” padi cibwikilu eci cyumushiibwe pa Dîyî, padi bilele byumushiibwe pa Dîyî, bu mwakamba Yesu musangu kampanda ne: “Paudi muMmone Mêmè, udi mumone Taatù.” Nwamonu anyi? Nzambi ne Dîyî Dyende bidi umwe. Mpindyewu nuumvu anyi? Padi Dîyî diikàle dimweneshiibwe, Cidi ncinyi? Nwamonu anyi?

260 Yesu wakamba ne: “Kenketaayi Mifundu, nudi nwela meeji ne nudi ne M- . . . Nudi biitabuuje Nzambi, ngiitabuujaayi kabidi Mêmè. Pângùikalà Nciyi ngenza byenzedi bya Taatù Wanyi to, dîbà adi kanuNgiitabuuji to. Kadi pâNgùikalà ngenza cya bushuwa byenzedi, Mêmè ne Taatù Wanyi tudi Umwe. Panudi nuMmona Mêmè, nudi bamone Taatù.”

261 Nanku panudi numona Dîyî dimweneshiibwe, nudi numona Taatù, Nzambi, bwalu Dîyî ki Taatù. Dîyî didi Nzambi. Ne Dîyî, dimweneshiibwe, n’Nzambi Yèyè mwine mwikàle wangata Dîyî Dyende ne uDimwenesha munkaci mwa beena kwitabuuja. Kakwena cidi mwa kuDivwija ne mwoyi to anu beena kwitabuuja, anu beena kwitabuuja nkaayaabo. Kadyena... Kadyakwikala... .

262 Udi mwa kwangata blé e kumukuna mu—mu—buloba bwa mushindu mushiilangane, kaakutolokaku to. Kadi, cidi, bidi bikengela kwikalè bufuke kampanda mu buloba abu bwa kutolwesha blé. Kadi piikalamu kamuyi—piikalamu kamuyi... piikalala bufuke mu buloba kabuyiku—kabuyiku, blé kayi mutolwesha bwa kukumbanangana ne bufuke abu to, kaakutolokaku to. Pa nanku mwaba udi Dîyî dimata nansha mwikàle wa bishi, Dyôdi kadiyi dimate mu mwoyi wa mushindu mujaalame to... .

263 Yesu ngwâkamba nanku awu. “Makwabo akamata ku mwelelu wa njila, mu buloba bwa mabwe, ne nyuunyi ya muulu yakalwa e kuàdya.” Ki pashiishe kwambaYe ne: “Makwabo akamata mu mêmà ne mu mingonga, yôyi eyi kubànda e kuàfyekela dyakamwe,” bilele, mangumba, dyabakana bwa maalù a pa buloba kuDifyekelayi. Kadi kwambaYe ne: “Makwabo akaya mu buloba bwîmpè ne akakwama lukama pa lukama,” ne, “ki Bukalenge bwa Nzambi mbwôbò abu.”

Ncintu anu cyôci cimwecimwe aci, nwamonu’s, bakwabo kabaakwitabuujaku to nansha kakese.

264 Bamwe nebiitabuuje bwa citupa cîpî, bu bayiidi abu. BaakaMulonda, baabûngî baabo, makumi mwandamutekete baakaMulonda munda mwa bidimu, bwa kujandula; bu cidimu cimwe ne citupa nanku awu, anyi bidimu bibidi; anu bwa kujandula, too ne mwakalwabo kujandula kaacintu kampanda mu Yêyè, kamwe. . . bu muvwa mushindu kampanda uvwaYe ne bukole kampanda bwa kwenza bintu ebi, anyi mudi dikamà dya kâlulù, mwena majimbu wa mushindu kampanda, civwaYe mufwanyine kwenza bwa kupatula biine bintu ebi, mushindu uvwaYe mwa kumanya bivwa mu myoyi ya bantu ne bivwabo beela meeji. Ki ndekeelu wa byônsò kujandulabo ne Ûkaavwa wàmba ne Yêyè “mmutuuluke mu Dyulu,” ne Yêyè “uvwa Dîyî Yêyè mwine.” Nenku paakamonabo nanku, aci cyakabapicila. Bôbò kwamba ne: “Muntu nansha umwe kêna mwa kuumvwa Eci to.” Ki kuumuka e kuMushiyabo. Ki mamiinu àkamata mu mèbà ngôwò awu.

265 Cidi citwaluja ku cintu cimweciwe aci, mu disangisha dyônsò, nudi ne beena kwitabuuja baa budîngîbudîngî, beena bupidya, ne beena kwitabuuja. Aci citu mu disangisha ne disangisha dyônsò. Udi ubasanganamu dîbà dyônsò. Bamwe baa kudibo badi badingidija bu ne mbeena kwitabuuja, kadi ki mushindu wa mutambe bubî ngwôwò awu. Ne pashiishe badi ne aba badi beena bupidya anu beetu baa menemene aba; yêyè awu kaakunutacishaku to, udi umuka anu bilenga uya wenda ukupa mutu. Kadi aba badi biitabuuja bya budîngîbudîngî, bamba ne mbeena kwitabuuja abu, mushindu ngwôwò awu, ke mushindu udi ukengela nwênù kutabaleela ngwôwò awu, mbeena kwitabuuja baa budîngîbudîngî abu. Ne pashiishe kudi beena kwitabuuja bashuwashuwale. Nudi numona basatu abu anyi?

266 Kuvwa beena bupidya abu. Mmwenze Yêyè anu wamba ne: “Kudya Munyiinyi wa Mwânà wa muntu,” éyî, balumyana wa yaaya, bwalu bumba butuuka’s!

267 Bakwabo bavwa beena kwitabuuja baa budîngîbudîngî. Baakashaala bôbò too, anu mwakashaala Yudaasa amu, too ne kundekeelu.

268 Kadi pashiishe beena kwitabuuja balelela, kabavwa mwa kuCyumvwija to, kadi baakaCiitabuuja, nansha bishi. Baakaya too ne kundekeelu.

269 Cibwikilu, cilele cya beena bupidya, cyumushiibwe, nudi numona Nzambi. Padi cibwikilu cya bilele cyumushiibwa, nudi mwa kumona ne Nzambi ucidi anu Nzambi wa Dîyî Dyende. Ûcîcîdi anu mushaale mukwate ku Dîyî Dyende. Yêyè udi—Yêyè udi Nzambi, Mwena Dîyî Dyende awu.

Aci ncisokoka paanyima paa bibwikilu bya makoba, bwa bakwabo. Eyowa’s, ncyà bushuwa. Bwa aba badi kabayi mwa

kuya paanyima paa cibwikilu, Yèyè uci di anu paanyima paa bibwikilu bya makoba.

<sup>270</sup> Monaayi. Dìbà adi, twètù, dîbà adi tudi tulwa citupa Cyende, bu mudibi ne wêwè udi cibwikilu cidi ciMubwikila Yèyè. Wêwè udi citupa Cyende, padi anu Kilisto mwikàle munda mwebe, mushindu uvwa Kilisto mwikàle citupa cya Nzambi. Bwalu Nzambi uvwa munda Mwende, muMuvwije Nzambi. Nenku bu mudi Kilisto munda mwebe, ditekemena dya Butumbi, wêwè udi ulwa citupa cya Kilisto. “Ewu udi ungiitabuuja Mêmè, byenzedi bìndì Mêmè ngenza yèyè nèabyènzè pende.” Nwamonu anyi? Wêwè udi ulwa citupa cya Kilisto padi anu Kilisto mwikàle munda mwebe. Dìbà adi ncisokoka mwena bupidya, kadi wêwè udi mumanye ne Yèyè udi munda mwebe. Udi mwele Kilisto udi paanyima paa cibwikilu awu mu ntempelu, dikoba. Dìbà adi twètù, bwal-. . . Paanyima apu, bwa bwalu bwa cibwikilu eci, cibwikilu cyakabidi mu mubidi wa buntu, cidi cisokoka Nzambi (Dîyi) kudi mwena bupidya.

<sup>271</sup> Bu mwakafundiibwabi, nwamonu’s: “Mifunda, nudi mikanda mifundilangana,” mudi Bible mwambe. Mpindyewu, *mukanda mufundilangana* ncinyi? Cidi “dìyi difunda.” Nenku nwènù nudi cidi “cifunda” aci. Mu ngaakwilu mukwabo, udi mufwanyine kuCibala mushindu ewu: “Nwênù,” mudiCi cyambe, “nudi mikanda mifundilangana,” anyi ne, “nudi Dîyi, didì difundiibwe, dimweneshiibwe,” cintu nansha cimwe kacyi mwa kusakidiibwaKu to. Kwèna mwa kwamba ne: “Ndi mukanda mufundilangana,” kadi mwikàle ne nsòmbelu wa mushindu mukwabo wa cintu kampanda pa kuumusha *Eci* cikaadi cimana kufunda to, bwalu cintu nansha cimwe kacyena mwa kusakidiibwa anyi kuumushiibwa to.

<sup>272</sup> Bu mudi Docteur Lee Vayle munkaci mwa kufunda mukanda udi mwende luumu ewu, ndi muswe nuwumone paanyima paa cikondo. Mwaneetu Vayle udi mwab’ewu, udi usanganyibwa mwaba kampanda apa. Mvwa mumumone pambelu. Ngeela meeji ne kèna ne mushindu wa kubwela to. Kadi udi munkaci mwa kufunda mukanda kuntwaku, ne—ne wôwò awu ngwa nkemenu’s, wa Cikondo cya Laodikiya. Nenku ndi muswe bwa nwènù. . . Newupatuke ku mashinyi adi afunda mikanda matuku adi panshi aa. Pa nanku, tudi munkaci mwa kwenza diwubala dya ndekeelu mpindyewu. Nenku pacivwaye ufunda, tuvwa tuyikilanganaPu mwômò amu, nwamonu’s, pa bidi bitangila. . .

<sup>273</sup> Bantu bônso batu misangu yônso anu balwa kûndi, bamba ne: “Mwaneetu Branham, mikungulu mwandamutekete myena dîyi divwa dikungule ayi, ki Yèyè kwamba ne: ‘KuCifundu to, wamonu’s, kadi uCikange,’” ne, “aci ki cìikalà mikungulu mwandamutekete yabuuludiibwa mu matuku a ndekeelu, wamonu’s, mikungulu mwandamutekete miine yikalà mwa kutwambila ayi anyi?” Mpindyewu, aci kacyena cimweka cimpè

menemene anyi? Nwamonu anyi? Kadi ikala mutangile cyûdi wamba paudi wamba nanku.

Yèyè wakamba ne: “Wâmanya kwikadi wâlwa kuCifunda.” Nwamonu anyi? Mikungulu mwandamutekete eyi yidi yâkula mêyi aayi, nwamonu’s, kadi Yèyè kwamba ne: “Kufundu aci to, wamonu’s, kadi bidi bikengela Citwibwe citampi mu Mukanda too ne ku matuku a ndekeelu.”

<sup>274</sup> Mpindyewu muntu kampanda, bààbûngì mbangambile, beena teoloji mbangambile ne: “Mwaneetu Branham, bu Mukalenge Nzambi...” Bôbô ne: “Bu—bu...Ne dilabula dyebe, didi Mukalenge mukupè bwa cisamba Cyende edi,” wamba ciine eci ne didipwekesha dyônso’s, ne, “wèwè’s udi mufwanyine kwikala mwanishila bwa kufunda wèwè mwine—mwine Bible kampanda, Dìyi dyebe wèwè, piikalabi ne Nzambi mmumweneshe.”

<sup>275</sup> Mémè kwamba ne: “Aci ncifwanyine kwikala cilelela.” Nwamonu’s, ùvwa ujinga kumpetelapu’s. Nwamonu anyi? Mémè kwamba ne: “Kadi udi umona’s, ncyèna mufwanyine kwenzaku aci to.”

Yèyè ne: “Kuyi mufwanyine kucyenza bwa cinyi? S’udi ne ngiikadilu yônso yidi yikengediibwa.”

<sup>276</sup> Mémè ne: “Kadi, tangila, dîyi nansha dimwe kadyena mwa kusakidiibwa anyi kuumushiibwa to.” Nwamonu anyi?

<sup>277</sup> Ki yèyè ne: “Ee, dîbà adi, mikungulu mwandamutekete ayi, udi umona’s,” ne, “mikungulu mwandamutekete yidi yituuta makubakuba ayi kî mifwanyine, aci kacyakwikala Dibuulula kampanda dyapeeshabo muntu kampanda anyi?”

<sup>278</sup> Mémè ne: “To, mukalenge, aci ncifwanyine kwikala disakidilaKu dya cintu kampanda anyi dyumushilaKu dya Cintu kampanda.”

<sup>279</sup> Byônso mbibuulula mwômò Amu, ne Bitampi Mwandamutekete mbikangule dibuulula dya civwa Cyôci aci. Ki civwaci. Nwamonu’s, cicidi anu mu Dìyi. Nudi numona’s, kwèna mwa kupatuka pambelu paa Dìyi adi to. Kacyakushiya Dìyi to. Ne Nyuma wa Nzambi kaakushiyaku Dìyi adi to. Yèyè neashaale anu ne Dìyi; ufofomija bamwe, kadi mwikàle utabaja mèsù a bakwabo. Ki cyenzaYe misangu yônso ncyôci aci.

<sup>280</sup> “Nudi mikanda mifundilangana, mibala kudi bantu bônso.” Anyi ne, nudi...Ndi mémè nkudimuna Aci, nkudimuna mu mushindu ewu, nwamonu’s, nCikudimuna anu cyanaana ne: “Nudi mikanda mifundilangana yidi mifundiibwe,” bwalu kwèna mwa kusakidilaKu kantu nansha kamwe to, “mibala kudi bantu bônso; Dìyi dya Nzambi dimweneshiibwe,” mu ngaakwilu mukwabo.

Neuku Peetelo ne Yone, bwa kucileeja, pààkabàndàbo kuntu kwaka, bantu baakamona ne bavwa bapangi ne kabayi balonge

to, kabavwa ne kalaasa kalonga to, kadi baakamona ne bavwa ne Yesu. Nwamonu anyi? Bavwa bapangi ne kabayi balonge to, kadi bavwa mikanda mifundilangana, nwamonu's, kubalabo ne bavwa ne Yesu. Bwalu, Yesu uvwa uDimweneshila mu bôbò, Kilisto mwikàle mubwikila mu mibidi yabo; mumweneshiibwe, muvwijiibwe ne mwoyi.

<sup>281</sup> Bu pavwaYe munda mwa Mòsà apu. Pavwa Dîyì munda mwa Mòsà, ùvwa Nzambi mu mubidi. PavwaDi munda mwa Yesu, Divwa Nzambi mu mubidi. Nwamonu anyi? Cintu cimwepele cyakenzaYe civwa anu kushintulula kwa cibwikilu Cyende cya kwísù, kî n'Dîyì Dyende to, kî ngiikadilu Wende to. Yèyè udi umwèumwè awu makeelela, leelu, too ne kashidi. Yèyè wakashintulula anu mmwenekelu Wende cyanaana. Wàkashintuluka kuumuka ku Noa kuya ku Mòsà; Wàkashintuluka kuumuka ku Mòsà kuya ku Davidi; kuumuka ku Davidi, ku Yozefu; anu nanku too ne mwakalwaYe kubwela mu kaabujima kaa Bunzambi mu ciikadilu cya mubidi. Nwamonu anyi?

<sup>282</sup> Cicidi anu Nzambi umwèumwè awu! Amen. Amen. Ndi ntekemena ne aci cidì cinupeta's. Nwamonu anyi? N'Nzambi umwèumwè awu, kadi Ùdì ùvwàla anu cibwikilu cikwabo. Nwamonu's, Ùdì ùvwàla cibwikilu cikwabo.

<sup>283</sup> Wàkacyènta mu balongolodi, kuvwala cibwikilu kampanda, kuvwala cibwikilu kampanda. Too, ndekeelu wa byònsò, ne mwavuCi kupicila mu cikondo cya ba-Luthériens, kupicila mu cikondo cikwabo, pashiishe ndekeelu wa byònsò Cipatuka cikabwela mu Cijima. Anu pabwîpì menemene ne kufikaCi, muprofeta udi ujuuka cyakabidi. Cidici cyenza, cidì cidyanjila kuleeja Dîyì mu cimfwanyi, cileeja cikaavwaku mwab'ewu, cibүүлula cikaadi cyenzeke, civwabo bashiile mu njila, bwa Ekeleeziya ikalè kayi ne...kayi ùpanga dyumvwa to. Pashiishe padi cyôci eci cijimina, pashiishe, bu mwakamba Yone ne: "Mêmè ndi ne cya kupweka, Yèyè udi ne cya kubànda," dîbà adi byònsò-mu-byònsò bidi bilwa mu Yèyè. Yèyè umweneshiibwa mu kaabujima, kupicila ku Luther, Wesley, ne cikondo cya beena Mpenta, twenda tulwa, twenda tulwa, too padiYe umweneshiibwa mu kaabujima, nudi numona's, ùpweka, anu dimweneshiibwa pa dyôdi, Nzambi udivungulula: NuMumonaayi (Mpindyewu, monaayi.) muujiibwe mu milayi Yende bwa *edi* dituku, bu muvwa bôbò abu naadi.

<sup>284</sup> Mpindyewu Mòsà uvwa Dîyì mu dituku adi, bwalu Dîyì dyakamupeebwa yèyè bwa dituku adi; Mòsà. Yozefu uvwa Dîyì mu matuku awu, mwikàle uleeja cimfwanyi cya Kilisto anu menemene. Nwamonu's, yònsò wa kudibo uvwa Dîyì.

<sup>285</sup> Kadi paakalwa Yesu, Yèyè ki uvwa Dîyì mu kaabujima kaaDi, bwalu ndongamu yònsò nkòong wa bupikudi uvwa muteekiibwe mu Yèyè. Ndongamu yònsò nkòong wa bupikudi

kavwa muteekiibwe mu Mòsà to, kavwa muteekiibwe mu Yozefu to, kavwa muteekiibwe mu Eliya to. Nwamonu's, bôbò abu bavwa anu citupa cya Dìyì, biikàle bafunkuna Dyôdì adi. Nwamonu anyi? Mpindyewu monaayi, lamaayi meeji enu; ki Cyôci cilwalwà eci, bu mùnyakwamba. Nwamonu's, ndongamu yònsò nkòong kavwa mu bôbò abu to. Bôbò bavwa bafunkuna Dyôdì adi.

<sup>286</sup> Ki bwa cinyi, paanyima Pende Yèyè, Kaabujima, twètù katwena mwa kufunkuna cintu kampanda cikwabo to. Cidi ciMufunkuna Yèyè paanyima, Dìyì. *Eci* ki Dibuulula dijima; cintu nansha cimwe kacylene mwa kusakidiibwa anyi kuumushiibwa ku Dyôdì to. Ki Dibuulula dijima *ndyôdì adi*. Byònsò abi, mundidimbi wa Yèyè ùvwà ne cya kulwa; kadi paakalwaYe, Yèyè ki uvwa Mupwangane awu. Ebelu 1: "Nzambi mu bikondo bya kale wakaakwila ne baataatù ku baprofeta," Nzambi wakaakwila ku bibwikilu, baprofeta, "kadi mu matuku a ndekeelu aa kudi Mwan'Ende, Yesu Kilisto." Ki bwalu mbwòbù abu's. Mubuulula kwaka ku Kalvariyo, Mwànà wa Nzambi awu, mubuulula.

<sup>287</sup> Monaayi, "muvwijiiibwe ne mwoyi." Nenku, leelu ewu, padi Dìyì dimweneshiibwe mu mabungu a buntu, bibwikilu, cidi kakuyi mpatà to Dìyì dyùle mu dituku adi, diikàle dyalukila ku Nzambi. Biikàle babatiijiiibwe munda Mwende, bilondeshile Kolinto wa Kumpala 12, tudi tulwa bafwanyikijiiibwe Nende. Amen.

<sup>288</sup> Ngǎmbì ne ntusunsa makumi asatu, kadi ndiku mwa kupeta katanci kakwabo anyi? [Disangisha didi dyamba ne: "Amen."—Muf.] Nwamonu anyi? Tangilaayi, ncyena anu mwa kupicisha eci mwòmò emu to. Monaayi, bafwanyikijiiibwe Nende!

<sup>289</sup> Mpindyewu monaayi. Mbanganyi badi beena mwabo baa Amerike mwab'ewu? Elaayi byanza muulu. Eyo, udi mwena mwabo wa Amerike, pa nanku udi mufwanyikijiiibwe ne ditunga edi. Cyònsò cidi ditunga edi aci, ki cyùdi ne cya kwikala. Ncy bushuwa anyi? Wèwè udi butumbi bwende bwònsò ne udi bundu bwende bwònsò. Udi mufwanyikijiiibwe nende. Wèwè udi mwena Amerike, pa nanku udi mwangàte Amerike. Aleluuyah!

<sup>290</sup> Mémè mvwa ne George Washington paakasabukaye musulu wa Delaware. Ndi mufwanyikijiiibwe nende. Ncy bushuwa. Mvwa ne Abraham Lincoln pàakaakulàye ku Gettysburg. Mvwa mwimanepu. Mvwa ne basalaayi ku Guam, nwènù balumyana, panwàkabàndishà dibendela adi. Mvwapu. Mémè ndi mwena Amerike; ndi mufwanyikijiiibwe nende. Amen. Mpindyewu, bwa kwikala mwena Amerike, bundu bwònsò budiye mwambule mu mvita ya Ditombokela ditunga abu, ndi mubwàmbùle, bwalu ndi mwena Amerike. Ncy bushuwa.



291 Nenku mêmè bu mwena Kilisto, ndi mufwanyikijiibwe Nende. Amen! Mvwa ne Noa paakabwelaye mu bwàtù apu. Mvwa ne Mòsà paakapatukaye mu Ejipitu. Amen! Mvwa Eliya pa mukuna wa Kaamèlè. Eyowa's, mukalenge! Butumbi kudi Nzambi's we! Mvwa nende paakenzaye cyôci aci apu. Bushuwa mêmè mvwa Nende, mêmè kudifwanyikija mu lufu Lwende kwaka ku Kalvariyo pângààkafwà ku maalu a pa buloba, ku mêmè mwine ne ku bilele byônsò. Mvwa mufwanyikijiibwe Nende. Mvwa mufwanyikijiibwe Nende mu dinda dya Paasaka dyakabiikaYe ku bafwe adi. Mvwa mufwanyikijiibwe Nende mu Dituku dya Mpenta adi, paakapweka Nyuma Mwîmpè bu cipeepele cikole cya civuma. Mvwa mufwanyikijiibwe Nende. Cyônsò civwaYe aci ki cîndi, cyônsò cîndi mêmè eci ki civwaYe; amen, biikàle bafwe mu Yèyè tudi bafwanyikijiibwe Nende. CidiYe ki cîndi mêmè. Amen!

292 Cidi ditunga edi aci ki cîndi. Ndi ndyumvwa maleela bwa kwikala cyôci aci. Ndi mudilongolole bwa kwambula bundu bwadi. Ndi mudilongolole bwa kwambula bundu bwa kwikala mwena Amerike. Ncya bushuwa. Kadi ndi ciine aci misangu yibidi bwa Yesu Kilisto! Cyônsò civwàYekù aci ki cîndi. Ntu muswe kwikala mufwanyikijiibwe Nende.

293 Bapostolo abu, musangu wakaalukilabo awu, bavwa beela meeji ne...bavwa babasekeseke, babatwatwatwe mènà a mishindu yônsò ne bikwabo, bôbò bavwa beela meeji ne civwa nduumu lunene bwa kwambula bundu bwa Dînà Dyende.

294 Ndi ne disanka leelu ewu dya kwikala umwe wabo, mwikàle mufwanyikijiibwe ne Dîyì, didi diikàle Kilisto. Bafwanyikijiibwe Nende! Babatiijiibwe munda Mwende, tudi tulwa bafwanyikijiibwe; bafwanyikijiibwe mu cimfwanyi Cyende, bafwanyikijiibwe ne Dîyì Dyende, didi diikàle Yèyè. Piikalabi ne ndi munda mwa Kilisto, ndi Dîyì Dyende; bwalu Yèyè udi Dîyì, ne cidiYe aci ki cîndi. Amen! Nudi nuCyumvwa anyi? Eyo.

295 Dîyì dimweneshiibwe, anyi dibuuludiibwe mu Dibulula didimu adi, dîbà adi aci cidi cimvwija cinyi? Piikalabi ne Yèyè udi Butumbi bwa Shekinah abu, mêmè's ndi citupa cya Bwôbò abu. Amen! Kaa! Amen! Ncya bushuwa. Dîyì Dyôdi diine dibuulula, didi didibuulula Dyôdi diine.

Anji elaayibi peenu meeji! Maalu masokoka a Nzambi matumanyisha mu dituku edi, kudi Musanjeela umwèumwè wa ku Dyulu wâkamanyishiibwa kudibo mu matuku awu awu; monaayi, Dikunji dya Kapyà dimwedimwe dyàkatùmà Mòsà adi; Dikunji dya Kapyà dimwedimwe divwa pa Mòsà dyàkafundà Bible adi; Dikunji dya Kapyà dimwedimwe dyàkatuutakeenà naadi Pôlò mu njila wa ku Damaseke adi.

296 Ki Pôlò kufundaye Dipungila Dipyadiya. Vulukaayi ne, Maataayi, Maako, Luuka, ne Yone, bôbò baakafunda anu

byakamonabo abi; kadi Pòlò uvwa ne Dibuulula. Yéyè awu ki wàkaCipàtula patooke, bwalu wàkatuutakeena ne Dikunji dya Kapyà, yéyè mwine. Kadi elaa yi meeji, dimwedimwe adi . . .

<sup>297</sup> Kwaka naka, Yozefu, bwònsò bwabo baakafunda bivwa munkaci mwa kwenzeka, muntu yònsò wàkafùnda kale mu dituku adi awu. Kadi paakamata Mòsà mu cyalu, ùvwa ne Dibuulula. Yéyè wakatuutakeena ne Dikunji dya Kapyà, nenku Mòsà wakapeta Dibuulula dya mushindu uvwa Genese. Ki kufundaye mikanda yinaayi ya kumpala ya Bible, Mòsà awu ngwàkayifùnda. Aci ncyà bushuwa anyi? Bwalu yéyè wakatuutakeena ne Nzambi mu mmwenekelu wa Dikunji dya Kapyà, mubwikila mu Dikunji dya Kapyà.

<sup>298</sup> Paakatuutakeena Nende Pòlò mu njila . . . Bayiidi bòbò baakafunda anu byakaMumonabo Wenza abi, kadi Mòsà yéyè uvwa ne Dibuulula; kupwekaye mu Ejipitu munda mwa bidimu bisatu e kulongaye, ki kumonaye ne Nzambi wa Dipungila Dikulukulu awu uvwa n'Yesu wa Dipyadipya, Dibuulula's! "Ncyàkashikukila cikeena-kumona cya mu Dyulu to." Ncyà bushuwa. Cya bushuwa!

<sup>299</sup> Kadi anji elaa yi meeji pa Cyòcì aci! Dikunji dya Kapyà dyàkalwà pa bantu bààkafùndà Bible abu adi, ndyòdì Dikunji dya Kapyà dimwedimwe adi mwab'ewu, leelu ewu, diikàle dyumvwija Bible. Amen! Mushindu mwine utudi tuMusakidila bwa ciine aci's we! Dimwedimwe adi! Ndisambiibwa kaayi! Ndifwanyikijiibwa kaayi! Ndi nsanka bikole bwa kwikala mufwanyikijiibwe mu ciine aci, mu mushindu wa mpanga too ne cya kwenza's! Mbîmpè mêmè kwikala mufwanyikijiibwe mu Cyòcì aci pamutu paa kwikala mufwanyikijiibwe ne bònsò ba-Baptistes, ba-Méthodistes, ba-Presbytériens, ba-Luthériens, ne bakwabo bònsò abu. Mufwanyikijiibwe mu Dìyì adi mudi Butumbi bwa Shekinah ne Dibuulula bisanganyiibwa!

<sup>300</sup> Dikunji dya Kapyà diikàle dimweneka ne mèsù munkaci mwetu, dijaadika ne Mukenji ngwa cya bushuwa, bu mwakenzaYe pa Mukuna wa Sinaayi. Vulukaayi ne, kumpala kwa mukenji wa cya bushuwa kupatukawu, Mòsà wakayiisha ne wàkabàlombola too ne pambelu paa Ejipitu; kadi kwòkò aku, kumpala kwa mikenji myena diinà kwediibwayi (kwa Bitampi kutwadiibwabi), Nzambi wàkatuùluka kumpala kwa cisamba ne wàkajaadika ne Mòsà uvwa mutumiibwe kudiYe, (ncyà bushuwa anyi?) mu Dikunji dya Kapyà dyàkambà Mòsà ne ùvwa mumona mu kaacipuka ne dyakule nende adi.

<sup>301</sup> Kaa, mu matuku a ndekeelu aa, pa kumona Dikunji dya Kapyà dimwedimwe adi anu munkaci mwetu menemene, dyamba Dìyì dimwedimwe adi; kacyi anu aci to, kadi diikàle diDyumvwija mu kuDimwenesha, ne kuDijaadika ne, Didi Bulelela.

Pa nanku, bantu kabeena ne mushindu nansha umwe bwa kubengabo kwitabuuja nansha, amba anu bôbô baswe kwenza nanku ku bukole's. Nenku, dîbà adi: "Ewu udi wenza mpekaatu ku bukole paanyima paa mumane kwikala ne dimanya dya Bulelela, kakwena kushaala kabidi mulambu wa mpekaatu to."

<sup>302</sup> Monaayi, Dikunji dya Kapyà dimwedimwe dyakatumiibwa kudi Mòsà ne kudi Pòlò, dyakafunda Bible adi, mpindyewu nditumiibwe bwa kuMubuulula. Ngàsà wa Nzambi, Nzambi udi kayi ushintuluka awu, mwikàle uuja milayi ya Maataayi 28 ne: "Monaayi, Ndi neenu misangu yònsò"; uuja Yone Munsantu 14.12 ne: "Byenzedi bìndi Mémè ngenza, ne nwènù peenu"; uuja Luuka Munsantu 17.28-29 ne: "Mu matuku, a ndekeelu Mwànà wa muntu neabuuludiibwe," nwamonu's, nwamonu's; Maalaki 4 ne: "Monaayi, Ndi nnutumina Eliya muprofeta, wíkala mwa kwalujulula Diitabuuja dya bantu ku Dîyi dya ku cibangidilu." Nwamonu anyi? Mushindu udi eci...Nwamonu anyi? Kaa, ekelekele!

<sup>303</sup> Wàkafwà, mbwa Yèyè kuDibuulula kutudi. Mpindyewu tufwayi ku twètù biine, bwa kuMubuulwila bakwabo. Tufwayi ku bilele ne bikwabo, bwa kuMubuulwila mukwabo. Tufwayi ku mangumba, bwa kuMubuulwila bakwabo.

<sup>304</sup> Monaayi, ntempelu wa kale awu uvwa ne Butumbi bwa Shekinah munda mwende, ne Bukênkè bwa Shekinah pamutu paa Dîyi apu. Dîyi n'Dimiinu; Divwa dipatwila anu beena kwitabuuja nkaayaabu mampà a baakwidi. Mashi kabidi avwa pa cipungidi apu; ne Mashi mmâyi, mâyi àdi afila mwoyi kudi lutete, blé, dimiinu, didi diikàle Dîyi.

<sup>305</sup> Bu mwakamba Yesu ne: "Anu mwàkabàndishà Mòsà nyoka wa cyamu cya kabanda," ki kwambaYe kabidi ne: "Nzambi wakatamba kunanga baa pa buloba mu mushindu wa ne Yèyè wakabapa Mwan'Ende umwepele mulela; bwa ewu yònsò wâMwitabuuja kafu to." Mòsà wakatuuta lubwebwe mu cipeela, kwa kusungila cisamba civwa cyamba kubutuka, anyi bwa kutwala mâyi. Nzambi wakatuuta Yesu, bwa kupatula Nyuma munda Mwende, bwa cisamba civwa cyamba kubutuka. Mashi akapatuka munda Mwende, mbwena kwamba ne: "Mâyi a disukula naawu ku Dîyi." Mumwe ne, Mâyi adi atwadila Dimiinu Mwoyi. Nenku akatwala Butumbi bwa Shekinah; kukenkeshabu pa Dîyi, aci kutwalaci mampà a baakwidi. Kadi mampà a baakwidi avwa anu bwa cisamba cisungula. Uh-huh. Ncya bushuwa anyi?

<sup>306</sup> Nenku kubwela kwa mu cibwikilu, kuya dyamwamwa dya cibwikilu, kubwela mu Bwikadi Bwende, mwine mùdi Dîyi disanganyibwa amu (kí ntwitabaayi to), Dîyi; mwômò amu pa kumona kwa Butumbi bwa Shekinah, Shekinah awu, Bukole, Nyuma Mwimpè mwikàle ukenkesha pa Dîyi, ùpàtula mulayi, bidi bileeja ne wèwè udi paanyima paa cibwikilu. Amen!

Ngăpìci bibwikilu bipanda mùdì Butumbi  
kabùyikù búpwa to, (Uh!)

Aleluuyah, aleluuyah;

Ndi ne mwoyi mu Bwikadi bwa Mfumu.

Ngăpìci bibwikilu bipanda mùdì Butumbi  
kabùyikù búpwa to,

Ndi ne mwoyi mu Bwikadi bwa Mfumu.

<sup>307</sup> Ciseba cya kale cya kasengelanshimba, mangumba awu, mmuupudiibwe. Ndi mubìpandà e kupicilamù, kubwela mu Butumbi bwa Shekinah, ne ndi mmona Dìyì. Ndi mmona Dikunji dya Kapyà dítwa eku ne eku. Ndi mmona Dìyì dimweneshiibwe. CyakambaYe ne Neenzè mu matuku a ndekeelu aa, nyewa ncimona cyenda cikola. Ndi mmona bânà munkaci mwa kudya Dyâmpà dya Shekinah adi difumina ku diboba dya Dìyì adi, bàdì bàDìitabuujà abu. Amen! Edi ndìbà kaayi dya butumbi ditudi ne mwoyi's we! Nudi numona's, Shekinah uvwa pa Dìyì; ne mwinshi amu muvwa Dyâmpà. Ne muvwa Mashi, mamyamina, ciine cidì cìÀpa mâyi. Nyuma ngudi ufila Mwoyi kudi Dìyì. Ne . . .

Mbanganyi bakaadiku babale, bateeleje mukaba wa mêyi pa *Dilumbulwisha?* Eyowa's. Bààbùngì baa kunudi bakaadi bawuteeleje. Nudi numona mwaba awu, bikengela . . .

Dìyì adi didi ne cya kukola. Bwa kukola, bidi bikengela Dyôdi kwikala mu buloba bwa mushindu mwîmpè. Nwamonu anyi? Nenku Nzambi udi wenza mulayi, ne wôwò udi ulenga mwoyi awu, kawena mwa kupangilaku to.

<sup>308</sup> Noa wakindila munda mwa bidimu lukama ne makumi abidi. Abraham wakindila bidimu makumi abidi ne bitaanu, mwindile mwânà. Nzambi nguvwa mwambe nanku, ne aci civwa cikose bwalu. Nwamonu anyi? Ncinyi aci? Dìyì divwa mwaba awu biikàle badyela mâyi ku diitabuuja, ku diDìitabuuja, aci cyakatwala bipeta. Cyakatwala mwânà wa balume; cyakatwala mvula; cyakatwala mvula wa Noa; cyakatwala virgo wâkiimita awu.

<sup>309</sup> Muprofeta kampana wakamba ne: “Virgo neimite difu.” Kakuyi mpatà to nsongaakaji yônsò wakaya kalongolola twende tulàmbà twa mwânà. Ee, muprofeta Yeshaayi ewu uvwa mujaadikiilbwe ne mmuprofeta, mushindika kudi Nzambi. Kadi Mukalenge kwamba ne: “Virgo neimite difu. Mêmè nêmbàpè cimanyinu citambe mfukilu, cimanyinu cinene; virgo neimite difu.”

<sup>310</sup> Mwaba awu, bantu bônsò abu, beena kwitabuuja abu, anu munudi nwênù bônsò emu. Ki kuumvwabo muprofeta awu wamba nanku, nsongaakaji yônsò . . .Muntu yônsò kwambaye ne: “Awu neikalè anu wanyi mwânà wa bakaji. Eyowa's, mukalenge.” Muntu yônsò kuya kasumba tunshesheete ne mikaaya ya mwânà ne byônsò, udilongolola, bwalu uvwa mumanye ne yèyè ki wîkala mwa kumulela. Lukongo alu

kupitalu, ki kudyambidilabo ne: “Muprofeta mujaadikiibwe awu, mushindika kudi Nzambi, mmunyi mudiye mufwanyine kwamba cintu cya mafi? Cidi ne cya kwikala anu nanku!”

<sup>311</sup> Mpaakamana kupita bidimu nkama mwandamukulu, ki paakalelaye mwine mwânà awu. “Maulu ne buloba nebijimine, kadi Dîyì Dyanyi kadyakujimina to.”

<sup>312</sup> “Nenku nebyenzeke mu matuku a ndekeelu,” mudi Nzambi wamba. Nwamonu’s, s’ki twêtù aba, Bu—Bukênkè pa Dîyì. Anu mudi bukênkè bwa dîbà bushindulula dimiinu dyumuka ku butumbi diya ku butumbi amu, twêtù peetu tudi balwe—tudi tulwa peetu batambe kufwanangana Nende patudi tushaala ne mwoyi mu Bwikadi Bwende; bafwanangane Nende, biikàle bakumbanangane ne cimfwanyi Cyende cibeneshiibwe patudi twenda twenda Nende apu.

<sup>313</sup> Tangilaayi numone cidi dîbà dyenza. Udi ukuna dimiinu, cidi cyenzeka ncinyi? Dimiinu adi didi dibola. Munda mwa dimiinu adi mudi mwoyi. Mwoyi udi upatuka ne utwala cicolakola. Mpindyewu, aci kaciyena cifwanangane ne cya ntwadijilu to.

Ki Luther nyêyè awu. Civwa ncicolakola. Eyo.

Ki cicolakola aci kutungunuka, ne katanci aka, kutwalaci mwepu. Nwamonu’s, aci ki civwa ditabuluja dya Wesley; kaciyi cifwanangane ne cikwabo aci to.

Ki pashiishe kulwaku ditabuluja dya beena Mpenta, nwamonu’s, kutwaladi dibatiiza dya Nyuma Mwîmpè. Eyo.

Cyakenzeka ncinyi? Tukaadi tupeta bwowa butoloke pa mwepu. Budi bubanga kumweka bibi. *Eci* cintu, *cyacya* cintu, kaciyi cifwanangane ne Dîyì to. Kaciyi cifwanangane ne bikwabo bya ku Cyôci abi to. Kaciyi cifwanangane ne Lutete lwa ku cibangidilu lwàkayà mu buloba alu to.

<sup>314</sup> Kadi Nzambi uci anuku bwa kwenza cyôci aci—cyôci aci anu dicyenza. Monaayi, cidi cyenza cinyi? Ndekeelu wa byônsò cidi cyalukila cyakabidi ku Dimiinu dya ku cibangidilu adi. PaakalwaYe mu mmwenekelu wa Martin Luther; paakalwaYe mu mmwenekelu wa John Wesley; paakalwaYe mu mmwenekelu wa beena Mpenta; bidi bikengela bwa Yêyè kuDibuulula cyakabidi bu Dimiinu dimwedimwe dyàkayà mu buloba adi, Mwânà wa muntu. WàkaDibuulula bu Mwânà wa Nzambi, mu cikondo cya cicolakola ne bikwabo, kadi mu cikondo cya ndekeelu eci bikengela aDibuulule cyakabidi bu Mwânà wa muntu. Nudi nucyumvwa anyi? Eyo, anu bu ku cibangidilu, mufwimba!

<sup>315</sup> Nenku cicolakola aci cidi cikola cilwa cinyi? Cidi cyenda cikola dîbà dyônsò. Kaacicolakola kakese aku kadi kakola, kadi kakeena anu kafwanangane ne lutete lwa ku cibangidilu alu to. Anu muvwa mukenji wa Luther kawuyi nanku to; to, pashiishe kulwaku mikenji mi—mikwabo, Finney, Sankey,

Knox, Calvin, anu nanku, nansha umwe wa ku yôyi ayi. Yivwa mene anu mukenji's, kadi civwabi, kayivwa mipete Dibuulula dijima dyaCi to bwalu dîbà kadivwa dikumbane to. Kwêna mwa kuteeka mwepu pa ditala kumpala kwa dîbà dyawu dya kulwawu to. Nwamonu anyi? Ne pashiishe, ndekeelu wa byônsò, kudi kwalukila cyakabidi Dimiinuu dya ku cibangidilu divwa diye mu buloba adi.

<sup>316</sup> Nwamonu's, Nzambi udi ulonda bufuki anu menemene. Nwamonu's, Yêyê wakalediibwa mwânà wa mukooko, ki bwa cinyi Wakalediibwa mu cidiilu cya nyama. Bânà baa mikooko kabatu balediibwa mu malaalu to. Nwamonu's, Yêyê wakalombodiibwa too ne ku Kalvariyo. Mwânà wa mukooko, mikooko yitu yilombodiibwa. Ncya bushuwa. Mbuji nyitu yiyilombola too ne ku cishipeelu, nudi bamanye aci, nzubu wa cishipeelu. Mbuji ngutu uyilombola, kadi yôyi bidi bikengela bwa kulombodiibwayi. Huh! Ncya bushuwa. Pa nanku Yêyê wakalombodiibwa too ne ku cishipeelu, nwamonu's, bwalu Ûvwa Mwânà wa mukooko.

<sup>317</sup> Bintu byônsò bivwa biMujaadika mu bufuki. Ki bwa cinyi Wākalediibwa mu ngondo mwisâtù anyi mu ngondo mwinâyi, kî mmu ngondo wa dikumi ne mwibîdî to; Yêyê kavwaku mwa kulediibwa mu ngondo awu to, bwalu kudi nêjê mêtres asambombo mu mikuna ayi mu cikondo aci cya cidimu. Kawwa nzambi-dîbà to, kadi Ûvwa Mwânà wa Nzambi. Nwamonu anyi? Nzambi-dîbà wa beena Loomo mmu matuku makumi abidi ne ataanu a ngondo wa dikumi ne mwibîdî, pàdî dîbà dipicila mu myaba yadi mwômò amu ne bôbò biikàle benza manaya a dicyonkomojangana naawu a beena Loomo awu, biikàle babiikila aci ne mmufikilu wa dilediibwa dya nzambi-dîbà, kadi bavwija aci bu Mwânà wa Nzambi. To, to. Yêyê nguvwa Mwânà wa Nzambi. Wende mufikilu wa dilediibwa uvwa pamwe ne bikwabo bya mu bufuki. Menemene.

Mpindyewu monaayi kabidi mpindyewu patudi twenda tutungunuka apa, tudi ne dîbà dikese ditushaadile.

<sup>318</sup> Mpindyewu too ne ku cidi cipwangane. Paanyima paa cikolakola cimane kudyenza; paanyima paa munyamvudi mumane kudyenza; paanyima paa lutete lumane kufika ku cikumbuji; pashiishe bikengela cikafike ku bupwangane, cyalukile ku lutete lwa ciibidilu alu.

Nenku, nwavulukaayi ne, lutete ludi ne cya kutolweshiibwa. Nwamonu anyi? Kaluyi nanku to, kalwakwikala ne mwoyi to. Nwamonu anyi? Nansha umwe wa ku bàvwa pambelu pa mikenji ayi kàakufikakù ku Mwoyi to. Bikengela atolweshiibwe ku Cyôci aci. Kadi, vulukaayi ne, Mwoyi umweumwe uvwa mu cikolakola awu ngudi mu lutete. Ûdi anu wenda udibobesha mwikàle wàlukila, nwamonu's. Yêyê mmu Dibuulule, (cinyi?) Mwânà wa muntu, lutete luvwa luye mu buloba alu. Nuumvu Mukenji anyi?

Beena Ngelika baakaMwambila ne: “Tudi baswe kumona Yesu.”

319 Yèyè ne: “Lutete lwa ditala lwólò kaluyi lumate mu buloba.” Nwamonu anyi? Eyo.

320 Mpindyewu Yèyè wakaDibuulula bu nganyi musangu wakalonda? Mu mmwenekelu mushiilangane; cikolakola ne munyamvudi, ne bikwabo, ne mabeji ônsò ne byônsò bikwabo abi. Yèyè wakaDibuulula pashiishe, (cinyi?) Nyuma umweumwe awu, kadi mu mmwenekelu mushiilangane. Nwamonu anyi? Kadi ndekeelu wa ditala adi udi cinyi? Didi dyalukila ku lutete lwa ku cibangidilu. Ncya bushuwa anyi?

321 Nenku mudimu Wende wa bwambi udi ulwa, kuumukila ku bôbò balongolodi abu, kwalukila cyakabidi ku Diyì dya ku cibangidilu. Diyì didi dilwa kudi muprofeta. Nenku Yèyè wakacilaya, mu Maalaki 4 ne: “Ne bwa kwalujulula Diitabuuja dya bantu ku lutete lwa ku cibangidilu.” Cyàkayà mu buloba aci ncyôci cimwecimwe cidi apa eci. Lutete ndubândilemù too ne apa. Ndupatuke bu Mwânà wa Nzambi, mpindyewu Ludi luDibuulula apa bu Mwânà wa muntu, ne pashiishe Ludi luDibuulula bu Mwânà wa Davidi pa Nkwasa wa butumbi. Nwamonu’s, Bânà basatu abu, anu menemene. Kaa, ekelekele, cyakabidi bu cya ku cibangidilu!

322 Mpindyewu too ne ku mudimu wa bwambi mupwangane wa Yèyè mwine; kaciyi muntu kampanda to, kaciyi dingumba kampanda to, bu mwakakwatabo mudimu mu cikondo aci kuntu kwaka, nwamonu’s; kadi Yèyè mwine mumweneshiibwe, uDimwenesha ku mulayi, uvwija Luuka Munsantu 17.28, Maalaki 4, ne bikwabo, Ebelu 13.8, anu mu yôyi menemene. Pa dîbà adi, bivwa bikengela kwikalabi dîbà kaayi? S’ndîbà didi Dimiinu dya bumfumu dya Abraham diikàle dindile Mwânà mulaya. Ne bifwanyikijilu byônsò bidi ne cya kwikala byûle. Ne Nzambi Yèyè mwine wakamweneka mu mmwenekelu wa muntu, kudi dimiinu dya mubidi dya Abraham, kumpala kwa kabutu, ne Yesu mmwambe ne neciikalè cintu cimwecimwe aci bwa Dimiinu dya bumfumu edi kumpala kwa Mwânà kupinganaYe.

323 Monaayi cibwikilu cya kale civwa cisokoke Butumbi aci. Biseba bya kale bya tusengelanshimba abi, kakuvwa bwimpè bwa kwîsù bwa kucijingabo to; nansha mubidi Wende paawu. Ki bwa cinyi bantu bavwa bamba ne: “KaaMuntu kakulumpe kaa katupa mushindu wawa?” Pàmwâpa mwikàle ne bidimu makumi asatu, ne mvyà, ne mwedi Wende mwikàle ne mvyà, kayi wa batangila banangidila to. Bible mmwambe ne: “Kakwena bwimpè bwa kwîsù bwa twètù kuMujinga to.” Kavwa ne mmwenekelu wa Mfumu to, ciseba cya kale cya kasengelanshimba aci, kadi, kaa, bwa civwa munda aci’s!

324 Nenku kaamusumbà kakese kaa “bansantu babunguluki baa mu malaba” basômbe pamwe mu nzubu wa luuya lukoke

mushindu ewu, mudibo bababiikila's, kakuyi bwîmpè bwa kwîsù bwa nsongo bwa kujingabo, kadi bwa cidì munda aci's! Ndi mutwishiibwe ne ncibwikila bwa myoyi yàbûngì, nudi numona's. Nudi numona anyi? Eyo.

<sup>325</sup> Lwà pambelupambelu apu Civwa cintu cyanaana, kadi byônsò bivwa mmunda. Paudi anu ubwela munda mwaCi, dîbà adi mpaudi uCimona. Udi ubwelamu bishi; mmu kulabulangana kwa ku cyanza, anyi mmu kudivwija kwa wa mwômò amu? To. Mmu kulediibwaMu. Kufwa, kulekela ciseba cyebe cya kale cya kasengelanshimba aci, wamonu's, wêwè mwine wa kale awu, bwa kubwela mu mupyamupya. Nwamonu anyi? Kulekela ciseba cya kale cya kasengelanshimba aci.

<sup>326</sup> Bukênkè bwa Shekinah kabwena... Teelejaayi, nwênù bambi! Bambi, ndi muswe bwa nwênù kuteeleja Eci nunku. Paudi anu usanganyiibwa munda... Mpindyewu ndi muswe kuya ne bwalu ebu mwikàle mutuuje menemene, bwa nwênù kwikala batwishiibwe ne nudi baCyûmwè. Musangu umwe wûdì anu usanganyiibwa munda mwa cibwikilu, mwinshi mwa Butumbi bwa Shekinah, Bukênkè bwa Shekinah kabwena bwangata Dîyì dya Nzambi kadi kubuulula Yesu bu "mwena lubuku" to, to, mùdì mangumba enza leelu ewu emu, "lubuku, munsantu mubunguluki wa mu malaba, Beelezebula." Butumbi bwa Shekinah kabwena buMubuulula bu aci nansha.

<sup>327</sup> Kadi Butumbi bwa Shekinah budi bubobesha Dimiinu ditù dilayiibwe bwa dîbà adi, dya Dîyì, bwikàle buMuleeja bu mucikàle Mbata wa mu Cibanda. Budi bupatula Dimiinu adi, Mbata wa mu Cibanda, Dyâmpà dya Mwoyi, Alpha ne Omega, umwèumwè awu makeelela, leelu, too ne kashidi. Yêyè ki citupa cyabanyina beena kwitabuuja. Butumbi bwa Shekinah budi bubuulula, bubuulwila mwena kwitabuuja ne, Yêyè udi umwèumwè awu makeelela, leelu, too ne kashidi.

<sup>328</sup> Kî nne: "Matuku, Yêyè ukaadi mumane kupita, ne Ûkaadi mumane kufwa ne byônsò abi bikaadi bijike" to. Pa nanku wêwè mulunda, pawikala witabuuja aci, pawikala witabuuja aci, kacya kùtukù mwanji kupetangana ne Butumbi bwa Shekinah to. Mmunyi mudi Butumbi bwa Shekinah bufwanyineku kuMubuulula mu bapersona basatu? Nwamonu anyi? Mmunyi mudi Butumbi bwa Shekinah bufwanyineku kuMubuulula bu mwikàle mubatiijiibwe, bantu's, mu dînà dya "Taatu, Mwânà, ne Nyuma Mwîmpè," padibi ne kacya kakutu kwanji kwikala muntu mu Bible mubatiijiibweku mushindu awu? Mmunyi mudi Butumbi bwa Shekinah bufwanyine kuMwelela mikalu ne mmushiikidile ku bapostolo, padiYe umwèumwè awu makeelela, leelu, too ne kashidi? Nwamonu anyi?

<sup>329</sup> Butumbi bwa Shekinah budi buMumwenesha. Budi bunupatwila Dîyì dya mulayi, buludi kumpala kwenu. Ki bwa cinyi bivwa bikengela Yêyè kubwikila mpala wa Mòsà,



mbwalu munda Mwende muvwa Dîyi. Wàkabwikila Yesu, bu kaaMuntu kakese kadipwekeshe, bwa kubapangisha bwa kumonabo Yehowah. Ne Yêyè mmuDibwikile leelu ewu, mu mabungu a buloba, ne Shekinah. Pambelu padi ne mmwenekelu wa musumbà wa bansantu babunguluki baa mu malaba, biseba bya kale bya tusengelanshimba, kadi munda mudi musokoka Butumbi bwa Shekinah.

Lenku Budi bubobesha Dyâmpà dya baakwidi ditudi tucyonkomokela edi, ne ditudi tukosolwela mu ditunga mu mashinyi, nkama ne nkama ya kilomeeta, nwamonu's. N'Cyakudya cya beena kwitabuuja. Cidi anu bwa mwena kwitabuuja. Vulukaayi ne, Dyâmpà dya baakwidi divwa anu bwa mwena kwitabuuja nkaayende, nwamonu's, Dimiinu dya Dyâmpà dya baakwidi. Monaayi. Budi bwenza cinyi? Butumbi bwa Shekinah abu, pa Dyâmpà dya baakwidi, buvwa buDilama ku dinyanguka.

<sup>330</sup> Nwavulukaayi ne, manà àkafùmà mu Dyulu awu, akatekiibwa mu Butumbi bwa Shekinah, kuumukila ku lukongo lumwe too ne ku lukwabo. Pambelu, avwa abwela misanda munda mwawu amu, bufuku, atapila twîshi. Neya bushuwa anyi?

<sup>331</sup> Pambelu paa Butumbi bwa Shekinah abu: "Matuku a bishima akaadi mamane kupita. Nwamonu's, byônsò abi bidi anu dikolesha dya maalu." Kadi munda . . .

<sup>332</sup> Tangilaayi, mbapete ndambu wa mamiinu a cilòngò cya ndonda dîbà mu cisasa kampana mu Ejipitu avwa mateekiibwemu mu matuku a Yozefu, kukaadi bidimu binunu binaayi, biipacila abi, kukaavwabi. Yozefu nguvwa muàtèèke mu cisasa amu. Bôbò kuàkùna. Kupetululawu mwoyi. Bwa cinyi? Avwa ne mwoyi.

<sup>333</sup> Butumbi bwa Shekinah ebu leelu ncinyi? Bwa kubwela dyamwamwa dya cibwikilu, bwa kumona Udi Nzambi udi mwimane kumpala kwenu, bwa kumona Udi Nzambi udi mwimane mwab'ewu kumpala kwetu, Dikunji dya—dya Kapya. Mmubwikila mu mubidi wa buntu. Kadi Shek'nah udi wenza, ùvwa wenza cinyi? Dimiinu dya Dyâmpà dya baakwidi, Dîyi didi dikengela twètù kwikala ne mwoyi ku dyôdi mu dituku edi, ku milayi eyi, Butumbi bwa Shekinah budi bubobesha Dyâmpà dya baakwidi adi, bwenza ne Dyenzeke, buDivwija Dyâmpà bwa mwena kwitabuuja; adi divwa diteekiibwa mu mabeji a Bible, bidimu ne ku bidimu, Dîyi bwa cikondo eci.

<sup>334</sup> Bwa mangumba, Cidi dibwe dya cilendwishi. Bwa mangumba, badi balendukilaPu. Munda mwa bidimu, Luther, Wesley, Martin Luther, ne bônsò abu, Sankey, Finney, John Smith, Knox, bônsò baakalendukilaPu.

<sup>335</sup> Kadi cidi cìkèngelà kwenza ncinyi mu matuku a ndekeelu? "*Kubwulula*" mbwena kwamba cinyi? "Kupatula!" Maalaki 4

udi ne cya kwenza cinyi? Kukudimuna bantu kubuumusha ku cilendwishi aci, kuupula bilele, ne kubuulula Dyâmpà ku Butumbi bwa Shekinah. Tangilaayi numone mudiDi dibobesha ne dipatula menemene anu cyakambaDi ne neDyènzè aci, kaa, ekelekele, Dyâmpà dya baakwidi bwa cikondo eci. Bwa dingumba kaayi, cilendwishi, “musumbà wa bakoleshi baa maalu.” Kadi, twètù bàdi bìitabuujà aba!

<sup>336</sup> Kadi mpindyewu bu mudi Bwakabuulwibwa 10 mulaye: “Maalu masokoka ônsò a Nzambi, àvwà masokoka mu mabeji munda mwa bidimu abi awu, neabobeshiibwe, apatudiibwa mu cikondo cya Mukenji wa mwanjelo wa mwandamutekete.” Ncya bushuwa anyi?

CidiYe mwambe ncinyi, kukaadi cidimu ne ngondo yisambombo, pabwîpì ne bidimu bibidi mene mpindyewu? “Patuka nda ku Tucson; wikalè ku nord wa Tucson, dikubakuba dinene,” ne bìvwà ne cya kwenzeka, “Bitampi ne bikangudiibwe,” Bitampi biine bìdi bibuululà maalu aa abi. Mémè kwalukila anu muvwaYe mwambe amu.

Ncinyi ciine aci? Bidi bileeja ne kaCyena mwa kwikala muntu to. Cidi cikumbana anu menemene, anu buludi mudibi mwa kwikala, musangu wònsò. Ncinyi aci? Ncyanza cya Nzambi, nwamonu’s, kumpala kwetu. Nenu bwalu cidi mu kasumbu kakese, cibwikila mu mubidi wa buntu, ncibwikila bwa bantu baa pambelu. Mmusokoka bantu baa pambelu. Yèyè udi munkaci mwa kuDibuulula kudi bàna bàdi baswe kuyiila. Nwamonu anyi? Ncya bushuwa.

<sup>337</sup> Lusumwineu wònsò, nwamonu’s, lwònsò mu Bible, cifwanyikijilu cyònsò cya mu Bible, mbimweneshiibwe apa mene kumpala kwetu. Nzambi umwèumwè awu, mu Dikunji dya Kapyà, diine dyàkafundà Bible adi, ne mu Dipungila Dikulukulu ne mu Dipyadipya, udi apa mene munkaci mwa kuCimwenesha, uleeja anu menemene ne ciwva ncinyi, umvwija, ne bwa kushindika ne ki dyumvwija ndyòdi adi.

<sup>338</sup> “Twètù ki badi ne dyumvwija adi!” Kadi tucimònkù cyenzeka’s. Nwamonu’s, ki cidi ne bwalu ncyòci aci, tucimonebi cimweneshiibwa.

<sup>339</sup> Cimwènèshìibwe! Yesu wakamba ne: “Piikalabi ne Ncyèna ngenza byenzedi bya Taatù Wanyi to, kanuNgiitabuujì to.” Nwamonu’s, bikengela cijaadikiibwe.

<sup>340</sup> Kadi mpindyewu—mpindyewu, kaciyi cijaadikiibwe bu Yesu to, baakaMujingila mu—mukusu ku mutu kadi kuMutuuta mu mutu, bamba ne: “Ní Udi Muprofeta, utwâmbilèbi wâKutuutù awu.” “Nenu ní Udi Mwânà wa Nzambi, enzabi bwa ebi byandamuke mâmpà.” Nwamonu’s, ki dyabulu nyèyè awu. “Ní Udi Mwânà wa Nzambi, tuuluka ku nkuruse ak- . . .”

341 Ndi muswe mêmè kwamba ne, Dibuulula didiYe ne cya kwenza adi, ki Dyôdi adi. Kadi mpindyewu, bu mudi Bwakabuulwibwa 10 mubuuludiibwe, maalu masokoka a Nzambi mmamweneshiibwe, mamanyike, muvwa Mukanda wa Bitampi Mwandamutekete mulaye.

Enzaayi mpindyewu bwa diitabuuja dyenu mu Yêyè Udi Dîyì. . . Bwalu, mu Bwakabuulwibwa 10 mbambe ne. . .

342 Anyi, Bwakabuulwibwa 19's we, eyo. Mvwa mucifunde mwab'ewu, Bwakabuulwibwa 10, bwa kuyaku; kadi kî n'10 to, n'19. PaalwaYe, Yêyè neabiikidiibwe ne, "Dîyì dya Nzambi," mubànde pa kabalu katooke, ne bayiidi baa mu Dyulu nebiikalè paanyima Pende.

343 Pandaayi cibwikilu cya cyena mangumba cya tulaasa tulonga aci! Pandaayi cibwikilu cya cyena mangumba cya bilele aci! Pandaayi bibwikilu bìdì bìMusokokà kunudi abi! Pandaayi bibwikilu bya maditambishi abi, nwènù bakaji. Nudi—nudi bânà baa bakaji baa Mfumu; enzaayi maalu mu mushindu awu, ikalaayi ne nsômbelu wa mushindu awu. Pandaayi cibwikilu cyônsò, nansha byôbì ne mapolome a Ph.D. ne LL.D. adi amba cinyi. Cyôci ciikàle cibengangane ne Bible awu, pandaayi cibwikilu aci nuye dyamwamwa!

Bwalu, tukaadi bapite baye dyamwamwa dya cibwikilu cipanda. Tukaadi luseke lwa dyamwamwa mpindyewu, luseke lwa dyamwamwa. Nenku neumone ne, wêwè anu mwenze nanku, mupandè bilele bya kale abi ne bikwabo, ne mufike kudiYe, neuMumone mwimane, Mucimunyi wa Bukole, Dîyì dya mulayi bwa cikondo eci, dimweneshiibwe. Neumone Nzambi wa Bukole mubuulula, uMumona anu munkaci mwetu mwab'ewu mene, mubuulula, Nzambi wa Bukole, kayi mucimuna kudi bilele to.

344 Baakateeta bwa kuMusokoka paanyima apu; bôbò kucyenza, munda mwa bidimu, kadi cikondo cya mulayi kuseemenaci. Nzambi kujuula Môsà musangu kampana, ki kupeeshaye bânà budishikaminyi ku bintu abi. Ne Yêyè ucidi anu. . . Yêyè kêna mwa kucimunyiibwaku to. "Maulu ne buloba nebijimine, kadi Dîyì Dyanyi kadyakujiminaku to." Yêyè udi umwëumwë awu makeelela, leelu, too ne kashidi.

345 Bôbò badi bamba ne: "Kabyena mwa kwenzeka to." Kadi's byakenzeka. Pashiishe, paakenzekabi, ki bôbò kwamba ne: "Mbya dyabulu."

346 Kadi aci kaciyena cishintulula Dîyì dya Nzambi to, nansha kakese. Didi dishaala anu "Nzambi," bwa mwena kwitabuuja, "Mucimunyi wa Bukole; umwëumwë awu makeelela, leelu, too ne kashidi," ku ngiikadilu Wende, ku Dîyì Dyende, Ebelu13.8.

347 Nkaadi njikija, ngamba eci nunku, bwalu kukaadi kushaale tusunsa tutaanu bwa dîbà dikumi ne ibidi, ndi ngamba anu

eci nunku. Ncidi ne mabeji matwe ku dikumi, dikumi ne abidi. Nêngàngatè mûngà musangu, pàmwápa diloolo edi.

<sup>348</sup> Monaayi, monaayi eci. Baakenza disumbishilangana dya bintu musangu kampanda, nenku bavwa ne cindaala cya kale. Nukaadi bumvumvwe bwalu ebu misangu ne misangu. Cindaala cya kale; ki musumbishidyanganyi wa bintu kwambaye ne: “Nudi nucimpeeshila mushinga kaayi?” Bidi mwa kwenzeka ne mpange kubyamba muvwabi, bilondeshile kasala kafunda aku. Ncya kukaadi bidimu byàbûngì, byàbûngì menemene, kadi nyewu cimvwile mu meeji. Ki kwambulabo cindaala cya kale aci, kacyi nansha ne mmwenekelu wa nsongo to; cimweka cibi cya dikema, kantu ne kantu. Yèyè kavwa mene mwa kupeta nansha muntu wa umuteelelaku mushinga bwàci to. Ndekeelu wa byònsò, ngeela meeji baakamwela mushinga wa ndola umwe, anyi cintu bu nanku awu.

<sup>349</sup> Kadi kuvwa muntu mwimane mwaba awu uvwa yèyè kayi wela meeji ne civwa mwa kusumbishiibwa ku awu mushinga to, ke kuya kucyangataye. Kucikwataye mu byanza byende, ke kwangataye kalonda kaa dikoono naaku pa nshinga ne yèyè kucilaaba mafuta, kadi kwimbaye muyengà. Kadi mmwenza anu wimba nanku anyi, bònsò kuditwa mu myadi. Kacya baabalela kabavwaku banji kuumvwa mujiki wa mushindu awu to.

Ki musumbishidyanganyi awu kwambaye ne: “Nudi nungeela yinga?”

<sup>350</sup> “Binunu bibidi!” “Binunu bitaanu!” “Binunu dikumi!” Nwamonu anyi? Civwa ncinyi aci? Cyanza cya mumanyi ncyàkabuululà civwà cibwikila mu cisanji cya kale aci.

<sup>351</sup> Bya mwomumwe mpidyewu! Mukanda wa kale ewu, Ùkaadi musunsuke, mbaWùsekèsèke, bawòshè mu mudilu, bawèlùlwile. Kadi cikondo ncyeci cyàkùmbanyi cidibo benze disumbishilangana dya bintu dya cyena mangumba, Nsangilu wa Maekeleeziya wa Buloba bujima. Badi baWusumbisha cyenze bu cintu cya kaciyi ne mwenaci to. Kulwalwa disumbishilangana dya bintu dya cyena mangumba.

<sup>352</sup> Kadi, nwavulukaayi ne, kudi cintu kampanda mu Mukanda wa kale awu citu cilaye ne dîngà dituku nekulwe cyanza cidyanjila kulongolola, cidyanjila kuteeka mu mudimu, cìikalà mwa kuWambula kadi kwenza ne Dìyi dya Mukanda ewu, mu mwoyi mudyànjila kulongolola, ku mudimu udibo badyènzèle, necibuulule milayi yìdìMu ayi. Mbifwanyine kumweka, kaa, bu musumbà wa kale wa bansantu babunguluki baa mu malaba, anyi cintu kampanda cikwabo; kadi bidi bikengela anu cyanza cya Mumanyi, Dìyi pa Wòwò awu, bwa kubuulula Dìyi adi, kadi cilwa kutamba ne munsantu mubunguluki wa mu malaba's. Cikaadi cilwe nanku kudi muntu yònsò wa kutudi, kì mmwòmò anyi, balunda baanyi? Kacyena mushiki wa dikoleshi dya maalu

to. Mbilondeshile Mwena cyanza cidì ne kalonda kaa dikoona naaku nshinga ya cindaala aku.

Tusambilaayi.

<sup>353</sup> Taatù wetu wa mu Dyulu, ku diitabuuja, cyôcì eci leelu ewu, nyewu mmona Mumanyi wa Mukanda wa kale awu, udibo bashintakaje ku bilele. MbaWushintakaje ku mangumba. Bôbò baakateeta kwenda naaWu mushinga. Mpindyewu nyewu bakaadi baWushintakaja ku—ku Nsangilu wa Buloba bujima wa bantu, wa maekeleeziya, wa ci-communiste, wa dibenga kwitaba diikalaku dya Nzambi. Ki disumbishilangana dya bintu adi kutungunukadi eku, Mukalenge.

<sup>354</sup> Nzambi, anji seemènäku! Mbushuwa ne, Wêwè neuseemene. Tütùminäku muprofeta awu, Mukalenge, udi ukwata kalonda kaa dikoona naaku pa nshinga awu, udi ukwata Dîyì edì ne ujaadika ne Yesu Kilisto udi umwèumwè awu makelela, leelu, too ne kashidi. Bâbûngì, Mukalenge, nebasumbishe myoyi yabo, nebiimanshe bilele byabo bya kale, nebapande bibwikilu abi. MbaCiswe, Mukalenge. Nebafile cintu kana cyônsò, cintu kana cyônsò, anu bwa babape Yesu.

<sup>355</sup> Mukalenge, ngeela meeji ne Wêwè ukàadi mubàjaadikileCì mpindyewu. Mbafumine ku myaba yônsò. Badi bàtùùla mfranga ya byakudya byabo. Badi benza cintu cyônsò, bwa kuteeta kulwa mu masangisha, bwa kwenzabo ne mwabo mwônsò, bwalu mbapete Busanga bwa mushinga mukole abu. Bikwabo bintu mbikese menemene. Bâbènèshäku, Taatù.

<sup>356</sup> Pa cyambilu apa, mu dinda emu, Mukalenge, mpaapa pasanganyiibwa mishwala. Pàmwäpa nebikengele bwa yimwe ya ku yôyì yumuke leelu ewu, kumpala kwa mudimu wa dyondopa diloolo edì. Éyì Nzambi wa Cyendelelele, pwekeshaku mèsù panshi. Ndi mumanye ne Wêwè udi mwab'ewu, Udi mubwikila. Nenku nyewu ntuma tuubibwikilu tukese etu, Mukalenge, tudi tubiikidiibwa ne “mishwala,” ne “tulùlù” tukese, ne “tunshesheete” tukese bwa bânà bakese. Nenku ndi ntutuma bu tuubimanyinu tukese twa bibwikilu, twa ne Dîyì Dyebe ndiyiishiibwepu mu dinda emu, kabidi, mèmè bu mwena kwitabuuja, ndi ntutentekela byanza, mubidi wanyi, biikàle bileeja ne ndi nCiitabuuja. Nenku, ku diitabuuja, muntu ne muntu mu citanda eci nyewu wenza cintu cimwecimwe aci, Mukalenge. Swaku bwa babeedi basangale.

<sup>357</sup> Wêwè udi mwa kulaaba cyanza pa—pa Dîyì kuumukila apa, Mukalenge, bu mwàkenzà mwimbi wa kale wa cindaala pa cindaala amu, enzaku nanku, Mukalenge. Enzaku bwa kwimbaci muyengà mulelela, kalonda kaa dikoona naaku pa nshinga kiikàle mu cyanza cya Mumanyi awu, dibà adi twètù netuMumone mwimane mumweneke patooke.

<sup>358</sup> Mushindu mwine uvwa bantu abu ne cya kwikala beele meeji mu diine dituku adi, pavwabo kabayi baswe bwa kufila

kantu nansha kamwe, pàvwàbo kabayi bafile kantu nansha kamwe bwa cindaala aci. Kabavwa baciswe to. Kabavwa baswe kwikala naaci mu nzubu mwabo to. Kadi mbenze anu bacistwa cyanza kudi ewu uvwa mwa kwikala mucimanye bilenga, dîbà adi kusumbishabo byònsò bivwabo naabi, bwa kucipetabo. Bakaavwa bakokangana ne balwangana mvita pa cyôci aci. Dîbà dikaavwa dimane kupita piine apu.

<sup>359</sup> Ki mwenzekabi kumpala eku peediibwa Mpungi wa Mukalenge, dîbà kadyakwikalaku kabidi to. Aba biikalabo bajeebùlèjèèbùle ne beelùlwile abu, bavwa biimàne mwaba awu kumpala kwa cibwikilu cipanda ne baakamona Dîyi dya Nzambi dimweneshiibwe abu (*bakwabo* nebéle mbila bwa kuDipeta, kadi, bu muWakamba ne: “Dîbà nedîikalè dimane kupita piine amu”), baakabwela mu Didya dya Dibanji; kadi *bôbô* baakashaala pambelu padi myadi, ditwa dya mikemu, ne disumakaja dya mènù.

<sup>360</sup> Kwacishaku muntu ne muntu bwa kwitabuuja, mu dinda emu, Taatù; baye dyamwamwa dya cibwikilu cyònsò cya budisu, cibwikilu cyònsò cya bupidya, ne bamone Mucimunyi wa Bukole mubuulula kumpala kwa beena kwitabuuja. Bwalu: “Monaayi, Ndi neenu misangu yònsò, mene too ne ku ndekeelu wa buloba. Mu katanci kakese emu baa buloba kabaakuMmona kabidi to, kadi nwènù nenuMmone.” Dileejáku Wèwè mwine munkaci mwetu, Mukalenge, bu mûkaadi Wèwè wenzenza. Shaalaku anu mushindu awu too ne patwamweneka ne mèsù kumpala Kwebe, piikalà *en morphe* mushintuluke ne Wèwè mulwe cyakabidi Mwànà wa muntu, ne Mwànà wa Davidi. Enzaku nanku, Mukalenge, mu Dînà dya Yesu Kilisto.

Patucidi ne mitu yetu miinyika apa, bònsò mu disambila.

<sup>361</sup> Ndi ndikonka leelu ewu ní kudi bantu mwaba ewu badi. . . munda emu anyi pambelu. Kakwena mushindu wa kwenza dibiikila dya ku cyoshelu mwab’ewu to, bwalu kapeena mwaba to. Kadi ndi ndikonka, ne meeji matooke ônsò, udiku witabuuja ne eci m’Bulelela anyi? Udiku witabuuja ne mu dituku ditudi ne mwoyi edi, ne cimvundu cinene cyònsò eci ne cikondo cya maalu a mamanya muvubi mu matuku a Noa, mu matuku a Mòsà, mu matuku a Kilisto, ne Nzambi, Taatù munene wetu bònsò badi balediibwe munda Mwende awu, mmwimane munkaci mwetu leelu ewu anyi?

<sup>362</sup> Dikunji dya Kapyà didì dimweneke ne mèsù didì dijaadikiibwe ku maalu a mamanya edi, kukaadi bidimu byàbúngì, pàncivwa mwànà mukese, dyakaakula naanyi kuntu kwaka e kungambiladi ne nènsonbelè mwaba ewu mene, ne bivwà mwa kwenzeka. Mémè mumanè kunwambile bwalu abu, ne pashiishe Dyôdi. . . Dituku dikwabo ku musulu, kumpala kwa mudimu wa bwambi kubangawu, ditabuluja dya kumpala, Yèyè kumweneka mu maulu kwaka, kuDimanyishaYe ne kufilaYe

mudimu muntuma naawu awu. Bidimu byònsò ebi mvwa musokoke bwalu abu mu mwoyi wanyi, mubwikile Kilisto, Dikunji dya Kapyra dimwedimwe adi diikàle dyumvwija Dîyì, bu mwakalayiibwabi. Tudi mu matuku a ndekeelu, anu ku Dilwa dya Mukalenge menemene. Nunku pawikala wêwè udisangana pambelu paa cibwikilu aci, bwalu ndufu wêwè usanganyiibwa pambelu, ku diitabuuja, mu dinda emu, udiku mwa kwamba ne: “Ku dikwacisha dya Nzambi. Ne ku dikwacisha Dyebe, Mukalenge, ndi muswe kubwela kuya dyamwamwa dya cibwikilu aci. Ndi muswe mbwele mwaba wûdì Wêwè, bwa kumona Dîyì dya Nzambi mu kaabujima”?

<sup>363</sup> Kuteeciku bwa kwikala Mòsà to. Kuteeciku bwa kwikala Aalona to. Kudidingiku to. Ikala wêwè anu muntu ûdì awu, cibì ikala mwena Kilisto.

<sup>364</sup> Nudiku mwa kuswa, ne mitu yenu miinyika, bwa kwela byanza byenu muulu kudi Nzambi, ne kwamba ne: “Mukalenge Nzambi, nkwàcishèku bwa mbwele munda mwa cibwikilu”? Nzambi akubeneshe. Nzambi akubeneshe. Aci, anji tangilaayi anu byanza!

<sup>365</sup> Pambelu pààpa, vulukaayi ne, mbifwanyine kwenzeka ne nciyiku mwa kumona cyanza cyebe to. Kabyena—kabyena ne mushinga menemene bwa mêmè kucimona to, twamb’eku twamb’eku; bidi ne mushinga, bwa Nzambi. Cibì, bwanyi mêmè, bidi anu bimfikisha ku dimona ne—ne Dimiinu ndimate mwaba kampana, ne, kadi Nzambi ngudi umona mwoyi wa bushuwa.

<sup>366</sup> Piikalaku bakwabo bavwa kabayi beele byanza byabo muulu, biikàle bajinga kubyela muulu mpindyewu, elaayi byanza byenu muulu bwa nnuvuluke mu disambila. Elaayi byanza byenu muulu. Nzambi akubeneshe. Abi mbîmpè. Nzambi akubeneshe.

<sup>367</sup> Taatù, nyewu tulomba leelu ewu, Mukalenge, bwa aba badi kabayi banji kubwela kuya dyamwamwa dya cibwikilu abu. Mbiimanyine pambelu pààpa bu muvwa Izaleela; badi munkaci mwa kutangila. Mbiitabuuje, kadi kacya kabatuku banji kubwela mu Eci to, bwa kumona Bukênkè bunene bwa Shekinah abu, ne bwa mubidi ne bwa nyuma, mu mushindu wa ne dîsù dya cyamu cya fôtò nditungunuke ne kukwata fôtò; kudi mbingu yibidi cyanaana, mbaCikwate cyakabidi fôtò. Nyewu Udibuulula Wêwè mwine, Mukalenge, Nzambi wa Bukole mubuulwila mwena kwitabuuja; mucikàle anu mubwikila bwa mwena bupidya, kadi mubuulula bwa mwena kwitabuuja.

Swaku bwa babwele baye dyamwamwa, leelu ewu, Mukalenge, bamone bulenga Bwende bunene ne Butumbi. Swaku bwa myoyi yabo yishintuluke kumpala mene kwa twêtù kwalukila mu ekeleeziya ewu diloolo edi. Swaku bwa bònsò kuujiibwabo tente ne Nyuma Mwîmpè, Bwikadi Bwebe. Swaku bwa Mumanyi wa cintu awu angate diitabuuja didibo naadi adi,

adipicishe pa Dîyi; swaku bwa muyengà walukile ne: “Wêwè ukaavwa mumana kulongolola, kumpala kwa difuka dya dyulu ne buloba, bwa kwitabuuja Eci. Itabuujaaku, mwanaanyi Wanyi, usungidiibwe.”

<sup>368</sup> Taatù, Nzambi, tudi tubafila mu byanza Byebe mpindyewu, biikàle bamanye ne kakwena cintu nansha cimwe kabidi citudi mwa kwenza to. Byònsò bidi kùdi Wêwè mpindyewu, Taatù. Nyewu nkupeeshabu Wêwè. Mu Dîna dya Yesu Kilisto, Mwan’Ebe. Amen.

Ndi muMunange, ndi . . .  
Bwalu . . . wakannanga kumpala  
Ne wakampetela lupandu  
Pa mucu wa Kalvariyo.

<sup>369</sup> Nudi baMunange anyi?

Mukemeshanganyi, mukemeshanganyi, ki cidi  
Yesu kùndi,  
Mubedyanganyi, Mfumu wa Ditalala, Nzambi  
wa Bukole n’Yèyè;  
Ûdi ùnsùngila, ùndama ku mpekaatu yònsò ne  
ku bundu,  
Mukemeshanganyi ki Mupikudi wanyi, Dîna  
Dyende ditumbe!

Kale mwua mujimine, mpindyewu ngaapeteki,  
muumuke ku dipiila,  
Yesu udi ufila budishikaminyi ne lupandu mu  
kaabujima;  
Ûnsùngila, ùndama ku mpekaatu yònsò ne ku  
bundu,  
Mukemeshanganyi ki Mupikudi wanyi, Dîna  
Dyende ditumbe!

Kaa, mukemeshanganyi, mukemeshanganyi, ki  
cidi Yesu kùndi,  
Mubedyanganyi, Mfumu wa Ditalala, Nzambi  
wa Bukole n’Yèyè;  
Kaa, ùnsùngila, ùndama ku mpekaatu yònsò ne  
ku bundu,  
Mukemeshanganyi ki Mupikudi wanyi, Dîna  
Dyende ditumbe!

<sup>370</sup> Mbanganyi badi baMumona mwimane, Mucimunyi wa Bukole, Dîyi divwijiibwe mubidi, mubuulula kumpala kwetu; Alpha, Omega; Ewu Uvwaku, Udiku, ne Wâlwa; Muji ne Mutoloku wa Davidi; uvwa Mwânà wa muntu, Mwânà wa Nzambi, Mwânà wa muntu, ne wíkala Mwânà wa Davidi awu? Nudi nuCiitabuuja ne mwoyi wenu wònsò anyi? Ûdibuulula Yèyè mwine mu cikondo cyònsò, mutwadiibwe kudi mwena kwitabuuja, ùDìbwikila mu mubidi wa buntu musokome kudi mwena bupidya. Yèyè mmusokoka paanyima paa cibwikilu.



Nzambi asweku apande cibwikilu cyônsò, bwa tuMumone bu mudiYe!

Yesu udi ukosa lukanu lwônsò,  
 Yesu udi ukosa lukanu lwônsò,  
 Kaa, Yesu udi ukosa lukanu lwônsò,  
 PadiYe ukupeesha budishikaminyi!

Dyamwamwa dya Yadene,  
 Mu madimi malenga a Edena  
 Mùdì Muci wa Mwoyi wela bilôngò,  
 Ke mudi diikisha bwanyi mêmè.

Yesu udi ukosa . . .

Kanwenaayiku baswe kusabuka Yadene mpindyewu anyi?  
 Mukùngùlù kî mmulepeku mu cipeela anyi? Tusabuke tuyaayi  
 dyamwamwa mu milayi!

Yesu udi ukosa lukanu lwônsò,  
 Yesu udi ukosa lukanu lwônsò,  
 Kaa, padiYe ukupeesha budishikaminyi!

371 Twèlàayi cyanza muulu mpindyewu.

Kashidi ne kashidi, mêmè nêmMutùmbishè,  
 Kashidi ne kashidi, mêmè nêmMutùmbishè,  
 Kashidi ne kashidi, mêmè nêmMutùmbishè,  
 Bwalu Yèyè udi umpeesha budishikaminyi!

372 Amen! Aci kaciyena cinufikishaku ku didyumvwa bilenga anyi? Kaa, mushindu mwine udibi bilenga bilayà! Mushindu mwine udibi bilenga bilayè's we, kî mmudiYe anyi, dîbà adi? Tulabulanganaayi ku cyanza muntu ne mukwende mpindyewu, biikàle twamba ne:

Yesu udi ukosa lukanu lwônsò,  
 Yesu udi ukosa lukanu lwônsò,  
 Kaa, Yesu udi ukosa lukanu lwônsò, (Nzambi akubeneshe, mwaneetu.)  
 Kaa, ne Yèyè udi ukupeesha budishikaminyi!  
 Kashidi ne kashidi, mêmè nêmMutùmbishè,  
 (Nzambi wa Bukole!)  
 Ka- . . .

“Umwèumwè awu makeelela, leelu, too ne kashidi,”  
 mmushintulule anu mmwenekelu Wende cyanaana.

. . . nêmMutùmbishè,  
 Kashidi ne kashidi, mêmè nêmMutùmbishè,  
 Bwalu Yèyè udi (munguumushe twitabaayi  
 yônsò) mmumpe . . . (bwa kwitabuujà Dîyì  
 Dyende).

373 Kaa, kanwenaku mwa kuumvwa Cindaala cya Mumanyi awu cyenda cyendakana mu Dîyì edi mwônsò anyi? Yèyè udi umwèumwè awu makeelela, leelu!

Kashidi ne kashidi, mêmè nêmMutùmbishè,  
 Kashidi ne kashidi, mêmè nêmMutùmbishè,  
 Ka- . . . (Yèyè, Dìyì!) . . . shidi ne kashidi, mêmè  
 nêmMutùmbishè, (Wàkenza cinyi?)  
 Bwalu Yèyè (paanyima paa ridô) udi umpeesha  
 budishikaminyi!

<sup>374</sup> Butumbi bwikalè kudi Nzambi! Ndi muMunange.  
 Kanwenaayiku baMunange anyi? Eci kî neya mu Dyulu anyi?  
 Mêmè ntu munange byambibiibwa bya Dìyì abi, nwamonu's,  
 anu Nyuma Mwîmpè mu mushindu wa kalolo, wa didipwekesha  
 awu. Ntu—ntu munange anu Aci. Kaa, anji elaayiku peenu  
 meeji!

Dyamwamwa dya Yadene, (Ndi ngenda  
 nkuseemena mpindyewu.)  
 Mu ditalala . . . (Kamùyi lufu to!) dya  
 Edena, . . . (Ncinyi cîngàasanganàmu?)  
 Mùdi Muci wa . . . (ùvwà mu budimi bwa Edena  
 awu) wela bilòngò,  
 Mudi diikisha bwanyi mêmè.

<sup>375</sup> Udi muswe kuya anyi? Yèyè udi ukosa lukanu lwônsò.

Yesu udi ukosa (cilele cyônsò) lukanu lwônsò,  
 Yesu udi ukosa lukanu lwônsò (mangumba  
 ônsò, twitabaayi yônsò),  
 . . . ukosa lukanu lwônsò,  
 Kaa, padiYe ukupeesha budishikaminyi!

<sup>376</sup> Butumbi bwikalè kudi Nzambi! Ntu mêmè anu muMunange.  
 Kabyena bikemesha to pààkambà Yeshaayi ne: “Yèyè  
 m’Mubedyanganyi, Mfumu wa Ditalala, Nzambi wa Bukole,  
 Taatù wa Kashidi, Mukemeshanganyi!”

Mukemeshanganyi, mukemeshanganyi, ki cidi  
 Yesu kùndi,  
 Mubedyanganyi, Mfumu wa ditalala, Nzambi  
 wa Bukole n’Yèyè;  
 Kaa, ùnsùngila, ùndama ku mpekaatu yônsò ne  
 ku bundu,  
 Mukemeshanganyi, Mupikudi wanyi, Dîna  
 Dyende ditumbe!

<sup>377</sup> Kaa, ekelekele! Aci’s cidi cinyungisha mwoyi wanyi.  
 Mushindu mwine udiYe mulenga’s we! Nyawu nnwambila’s,  
 kakwena ndekeelu bwa Eci nansha. Eci, mêmè ndi mubwele mu  
 Cyôci eci kukaadi bidimu makumi asatu ne bisatu, mwikàle  
 ndyumvwa mushindu ewu. Nenku bu Yèyè mwa kunenga,  
 dîngà dituku mêmè nêmbwikilè mèsù, nênyè mu mushindu  
 umweumwe ewu. Amen!

Mukemeshanganyi, mukemeshanganyi, ki cidi  
 Yesu kúndi,  
 Yèyè m'Mubedyanganyi, wanyi Mfumu wa  
 Ditalala, Nzambi wa Bukole n'Yèyè;  
 Ùdi ùnsùngila, Ùdi ùndama ku mpekaatu  
 yònsò ne ku bundu,  
 Mukemeshanganyi, Mupikudi wanyi, Dìna  
 Dyende ditumbe!

378 Mêmè's ndi mufwanyine kushaala apa dituku dijimà, anu mu Cyôci aci. Pôlò wakamba ne: "Mêmè ngimba, nêngimbè mu Nyuma." Uh-huh. "Mêmè nyiisha, nênyiiishè mu Nyuma. Mêmè ngenda, nêngendè mu Nyuma. Mêmè nyiikila, nênyiiikilè mu Nyuma." Bintu byònsò byenjiibwe ku Dîyì ne ku Nyuma. Eyowa's, mukalenge. Amen! Byònsò m'Bulelela bwa Nzambi.

379 Ndi mMumona, Nzambi wa Bukole, mubuulula. Ndi mMumona ukoka twitabaayi ne mangumba, ubyeela anu kwaka; ukoka beena—beena mpatà ubeela anu kwaka, ndongamu ya bulongeshanganyi, ne byònsò; wenda uya kumpala, wimana mwaba awu. Nudi nwela meeji ne twitabaayi mmifwanyine kuMucimuna anyi? Nudi nwela meeji ne mangumba mmafwanyine kuMucimuna anyi? Nudi nwela meeji ne Nsangilu wa Buloba bujima udi mwa kuMucimuna anyi? Yèyè wakacimuna byònsò, kukosa lukanu lwònsò, kupanda iferno kadi kumushiya bwashi; mukose citampi, mubwele mu Mwaba mutambe cijila; muDibuulule kutudi, mwikàle Dîyì, umwèumwè awu makeelela, leelu, too ne kashidi. Amen. Ndi muMunange.

380 Mpindyewu, too ne patwasangila mu mapingaja emu, tudi baswe kwenza cintu cimwepele, ncyà ne:

Angata Dìna dya Yesu wëndè naadi,  
 Wèwè mwànà wa kanyinganyinga ne dikenga;  
 Nedikupe disanka ne busambi,  
 Kaa, nda naadi kwònsò kúyaayà.

Dìna dya mushinga, Éyì dya bupole be!  
 Ditekemena dya buloba ne disanka dya Dyulu;  
 Dìna dya mushinga, (Eyowa's, nkaadi naayi,  
 kwònsò aku.) Éyì dya bupole be!  
 Ditekemena dya buloba ne... (...?...)

381 Sataana yèyè mudidinge anu mukuteete, ne kwèna mutangile ku cintu cya bushuwa to, mufunkwine Dîyì bu mwàkenzà Yesu amu. Wamonu anyi? Wamonu anyi? Amen!

Twinamina Dìna dya Yesu,  
 Tuona mikookwela ku makàsà Ende,  
 Mfumu wa bamfumu mu Dyulu netuMwase  
 cifulu cya butumbi,  
 Paajika lwendu lwetu.


Dîna dya mushinga, Dîna dya mushinga!  
 Ditekemena dya buloba ne disanka dya Dyulu;  
 Dîna dya mushinga, Éyì dya bupole be!  
 Ditekemena dya buloba ne disanka dya Dyulu.

<sup>382</sup> Billy nealwe, pabwìpì ne dîbà isambombo jaajaaja, neabanyine badi baswe kubwela mu mulongo wa babeedi twarta twa disambila. Ndi ngeela meeji ne bikengela twêtù kucyenza. Tukaavwa baswe kubenga kutwàbànya, kadi, bu mudiku musumbà wa bantu, bikengela anu twêtù kwenza nanku, nudi numona's.

<sup>383</sup> Mpindyewu nuMuvulukaayi! Ikalaayi misangu yònsò Nende mu meeji, mu myoyi yenu. Kwònsò kùyaayà, udi umona's, ikala anu ne Yesu mu meeji.

Angata Dîna dya Yesu (Teelejaayi mpindyewu.)  
 wëndè naadi,  
 Bu ngabu bwa kudikanda ku buteyi bwònsò;  
 (Cìdì cyènzekà ncinyi?)  
 Pààkunyùngulukilà mateeta, (Udi ne cya  
 kwenza cinyi?)  
 Nungana anu Dîna dya Cijila adi mu  
 disambila.

Dîna dya mushinga, (Dîna dya mushinga!) Éyì  
 dya bupole be!  
 Ditekemena dya buloba ne disanka dya Dyulu;  
 Dîna dya mushinga, Éyì dya bupole be!  
 Ditekemena dya buloba ne disanka dya Dyulu.

<sup>384</sup> Twinyikaayaaku mitu yetu mpindyewu. Nêndombè mpaasata ne udiku mwa kulwa bwa kutangalaja bateeleji. Mwaneetu Neville, Nzambi akubeneshe, Mwaneetu Neville. 

*DIBUULUDIIBWA DYÀ NZAMBÌ* LUA64-0614M

(The Unveiling Of God)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 14 a ngondo mwisambombo, cidimu cya 1964, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)